

二百五十四之二百六十



總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

喬允升

易應昌等

曹于沐

孫居相

弟鼎相

曹珖

陳于廷

鄭三俊

李日宣

張瑋

金光辰

喬允升字吉甫洛陽人萬曆二十年進士除太谷知縣以治行高等徵授御史歷按宣大山西畿輔並著

風采三十九年大計京官允升協理河南道力鋤匪類而主事秦聚奎給事中朱一桂咸為被察者譏寃

察疏猶未下允升慮帝意動搖三疏別白其故且劾吏部侍郎蕭雲舉佐察行私事乃獲竣雲舉亦引去

尋遷順天府丞進府尹齊楚浙三黨用事移疾歸天啟初起歷刑部左右侍郎三年進尚書魏忠賢逐吏

部尚書趙南星廷推允升代忠賢以允升為南星黨并逐主議者允升復移疾歸既而給事中薛國觀劾

允升主謀邪黨詔落職閒住崇禎初召拜故官時訟獄益繁帝一切用重典允升執法不撓多所平反先

是錢謙益典試浙江有奸人金保元徐時敏僞作關節授舉子錢千秋故有文獲薦覺保元時敏詐

與之鬩事傳京師為部科磨勘者所發謙益大駭詰知二奸所為疏劾之并千秋俱下吏罪當戍二奸屢

死千秋更赦釋還事已七年矣溫體仁以杖卜不與疑謙益主之復發其事詔逮千秋再訊帝深疑廷臣結黨蓄怒以待而體仁又密伺於旁廷臣相顧惕息允升乃會都御史曹于汴大理卿康新民等讞鞠者再千秋受拷無異詞允升等具以聞帝不悅命覆勘體仁慮謙益事白己且獲譴再疏劾法官六欺且言獄詞盡出謙益手允升憤求去帝雖慰留卒如體仁言奪謙益官閒住千秋荷校死二年冬我

大清兵薄都城獄囚劉仲金等百七十人破械出欲踰城被獲帝震怒下允升及左侍郎胡世賞提牢主事敖繼榮獄欲寘之死中書沈自植乘間摭劾允升他罪章并下按問副都御史掌院事易應昌以允升等無死罪執奏再三帝益怒并下應昌獄鑄僉都御史高弘圖大理寺卿金世俊級奪少卿周邦基以下俸令再讞弘圖等乃坐允升絞而微言其年老可念帝謂允升法當死特高年篤疾減死與繼榮俱戍邊世賞贖杖爲民尙書胡應台等上應昌罪帝以爲輕杖郎中徐元嘏於廷鑄應台秩視事應昌論死四年四月久旱求言多請緩刑乃免應昌及工部尙書張鳳翔御史李長春給事中杜齊芳都督李如楨死遭戍邊衛允升赴戍所未幾死允升端方廉直敷歷中外具有聲績以註誤獲重譴天下惜之易應昌字瑞芝臨川人萬曆四十一年進士熹宗時由御史累遷大理少卿逆黨劾爲東林削籍崇禎二年起左僉都御史進左副都御史與曹于汴持史筆高捷起官事爲時所重至是獲罪福王時召復故官遷工部右侍

郎國變後卒帝在位十七年刑部易尙書十七人薛貞以奄黨抵死蘇茂相半歲而罷王在晉未任改兵部去允升遣戍韓繼思坐議獄除名胡應台獨得善去馮英被劾遣戍鄭三俊坐議獄逮繫劉之鳳坐議獄論絞瘦死獄中甄淑坐納賄下詔獄改繫刑部瘦死李覺斯坐議獄削籍去劉澤深卒於位鄭三俊再爲尙書改吏部范景文未任改工部徐石麟坐議獄落職閒住胡應台再召不赴繼其後者張忻賊陷京師與子庶吉士端並降

曹于汴字自梁安邑人萬厯十九年舉鄉試第一明年成進士授淮安推官以治行高第授吏科給事中疏劾兩京兵部尙書田樂邢玠及雲南巡撫陳用賓樂玠遂引去吏部郎趙邦清被誣于汴疏雪之謁告歸僦屋以居不蔽風日起厯刑科左右給事中朝房災請急補曠官修廢政遼左有警朝議增兵于汴言國家三歲遣使者閱邊盛獎邊臣功伐蟒衣金幣之賜官秩之增未嘗或靳今廢防至此宜重加按問邊道超擢當於秩滿時閱實其績毋徒循資俸坐取建牙開府進吏科都給事中給事中胡嘉棟發中官陳永壽兄弟奸永壽反許嘉棟于汴極論永壽罪故事章疏入會極門中官直達之御前至是必敢視然後進御于汴謂乖祖制洩事機力請禁之二十八年典外察去留悉當明年典京察屏湯賓尹劉國縉等而以年例出王紹徽喬應甲於外其黨羣起力攻于汴持之堅卒不能奪以久次擢太常少卿疏寢不下請

告又不報候命歲餘移疾歸光宗立始以太常少卿召至則改大理少卿遷左僉都御史佐趙南星京察事竣進左副都御史天啟三年秋吏部缺右侍郎廷推馮從吾以于汴副中有特用于汴于汴以從吾名位先己義不可越四辭不得遂引疾歸明年起南京右都御史辭不拜時紹徽應甲附魏忠賢得志必欲害于汴屬其黨石三畏以東林領袖劾之遂削奪崇禎元年召拜左都御史振舉憲規約敕僚吏臺中肅然明年京察力汰匪類忠賢餘黨幾盡仕路爲清溫體仁訐錢謙益下錢千秋法司訊不得實體仁以于汴謙益座主也并訐之于汴亦發體仁欺罔狀帝終信體仁謙益竟獲罪先是詔定逆案于汴與大學士韓爌李標錢龍錫刑部尙書喬允升平心參決不爲己甚小人猶惡之故御史高捷史藻素愾邪爲清議所擯吏部尙書王永光力薦之故事御史起官必都察院咨取于汴惡其人久弗咨永光憤再疏力爭已得請于汴猶以故事持之兩人遂投牒自乞于汴益惡之卒持不予兩人竟以部疏起官遂日夜謀傾于汴中書原抱奇者賈人子也嘗誣劾大學士爌至是再劾爌及于汴并及尙書孫居相侍郎程啟南府丞魏光緒目爲西黨請皆放黜以五人籍山西也帝絀抱奇言不聽而工部主事陸澄源復劾于汴朋奸六罪帝雖謫澄源于汴卒謝事去及辭朝以敦大進規七年卒年七十七贈太子太保于汴篤志正學操履粹白立朝正色不阿崇獎名教有古大臣風

孫居相字伯輔沁水人萬曆二十年進士除恩縣知縣徵授南京御史負氣敢言嘗疏陳時政謂今內自宰執外至郡守縣令無一人得盡其職政事日廢治道日乖天變人怨究且瓦解土崩縱珠玉金寶互地彌天何救危亂帝不省誠意伯劉世延屢犯重辟廢爲庶人錮原籍不奉詔久居南京益不法妄言星變將勒兵赴闕居相疏發其奸并及南京勳臣子弟暴橫狀得旨下世延更安遠東寧忻城諸侯伯子弟悉按問強暴爲戢稅使楊榮激變雲南守太和山中官黃勳噉道士毆辱知府居相皆極論其罪時中外多缺官居相兼攝七差署諸道印事皆辦治大學士沈一貫數被人言居相力詆其奸貪植黨一貫乃去居相亦奪祿一年連遭內外艱服闋起官出巡漕運還發湯賓尹韓敬科場事廷議當褫官其黨爲營護自下法司覆勘居相復發敬通賄狀敬遂不振故事御史年例外轉吏部都察院協議王時熙魏雲中之去都御史孫瑋不與聞居相再疏劾尙書趙煥煥引退及鄭繼之代煥復以私意出宋槃潘之祥於外居相亦據法力爭吏部侍郎方從哲由中旨起官中書張光房等五人以持議不合時貴擯不與科道選居相並抗章論列當是時朋黨勢成言路不肖者率附吏部以驅除異己勢張甚居相挺身與抗氣不少沮於是過廷訓唐世濟李徵儀劉光復趙興邦周永春姚宗文吳亮嗣汪有功王萬祚輩羣起爲難居相連疏稽拄諸人迄不能害至四十五年亦以年例出居相江西參政引疾不就天啟改元起光祿少卿改太僕

擢右僉都御史巡撫陝西四年春召拜兵部右侍郎其冬魏忠賢盜柄復引疾歸無何給事中陳序謂居相出趙南星門與楊漣交好序同官虞廷陛又劾居相力薦李三才遙結史記事遂削奪崇禎元年起戶部右侍郎專督鼓鑄尋改吏部進左侍郎以戶部尙書總督倉場轉漕多僱民舟民億甚以居相言獲蘇高平知縣喬澹貪虐爲給事中楊時化所劾坐贓二萬有奇澹家京師有奧援乞移法司覆訊且訐時化請囑致隙時化方憂居通書居相報書有國事日非邪氣益惡語爲偵事者所得聞於朝帝大怒下居相獄謫戍邊七年卒於戍所弟鼎相歷吏部郎中副都御史巡撫湖廣亦有名東林中

曹珖字用章益都人萬曆二十九年進士授戶部主事督皇城四門倉衛軍貸羣璫子錢償以月餉軍不支餉者三年及餉期羣璫抱券至珖命減息璫大譁珖曰并私券奏聞聽上處分耳羣璫請如命軍困稍蘇以憂去起補兵部武選主事歷職方郎中大璫私人求大帥珖不可東廠太監盧受疏申職掌珖亦請敕受約束部卒毋陷良民稍遷河東參政引疾歸久之起南京太常少卿光宗驟崩馳疏言先帝春秋鼎盛奄棄羣臣道路咸知奸黨陰謀醫藥雜進以至於此天下之弒逆有毒而非斲戕而非刃者此與先年梃擊同一奸宄乞明詔輔臣直窮奸狀以雪先帝之讎報聞天啟初敘職方時邊功加光祿卿進太常大理卿魏忠賢亂政大獄紛起珖請告歸尋爲給事中潘士聞所劾落職閒住御史盧承欽歷攻東林詆珖

狎主邪盟遂削奪崇禎元年起戶部右侍郎督錢法尋遷左侍郎三年拜工部尙書珖初名珍避仁宗諱始改名五年陵工成加太子少保桂王重建府第議加江西河南山東山西田賦十二萬有奇浙江漕織造銀十餘萬巡撫陸完學請編入正額珖皆持不可中官張彝憲總理戶工兩部事議設座於部堂珖不可右侍郎高弘圖履任彝憲欲共設公座珖與弘圖約比彝憲至皆曰事竣矣撤座去彝憲怏怏及主事金鉉馮元颺交疏劾彝憲彝憲疑出珖日搢摭其隙會山永巡撫劉宇烈請料價萬五千兩鉛五萬斤工部無給銀例與鉛之半宇烈怒奏鉛皆濫惡彝憲取粗鉛進曰庫鉛盡然欲以罪珖嚴旨盡鑄庫鉛司官中毒死者三人內外官多獲罪彝憲乃糾巡視科道許國榮等十一人珖疏救忤旨詰責彝憲又指闖工冒破齟齬之玷累疏乞骸骨歸五月得請屢薦不起家居十四年卒

陳于廷字孟諤宜興人萬曆二十三年進士歷知光山唐山秀水三縣徵授御史甫拜命卽論救給事中汪若霖誅大學士朱廣甚力坐奪俸一年頃之劾職方郎中申用懋趙拱極黃克謙爲宰相私人不宜處要地又劾廣及王錫爵當斥已言諭德顧天垓素干清議不宜久玷詞林語皆峻切視離河東劾稅使張忠撓鹽政正陽門災極陳時政闕失父喪歸服除起按江西時稅務已屬有司而中官潘相欲親督湖口稅于廷劾其背旨虐民淮府庶子常洪作奸論寘之法改按山東光宗立擢太僕少卿徙太常議紅丸事

極言權文昇李可灼當斬尙書王紀被斥特疏申救再進大理卿戶部右侍郎改吏部進左侍郎尙書趙南星既逐于廷署事大學士魏廣微傳魏忠賢意欲用其私人代南星且許擢于廷總憲于廷不可以喬允升馮從吾汪應蛟名上忠賢大怒謂所推仍南星遺黨矯旨切責并楊漣左光斗盡斥爲民文選郎張可前御史袁化中房可壯亦坐貶黜自是清流盡逐小人日用事矣崇禎初起南京右都御史與鄭三俊典京察盡去諸不肖者南御史差竣例聽北考于廷請先考於南報可召拜左都御史以巡方責重列上糾大吏薦人才修荒政覈屯鹽禁耗羨清獄囚訪奸豪弭寇盜八事請於回道日核實課功優詔褒納給事中馬思理御史高倬余文縉坐事下吏並抗疏救之秩滿加太子少保三疏乞休不允兩浙巡鹽御史祝徽廣西巡按御史畢佐周並擅撻指揮非故事事聞帝方念疆場多故欲倚武臣旨下參覈于廷等言軍官起世胄率不循法度槩列彈章將不勝擾故小過薄責以懲凡御史在外者盡然不自二臣始帝以指揮秩崇非御史得杖令會兵部稽典制以聞典制實無杖指揮事乃引巡撫敕書提問四品武職語以對帝以比擬不倫責令再核于廷等終右御史所援引悉不當帝意疏三上三却竟削籍歸家居二年卒福王時贈少保于廷端亮有守周延儒當國于廷其里人無所附麗與溫體仁不合故卒獲重譴去

鄭三俊字用章池州建德人萬曆二十六年進士授元氏知縣累遷南京禮部郎中歸德知府福建提學

副使家居七年起故官督浙江糧儲天啟初召爲光祿少卿改太常未上陳中官侵冒六事時魏忠賢客氏離間后妃希得見帝而三俊疏有篤厚三宮妖冶不列於御語忠賢遣一豎至閣中摘妖冶語令重其罪閣臣力爭而擬旨則以先朝故事爲辭三俊復疏言近日糜爛荼毒無踰中壺閣臣悉指爲故事古人言奄豎聞名非國之福今聞名者已有人內連外結恃閣臣彈壓抑損之而閣臣輒阿諛自溺其職可爲寒心忠賢益怒以語侵內閣留中不下擢左僉都御史疏陳兵食大計規切內外諸司吏部郎中徐大相言事被謫抗疏救之四年正月遷左副都御史戶部右侍郎楊漣劾忠賢三俊亦上疏極論尋署倉場事太倉無一歲蓄三俊奏行足儲數事忠賢盡逐漣等三俊遂引疾去明年忠賢黨張訥請毀天下書院劾三俊與鄒元標馮從吾孫慎行余懋衡合汙同流褫職閒住崇禎元年起南京戶部尙書兼掌吏部事南京諸僚多忠賢遺黨是年京察三俊澄汰一空京師被兵大臣大獲譴明年春三俊以建儲入賀力言皇上憂勞少過人情鬱結未宣百職庶司救過不贖上下睽孤足爲隱慮願保聖躬以保天下收人心以收封疆帝褒納之南糧歲額八十二萬七千有奇積逋至數百萬而兵部又增兵不已三俊初至倉庫不足一月餉三俊力祛宿弊糾有司尤怠玩者數人屢與兵部爭虛冒久之士得宿飽萬厯時稅使四出蕪湖始設關歲徵稅六七萬泰昌時已停至是度支益絀科臣解學龍請增天下關稅南京宣課司亦增二萬

三俊以爲病民請減其半以其半征之蕪湖坐賈戶部遂派蕪湖三萬復設關徵商三俊請罷征併於工部分司計舟輸課不稅貨物皆不從遂爲永制蕪湖淮安杭州三關皆隸南戶部所遣司官李友蘭霍化鵬任倣皆貪三俊悉劾罷之居七年就移吏部八年正月復當京察斥罷七十八人時服其公旋上議官評杜請屬慎差委三事帝皆採納流寇大擾江北南都震動三俊數陳防禦策禮部侍郎陳子壯下獄抗疏救之考績入都留爲刑部尙書加太子少保帝以陰陽愆和命司禮中官錄囚流徒以下皆減等三俊以文武諸臣誥誤久繫者衆請令出外候讞因論告訐株蔓之弊乞赦內外諸臣行惻隱實政內而五城訊鞫非重辟不必參送法司外而撫按提追非真犯不必盡解京師刑曹決斷以十日爲期帝皆從之代州知州郭正中因天變請舉寒審之典帝命考故事三俊稽厯朝寶訓得祖宗冬月錄囚數事備列上奏寢不行前尙書馮英坐事遣戍其母年九十有一三俊乞釋還侍養不許初戶部尙書侯恂坐屯豆事下獄帝欲重譴之三俊屢獻上不稱旨讒者謂恂與三俊皆東林曲法縱舍工部錢局有盜穴其垣命按主者罪三俊亦擬輕典帝大怒褫其官下吏應天府丞徐石麒適在京上疏力救恂旨切責帝御筵講官黃景昉稱三俊至清又偕黃道周各疏救帝不納切責三俊欺罔以無贓私令出獄候訊宣大總督盧象昇復救之大學士孔貞運等復以爲言乃許配贖十五年正月召復故官會吏部尙書李日宣得罪卽命

三俊代之時值考選外吏多假繕城墾荒名減俸行取都御史劉宗周疏論之諸人乃負緣周延儒囑兵部尚書張國維以知兵薦帝卽欲召對親擢三俊言考選者部院事天子且不得專況樞部乎乞先考定乃請聖裁帝不悅召三俊責之對不屈宗周復言三俊欲俟部院考後第其優劣純疵恭請欽定若但以奏對取人安能得真品帝不從由是倖進者衆帝下詔求賢三俊舉李邦華劉宗周自代且薦黃道周史可法馮元颺陳士奇四人姜琛熊開元言事下獄及宗周獲嚴譴三俊皆懇救先後奏罷不職司官數人銓曹悉廩廩大僚缺官三俊數引薦賢士之廢斥者多復用刑部尚書徐石麟獲罪率同官合疏乞留三俊爲人端嚴清亮正色立朝惟引吳昌時爲屬頗爲世詬病時文選缺郎中儀制郎中吳昌時欲得之首輔周延儒力薦於帝且以囑三俊他輔臣及言官亦多稱其賢三俊遂請調補帝特召問三俊復徇衆意以對帝頷之明日卽命下以他部調選郎前此未有也帝惡言官不職欲多汰之嘗以語三俊三俊與昌時謀出給事四人御史六人於外給事御史大譁謂昌時紊制弄權連章力攻并詆三俊三俊懇乞休致詔許乘傳歸國變後家居十餘年乃卒

李日宣字晦伯吉水人萬曆四十一年進士授中書舍人擢御史天啟元年遼陽破請帝時召大僚面決庶政尋請宥侯震陽以開言路厚中宮以肅名分忤旨切責已又薦丁元薦鄒維璉麻僊等十餘人乞召

遷朱欽相劉廷宣等帝以濫薦逐臣停修二月旋出理河東鹽政還朝以族父邦華佐兵部引嫌歸五年七月逆黨倪文煥劾邦華日宣爲東林邪黨遂削籍莊烈帝卽位復故官以邦華在朝久不出崇禎三年起故官巡按河南還朝掌河南道事中官王坤訐大學士周延儒日宣率同官言內臣監兵不宜侵輔臣且插款中疑邊情多故坤責亦不可追報聞遷大理丞屢進太常卿九年冬擢兵部右侍郎鎮守昌平久之進左侍郎協理戎政尋敘護陵功加兵部尙書十三年九月擢吏部尙書十五年五月會推閣臣日宣等以蔣德璟黃景昉姜曰廣王錫衮倪元璐楊汝成楊觀光李紹賢鄭三俊劉宗周吳姓惠世揚王道直名上帝令再推數人而副都御史房可壯工部右侍郎宋致大理寺卿張三謨與焉大僚不獲推者爲流冒入內且創二十四氣之說帝深惑之踰月召日宣及與推諸臣入中左門偕輔臣賜食已出御中極殿令諸臣奏對致陳九邊形勢甚辯帝惡其干進叱之乃命德璟景昉姓入閣而以徇情濫舉責日宣等回奏奏上帝怒不解復御中左門太子及定永二王侍帝召日宣聲甚厲次召吏科都給事中章正宸河南道御史張煊及致可壯三謨詰其妄舉日宣奏辯帝曰汝嘗言秉公執法今何事不私正宸奏日宣多游移臣等常劾之然推舉事實無所徇日宣復爲致等三人解帝命錦衣官提下日宣等六人並褫冠帶就執時帝怒甚侍臣皆股栗失色德璟景昉姓叩頭辭新命因言臣等並在會推中若諸臣有罪臣等豈能

安大學士周延儒等亦乞優容帝皆不許遂下刑部廷臣交章申救不納帝疑其未就獄責刑部臣剋期三日定讞侍郎惠世揚徐石麒擬予輕比帝大怒革世揚職鑄石麒二秩郎中以下罪有差御史王漢言杖卜一案日宣等無私陛下懷疑重其罪刑官莫知所執不聽獄上日宣正宸煊戍邊致可壯三謨削籍久之赦還卒

張璋字席之武進人少孤貧取糠糲自給不輕受人一飯爲同里薛敷教所知講學東林書院師孫慎行其學以慎獨研幾爲宗萬厯四十年舉應天鄉試第一越七年成進士授戶部主事調兵部職方歷郎中出爲廣東提學僉事粵俗奢麗督學至宮室供張輿馬餽牽之奉甲他省象犀文石名花珠貝磊砢瓌瓌璣悉屏去弗視也大吏建魏忠賢祠乞上梁文於璋璋卽日引去璋廉歸而布袍草履授徒於家莊烈帝卽位起江西參議歷福建山東副使大學士吳宗達謂璋難進而易退言之吏部召爲尙寶卿進太僕少卿坐事調南京大理丞引疾去久之起應天府丞是歲四方大旱璋以軍食可虞奏請禁江西湖廣遏糴而令應天常鎮淮揚五郡折輸漕糧銀赴彼易米則小民免催科之苦太倉無顆粒之虧他十庫所收銅錫顏料皮布非州縣土產者悉解折色且盡改民解爲官解以救民湯火所司多議行遷南京光祿卿召入爲右僉都御史遷左副都御史時劉宗周金光辰並總憲紀璋乃上風勵臺班疏曰懲往正以監來今

極貪則原任巡按蘇松御史王志舉極廉則原任南京試御史成勇勇與臣曾不相家居聞勇被逮士民泣送者萬輩百里不休後入南都始知勇在臺不濫聽一辭不輕贖一錢不受屬吏一疏一果杰紳悍吏爲民害者不少假借委曲開導民以孝弟臣離南中輒扳轅願借成御史惠我南人雖前奉嚴譴宜召爲諸御史勸疏上一時稱快詔下志舉法司逮治成勇敢用璋旋以病謝歸未幾卒福王時贈左都御史謚清惠金光辰字居垣全椒人崇禎元年進士授行人擢御史巡視西城內使周二殺人牒司禮監捕之其人方直御前叩頭乞哀帝曰此國家法朕不得私卒抵罪出按河南條奏至三百餘章彈劾不避權勢九年還朝京師戒嚴光辰分守東直門劾兵部尙書張鳳翼三不可解一大可憂帝以鳳翼方在行間寢其奏時帝久罷內遣然以邊警諸臣類萎腰不任仍分遣中官盧維寧等總監通津臨德等處兵馬糧餉而意頗諱言之光辰疏請罷遣帝怒召對平臺風雨驟至侍臣立雨中至以袖障霽久之帝召光辰責之光辰對曰皇上以文武諸臣無實心任事委任內臣臣愚以任內臣諸臣益弛卸不任帝大怒聲色俱厲將重譴光辰而迅雷直震御座風雨聲大作光辰因言臣往在河南見皇上撤內臣而喜語未終帝沉吟卽云汝言毋復爾然意亦稍解人謂光辰有天幸云時張元佐以兵部右侍郎出守昌平同時內臣提督天壽山者卽日往帝顧閣臣曰內臣卽日往侍臣三日未出朕之用內臣過耶翼日有詔光辰鑄三級調

外久之由浙江按察司照磨召爲大理寺正進太僕丞十三年五月復偕諸大臣召對平臺咨以禦邊救
荒安民之策光辰班最後時已夜光辰獨對燭影中娓娓數百言帝爲聳然聽明日諭諸臣各繕疏以進
尋移尙寶丞陳罷練總換授私派僉報數事報聞歷光祿少卿左通政十五年五月復偕諸臣召對德政
殿備陳賊形勢帝悅擢左僉都御史無何以救劉宗周仍鐫三級調外事具宗周傳明年丁父憂福王時
起故官未赴國變家居二十餘年卒

贊曰明自神宗而後士大夫峻門戶而重意氣其賢者敦厲名檢居官有所執爭卽清議翕然歸之雖其
材識不遠耳目所熟習不能不囿於風會抑亦一時之良也遭時孔棘至救過不暇顧安得責以挽回幹
濟之業哉

明史卷一百五十四終

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

劉宗周

祝淵
王毓著

黃道周

葉廷秀

劉宗周字起東山陰人父坡為諸生母章氏姪五月而坡亡既生宗周家酷貧攜之育外家後以宗周大父老疾歸事之析薪汲水持藥糜然體辱甚母嘗憂念之不置遂成疾又以貧故忍而不治萬曆二十九年宗周成進士母卒於家宗周奔喪為壻室中門外日哭泣其中服闋選人請養大父母遭喪居七年始赴補母以節聞於朝時有崑黨宣黨與東林為難宗周上言東林顧憲成講學處高攀龍劉永澄姜士昌劉元珍皆賢人于玉立丁元薦較然不欺其志有國士風諸臣摘流品可也爭意見不可攻東林可也黨崑宣不可黨人大諱宗周乃請告歸天啟元年起儀制主事疏言魏進忠導皇上馳射戲劇奉聖夫人出入自由一舉逐諫臣三人罰一人皆出中旨勢將指鹿為馬生殺予奪制國家大命今東西方用兵奈何以天下委閣豎乎進忠者魏忠賢也大怒停宗周俸半年尋以國法未伸請戮崔文昇以正弑君之罪戮盧受以正交私之罪戮楊鎬李如楨李維翰鄭之范以正喪師失地之罪戮高出胡嘉棟康應乾牛維

暉劉國籍傳國以正棄城逃潰之罪急起李三才爲兵部尙書錄用清議名賢丁元薦李朴等諍臣楊澹劉重慶等以作仗節徇義之氣帝切責之累遷光祿丞尙寶太僕少卿移疾歸四年起右通政至則忠賢逐東林且盡宗周復固辭忠賢責以矯情厭世削其籍崇禎元年冬召爲順天府尹辭不許明年九月入都上疏曰陛下勵精求治宵旰靡盬然程效太急不免見小利而速近功何以致唐虞之治夫今日所汲汲於近功者非兵事乎誠以屯守爲上策簡卒節餉修刑政而威信布之需以歲月未有不望風東甲者而陛下方銳意中興刻期出塞當此三空四盡之秋竭天下之力以奉饑軍而軍愈驕聚天下之軍以博一戰而戰無日此計之左也今日所規規於小利者非國計乎陛下留心民瘼惻然痼瘵而以司農告匱一時所講求者皆掎克聚斂之政正供不足繼以雜派科罰不足以火耗水旱災傷一切不問敲扑日峻道路吞聲小民至賣妻鬻子以應有司以掎克爲循良而撫字之政絕上官以催徵爲考課而黜陟之法亡欲求國家有府庫之財不可得已功利之見動而廟堂之上日見其煩苛事事糾之不勝糾人人摘之不勝摘於是名實紊而法令滋頌者特嚴賊吏之誅自宰執以下坐重典者十餘人而貪風未盡息所以導之者未善也賈誼曰禮禁未然之先法施已然之後誠導之以禮將人人有士君子之行而無狗彘之心所謂禁之於未然也今一切註誤及指稱賄賂者卽業經昭雪猶從寬議深文巧詆絕天下遷改之

途蓋習爲頑鈍無恥矯飾外貌以欺陛下士節日隳官邪日著陛下亦安能一一察之且陛下所以勞心
焦思於上者以未得賢人君子用之也而所嘉予而委任者率奔走集事之人以摘發爲精明以告訐爲
正直以便給爲才譎又安所得賢者而用之得其人矣求之太備或以短而廢長責之太苛或因過而成
誤且陛下所擊畫動出諸臣意表不免有自用之心臣下救過不給讒諂者因而間之猜忌之端遂從此
起夫恃一人之聰明而使臣下不得盡其忠則耳目有時壅憑一人之莫斷而使諸大夫國人不得衷其
是則意見有時移方且爲內降爲留中何以追喜起之盛乎數十年來以門戶殺天下幾許正人猶憂延
不已陛下欲折君子以平小人之氣用小人以成君子之公前日之覆轍將復見於天下也陛下求治之
心操之太急醞釀而爲功利功利不已轉爲刑名刑名不已流爲猜忌猜忌不已積爲壅蔽正人心之危
所潛滋暗長而不自知者誠能建中立極默正此心使心之所發悉皆仁義之良仁以育天下義以正萬
民自朝廷達於四海莫非仁義之化陛下已一旦躋於堯舜矣帝以爲迂闊然歎其忠未幾都城被兵帝
不視朝章奏多留中不報傳旨辦布囊八百中官競獻馬騾又令百官進馬宗周曰是必有以遷幸動上
者乃詣午門叩頭諫曰國勢強弱視人心安危乞陛下出御皇極門延見百僚明言宗廟山陵在此固守
外無他計俯伏待報自晨迄暮中官傳旨乃退米價騰躍請罷九門稅修賈區以處貧民爲粥以養老疾

嚴行保甲之法人心稍安時樞輔諸臣多下獄者宗周言國事至此諸臣責任使無所逃罪陛下亦宜分
任咎禹湯罪己興也勃焉曩皇上以情面疑羣臣羣臣盡在疑中日積月累結爲陰痞識者憂之今日當
開示誠心爲濟難之本御便殿以延見士大夫以票擬歸閣臣以庶政歸部院以獻可替否予言官不效
從而更置之無坐錮以成其罪乃者朝廷縛文吏如孤雛而視武健士不啻驕子漸使恩威錯置文武皆
不足信乃專任一二內臣閫以外次第委之自古未有宦官典兵不誤國者又劾馬世龍張鳳翼吳阿衡
等罪忤帝意三年以疾在告進祈天永命之說言法天之大者莫過於重民命則刑罰宜當宜平陛下以
重典繩下逆黨有誅封疆失事有誅一切註誤重者杖死輕者謫去朝署中半染赭衣而最傷國體者無
如詔獄副都御史易應昌以平反下吏法司必以鍛鍊爲忠直蒼鷹乳虎接踵於天下矣願體上天好生
之心首除詔獄且寬應昌則祈天永命之一道也法天之大者莫過於厚民生則賦斂宜緩宜輕今者宿
逋見征及來歲預征節節追呼閭閻困敝貪吏益大爲民厲貴州巡按蘇瑗以行李被訐於監司巡方黷
貨何問下吏吸膏吮脂之輩接迹於天下矣願體上天好生之心首除新餉并嚴飭官方則祈天永命之
又一道也然大君者天之宗子輔臣者宗子之家相陛下置輔率由特簡亦願體一人好生之心毋驅除
異己搆朝士以大獄結國家朋黨之禍毋寵利居成功導人主以富強釀天下土崩之勢周延儒溫體仁

見疏不憚以時方禱雨而宗周稱疾指爲僞蹇激帝怒擬旨詰之且令陳足兵足餉之策宗周條畫以對
延儒體仁不能難爲京尹政令一新挫豪家尤力闕人言事輒不應或相詰諍宗周治事自如武清伯蒼
頭歐諸生宗周捶之枷武清門外嘗出見優人籠篋焚之通衢賙恤單丁下戶尤至居一載謝病歸都人
爲罷市八年七月內閣缺人命吏部推在籍者以孫慎行林鈺及宗周名上詔所司敦趨宗周固辭不許
明年正月入都慎行已卒與鈺入朝帝問人才兵食及流寇猖獗狀宗周言陛下求治太急用法太嚴布
令太煩進退天下士太輕諸臣畏罪飾非不肯盡職業故有人而無人之用有餉而無餉之用有將不能
治兵有兵不能殺賊流寇本朝廷赤子撫之有道則還爲民今急宜以收拾人心爲本收拾人心在先寬
宥有司參罰重則吏治壞吏治壞則民生困盜賊由此日繁帝又問兵事宗周言禦外以治內爲本內治修
遠人自服于羽舞而有苗格願陛下以堯舜之心行堯舜之政天下自平對畢趨出帝顧體仁迂其言命
鈺輔政宗周他用旋授工部左侍郎踰月上痛憤時艱疏言陛下銳意求治而二帝三王治天下之道未
暇講求施爲次第猶多未得要領者首屬意於邊功而罪督遂以五年恢復之說進是爲禍胎己巳之役
謀國無良朝廷始有積輕士大夫之心自此耳目參於近侍腹心寄於干城治術尙刑名政體歸叢脞天
下事日壞而不可救廠衛司譏察而告訐之風熾詔獄及士紳而堂廉之等夷人人救過不給而欺罔之

習轉甚事仰成獨斷而諂諛之風日長三尺法不伸於司寇而犯者日衆詔旨雜治五刑歲躬斷獄以數千而好生之德意泯刀筆治絲綸而王言褻誅求及瑣屑而政體傷參罰在錢穀而官愈貪吏愈橫賦愈通敲扑繁而民生瘁嚴刑重斂交困而盜賊日起總理任而臣下之功能薄監視遣而封疆之責任輕督撫無權而將日懦武弁廢法而兵日驕將懦兵驕而朝廷之威令并窮於督撫朝廷勒限平賊而行間日殺良報功生靈益塗炭一旦天牖聖衷撤總監之任重守令之選下弓旌之招收酷吏之威布維新之化方與二三臣工洗心滌慮以聯泰交而不意君臣相遇之難也得一文震孟而以單辭報罷使大臣失和衷之誼得一陳子壯而以過慧坐享使朝亡無吁咈之風此關於國體人心非淺鮮者陛下必體上天生物之心以敬天而不徒倚風雷必念祖宗鑑古之制以率祖而不輕改作以簡要出政令以寬大養人才以忠厚培國脈發政施仁收天下泮渙之人心而且邇內廷掃除之役正懦帥失律之誅慎天潢改授之途遣廷臣齎內帑巡行郡國爲招撫使赦其無罪而流亡者陳師險隘壁清野聽其窮而自歸誅渠之外猶可不殺一人而畢此役奚待於觀兵哉疏入帝怒甚諭閣臣擬嚴旨再四每擬上帝輒手其疏覆閣起行數周已而意解降旨詰問謂大臣論事宜體國度時不當效小臣歸過朝廷爲名高且獎其清直焉時太僕缺馬價有詔願捐者聽體仁及成國公朱純臣以下皆有捐助又議罷明年朝覲宗周以輸貲

免朝爲大辱國帝雖不悅心善其忠益欲大用體仁患之募山陰人許瑚疏論之謂宗周道學有餘才謂不足帝以瑚同邑知之宜真遂已不用其秋三疏請告去至天津聞都城被兵遂留養疾十月事稍定乃上疏曰己巳之變誤國者袁崇煥一人小人競修門戶之怨異己者槩坐以崇煥黨日造蜚語次第去之自此小人進而君子退中官用事而外廷浸疏文法日繁欺罔日甚朝廷日驩邊防日壞今日之禍實己巳以來釀成之也且以張鳳翼之溺職中樞也而使之專征何以服王治之死以丁魁楚等之失事於邊也而責之戴罪何以服劉策之死諸鎮勤王之師爭先入衛者幾人不聞以逗遛蒙詰責何以服耿如杞之死今且以二州八縣之生靈結一飽颺之局則廷臣之累累若者可幸無罪者又何以謝韓爌張鳳翔李邦華諸臣之或戍或去豈昔爲異己驅除今不難以同己相容隱乎臣於是而知小人之禍人國無已時也昔唐德宗謂羣臣曰人言盧杞奸邪朕殊不覺羣臣對曰此乃杞之所以爲奸邪也臣每三覆斯言爲萬世辨奸之要故曰大奸似忠大佞似信頻年以來陛下惡私交而臣下多以告訐進陛下錄清節而臣下多以曲謹容陛下崇勵精而臣下奔走承順以爲恭陛下尙綜覈而臣下瑣屑吹求以示察凡若此者正似信似忠之類究其用心無往不出於身家利祿陛下不察而用之則聚天下之小人立於朝有所不覺矣天下卽乏才何至盡出中官下而陛下每當緩急必委以大任三協有遺通津臨德有遺又重其

體統等之總督中官總督置總督何地總督無權置撫按何地是以封疆嘗試也且小人每比周小人以相引重君子獨岸然自異故自古有用小人之君子終無黨比小人之君子陛下誠欲進君子退小人決理亂消長之機猶復用中官參制之此明示以左右袒也有明治理者起而爭之陛下卽不用其言何至并逐其人而御史金光辰竟以此逐若惟恐傷中官心者尤非所以示天下也至今日刑政之最舛者成德傲吏也而以賊戍何以肅懲貪之令申紹芳十餘年監司也而以莫須有之鐵刺戍何以昭抑競之典鄭鄮之獄或以誣告坐何以示敦倫之化此數事者皆爲故輔文震孟引繩批根卽向驅除異己之故智而廷臣無敢言陛下亦無從知之也嗚呼八年之間誰秉國成而至於此是臣不能爲首揆溫體仁解矣語曰誰生厲階至今爲梗體仁之謂也疏奏帝大怒體仁又上章力詆遂斥爲民十四年九月吏部缺左侍郎廷推不稱旨帝臨朝而嘆謂大臣劉宗周清正敢言可用也遂以命之再辭不得乃趨朝道中進三劄一曰明聖學以端治本二曰躬聖學以建治要三曰重聖學以需治化凡數千言帝優旨報之明年八月未至擢左都御史力辭有詔敦趨踰月入見文華殿帝問都察院職掌安在對曰在正己以正百寮必存諸中者可對君父下可質天下士大夫而後百寮則而象之大臣法小臣廉紀綱振肅職掌在是而責成巡方其首務也巡方得人則吏治清民生遂帝曰卿力行以副朕望乃列建道揆貞法守崇國體清伏

奸憊官邪飭吏治大事以獻帝襲納焉俄劾御史喻上獄嚴雲京而薦袁愷成勇帝並從之其後上獄受
李自成顯職卒爲世大詬冬十月京師被兵請旌死事盧象昇而追戮誤國奸臣楊嗣昌逮跋扈悍將左
良玉防關以備反攻防潞以備透渡防通津臨德以備南下帝不能盡行閏月晦日召見廷臣於中左門
時姜採熊開元以言事下詔獄宗周約九卿共救入朝聞密旨置二人死宗周愕然謂衆曰今日當空署
爭必改發刑部始已及入對御史楊若橋薦西洋人湯若望善火器請召試宗周曰邊臣不講戰守屯戍
之法專持火器近來陷城破邑豈無火器而然我用之制人人得之亦可制我不見河間反爲火器所破
乎國家大計以法紀爲主大帥跋扈援師逗遛奈何反姑息爲此紛紛無益之舉耶因議督撫去留則請
先去督師范志完且曰十五年來陛下處分未當致有今日敗局不追禍始更絃易轍欲以一切苟且之
政補目前罅漏非長治之道也帝變色曰前不可追善後安在宗周曰在陛下開誠布公公天下爲好惡
合國人爲用舍進賢才開言路次第與天下更始帝曰目下烽火逼畿甸且國家敗壞已極當如何宗周
曰武備必先練兵練兵必先選將選將必先擇賢督撫擇賢督撫必先吏兵二部得人宋臣曰文官不愛
錢武官不惜死則天下太平斯言今日鍼砭也論者但論才望不問操守未有操守不謹而遇事敢前軍
士畏威者若徒以議論捷給舉動恢張稱曰才望取爵位則有餘責事功則不足何益成敗哉帝曰濟變

之日先才後守宗周曰前人敗壞皆由貪縱使然故以濟變言愈宜先守後才帝曰大將別有才局非徒操守可望成功宗周曰他不具論如范志完操守不謹大將偏裨無不由賄進所以三軍解體由此觀之操守爲主帝色解曰朕已知之敕宗周起於是宗周出奏曰陛下下方下詔求賢姜採熊開元二臣遽以言得罪國朝無言官下詔獄者有之自二臣始陛下度量卓越妄如臣宗周憇直如臣黃道周尙蒙使過之典二臣何不幸不邀法外恩帝曰道周有學有守非二臣比宗周曰二臣誠不及道周然朝廷待言官有體言可用之不可置之卽有應得之罪亦當付法司今遽下詔獄終於國體有傷帝怒甚曰法司錦衣皆刑官何公何私且罪一二言官何遽傷國體有如貪賊壞法欺君罔上皆可不問乎宗周曰錦衣膏粱子弟何知禮義聽寺人役使卽陛下問貪賊壞法欺君罔上亦不可不付法司也帝大怒曰如此偏黨豈堪憲職有間曰開元此疏必有主使疑卽宗周金光辰爭之帝叱光辰并命議處翼日光辰貶三秩調用宗周革職刑部議罪閣臣持不發捧原旨御前懇救乃免斥爲民歸二年而京師陷宗周徒步荷戈詣杭州責巡撫黃鳴駿發喪討賊鳴駿誠以鎮靜宗周勃然曰君父變出非常公專閫外不思枕戈泣血激勵同仇顧藉口鎮靜作遜避計耶鳴駿唯唯明日復趣之鳴駿曰發喪必待哀詔宗周曰嘻此何時也安所得哀詔哉鳴駿乃發喪問師期則曰甲仗未具宗周嘆曰嗟乎是烏足與有爲哉乃與故侍郎朱大典故

給事中章正宸熊汝霖召募義旅將發而福王監國於南京起宗周故官宗周以大仇未報不敢受職自稱草莽孤臣疏陳時政言今日大計會討賊復仇無以表陛下渡江之心非毅然決策親征無以作天下忠義之氣一曰據形勝以規進取江左非偏安之業請進圖江北鳳陽號中都東扼徐淮北控豫州西顧荆襄而南去金陵不遠請以駐親征之師大小銓除暫稱行在少存臣子負罪引慝之心從此漸進秦晉燕齊必有響應而起者一曰重藩屏以資彈壓淮揚數百里設兩節鉞不能禦亂爭先南下致江北一塊土拱手授賊督漕路振飛坐守淮城久以家屬浮舟遠地是倡之逃也於是鎮臣劉澤清高傑遂有家屬寄江南之說軍法臨陣脫逃者斬臣謂一撫二鎮皆可斬也一曰慎爵賞以肅軍情請分別各帥封賞孰當孰濫輕則收侯爵重則奪伯爵夫以左帥之恢復而封高劉之敗逃亦封又誰不當封者武臣既濫文臣隨之外臣既濫中璫隨之恐天下聞而解體也一曰核舊官以立臣紀燕京既破有受僞官而叛者有受僞官而逃者有在封守而逃者有奉使命而逃者法皆不赦亟宜分別定罪爲戒將來至於僞命南下徘徊順逆之間實繁有徒必且倡爲曲說以惑人心尤宜誅絕又言當賊入秦流晉漸過畿南遠近洶洶獨大江南北晏然而二三督撫不聞遣一騎以壯聲援賊遂得長驅犯闕坐視君父之危亡而不救則封疆諸臣之當誅者一凶問已確諸臣奮戈而起決一戰以贖前愆自當不俟朝食方且仰聲息於南中爭

言固圉之策卸兵權於閩外首圖定策之功則封疆諸臣之當誅者又一新朝既立之後謂宜不俟終日首遣北伐之師不然則亟馳一介問道北進檄燕中父老起塞上名王哭九廟曆梓宮訪諸王更不然則起閩帥鄭芝龍以海師下直沽九邊督鎮合謀共奮事或可爲而諸臣計不出此則舉朝謀國不忠之當誅者又一罪廢諸臣量從昭雪自應援先帝遺詔及之今乃槩用新恩誅闕定案前後詔書鶻突勢必彪虎之類盡從平反而後已則舉朝謀國不忠之當誅者又一臣謂今日問罪當自中外諸臣不職者始詔納其言宣付史館中外爲悚動而馬士英高傑劉澤清恨甚滋欲殺宗周矣宗周連疏請告不得命遂抗疏劾士英言陛下龍飛淮甸天寶予之乃有扈蹕微勞入內閣進中樞宮銜世廕晏然當之不疑者非士英乎於是李沾侈言定策挑激廷臣矣劉孔昭以功賞不均發憤冢臣朝端譁然聚訟而羣陰且翩翩起矣借知兵之名則逆黨可以然灰寬反正之路則逃臣可以汲引而閣部諸臣且次第言去矣中朝之黨論方興何暇圖河北之賊立國之本紀已疏何以言匡攘之略高傑一逃將也而奉若驕子浸有尾大之憂淮揚失事不難譴撫臣道臣以謝之安得不長其桀驁則亦恃士英羽翼也劉黃諸將各有舊汎地而置若奕棋洵洵爲連雞之勢至分割江北四鎮以慰之安得不啟其雄心則皆高傑一人倡之也京營自祖宗以來皆勳臣爲政樞貳佐之陛下立國伊始而有內臣盧九德之命則士英有不得辭其責者總之

兵戈盜賊皆從小人氣類感召而生而小人與奄宦又往往相表裏自古未有奄宦用事而將帥能樹功於方域者惟陛下首辨陰陽消長之機出土英仍督鳳陽聯絡諸鎮決用兵之策史可法卽不還中樞亦當自淮而北歷河以南別開幕府與土英相犄角京營提督獨斷寢之書之史冊爲弘光第一美政王優詔答之而促其速入土英大怒卽日具疏辭位且揚言於朝曰劉公自稱草莽孤臣不書新命明示不臣天子也其私人朱統鑣遂劾宗周疏請移蹕鳳陽鳳陽高牆所在欲以罪宗處皇上而與史可法擁立潞王其兵已伏丹陽當急備而澤清傑日夜謀所以殺宗周者不得乃遣客十輩往刺宗周宗周時在丹陽終日危坐未嘗有惰容客前後至者不敢加害而去而黃鳴駿入覲兵抵京口與防江兵相擊鬪土英以統鑣言爲信也亦震恐於是澤清疏劾宗周陰撓恢復欲誅臣等激變士心召生靈之禍劉良佐亦具疏言宗周力持三案爲門戶主盟倡議親征圖晁錯之自爲居守司馬懿之閉城拒君疏未下澤清復草一疏署傑良佐及黃得功名上之言宗周勸上親征謀危君父欲安置陛下於烽火凶危之地蓋非宗周一人之謀妾曰廣吳姓合謀也曰廣心雄膽大翊戴非其本懷故陰結死黨翦除諸忠然後迫劫乘輿遷之別郡如姓宗周入都臣等卽渡江赴闕面訐諸奸正春秋討賊之義疏入舉朝大駭傳諭和衷集事宗周不得已以七月十八日入朝初澤清疏出遣人錄示傑傑曰我輩武人乃預朝事卽得功疏辨臣不預聞

士英寢不奏可法不平遣使徧詣諸鎮咸云不知遂據以入告澤清輩由是氣沮士英既嫉宗周益欲去之而薦阮大鍼知兵有詔冠帶陞見未幾中有特授兵部添注右侍郎宗周曰大鍼進退係江左興亡老臣不敢不一爭之不聽則亦將歸爾疏入不聽宗周遂告歸詔許乘傳將行疏陳五事一曰修聖政毋以近娛忽遠猷國家不幸遭此大變今紛紛制作似不復有中原志者土木崇矣珍奇集矣俳優雜劇陳矣內豎充廷金吾滿座戚畹駢闐矣讒夫昌言路扼官常亂矣所謂狃近娛而忽遠圖也一曰振王綱無以主恩傷臣紀自陛下卽位中外臣工不曰從龍則曰佐命一推恩近侍則左右因而秉權再推恩大臣則閣部可以兼柄三推恩勳舊則陳乞至今未已四推恩武弁則疆場視同兒戲表裏呼應動有藐視朝廷之心彼此雄長卽爲犯上無等之習禮樂征伐漸不出自天子所謂喪主恩而傷臣紀也一曰明國是無以邪鋒危正氣朋黨之說小人以加君子釀國家空虛之禍先帝末造可鑒也今更爲一二元惡稱寃至諸君子後先死於黨死於徇國者若有餘戮揆厥所由止以一人進用動引三朝故事排抑舊人私交重君父輕身自樹黨而坐他人以黨所謂長邪鋒而危正氣也一曰端治術無以刑名先教化先帝頗尙刑名而殺機先動於溫體仁殺運日開怨毒滿天下近如貪吏之誅不經提問遽科罪名未科罪名先追贓罰假令有禹好善之巡方借成德以媚權相又孰辨之又職方戎政之奸弊道路嘖有煩言雖衛臣有不

敢問者則厥備之設何爲徒令人主虧至德傷治體所謂急刑名而忘教化也一曰固邦本毋以外憂醜
內憂前者淮揚告變未幾而高黃二鎮治兵相攻四鎮額兵各三萬不以殺敵而自相屠毒又日煩朝廷
講和何爲者夫以十二萬不殺敵之兵索十二萬不殺敵之餉必窮之術耳不稍裁抑惟加派橫征蓄一
二蒼鷹乳虎之有司以天下徇之已矣所謂積外憂而釀內憂也優詔報聞明年五月南都亡六月潞王
降杭州亦失守宗周方食推案慟哭自是遂不食移居郭外有勸以文謝故事者宗周曰北都之變可以
死可以無死以身在田里尙有望於中興也南都之變主上自棄其社稷尙曰可以死可以無死以俟繼
起有人也今吾越又降矣老臣不死尙何待乎若曰身不在位不當與城爲存亡獨不當與土爲存亡乎
此江萬里所以死也出辭祖墓舟過西洋港躍入水中水淺不得死舟人扶出之絕食二十三日始猶進
茗飲後勺水不下者十三日與門人問答如平時閏六月八日卒年六十有八其門人徇義者有祝淵王
毓著淵字開美海寧人崇禎六年舉於鄉自以年少學未充棲峰巔僧舍讀書三年山僧罕見其面十五
年冬會試入都適宗周廷諍姜琛熊開元削籍淵抗疏曰宗周慙直性成忠孝天授受任以來蔬食不飽
終宵不寢圖報國恩今四方多難貪墨成風求一清剛臣以司風紀孰與宗周宗周以迂戇斥繼之者必
洪烈宗周以偏執斥繼之者必便捷洪烈便捷之夫進必且營私納賄顛倒貞邪乞收還成命復其故官

天下幸甚帝得疏不憚停淵會試下禮官議淵故不識宗周既得命往謁宗周曰子爲此舉無所爲而爲之乎抑動於名心而爲之也淵爽然避席曰先生名滿天下誠恥不得列門牆爾願執贄爲弟子明年從宗周山陰禮官議上逮下詔獄詰主使姓名淵曰男兒死卽死爾何聽人指使爲移刑部進士共疏出淵未幾都城陷營死難太常少卿吳麟徵喪歸其柩詣南京刑部竟前獄尙書諭止之上疏請誅奸輔還政司抑不奏給事中陳子龍疏薦淵及待詔涂仲吉義士可爲臺諫仲吉者漳浦人以諸生走萬里上書明黃道周寃得罪杖譴者也不許宗周罷官家居淵數往問學嘗有過入曲室長跪流涕自撾杭州失守淵方葬母趣竣工旣葬還家設祭卽投繯而卒年三十五也踰二日宗周餓死毓著字元趾會稽人爲諸生跌宕不羈已受業宗周之門同門生成非笑之杭州不守宗周絕粒未死毓著上書曰願先生早自裁毋爲王炎午所弔俄一友來視毓著曰子若何曰有陶淵明故事在毓著曰不然吾輩聲色中人慮久則難持也一日遍召故交歡飲伶人奏樂酒罷攜燈出門投柳橋下先宗周一月死鄉人私謚正義先生宗周始受業於許孚遠已入東林書院與高攀龍輩講習馮從吾首善書院之會宗周亦與焉越中自王守仁後一傳爲王畿再傳爲周汝登陶望齡三傳爲陶爽齡皆雜於禪爽齡講學白馬山爲因果說去守仁益遠宗周憂之築證人書院集同志講肄且死語門人曰學之要誠而已主敬其功也敬則誠誠則天良知

之說鮮有不流於禪者宗周在官之日少其事君不以面從爲敬入朝雖處暗室不敢南嚮或訊大獄會大議對明旨必却坐拱立移時或謝病徒步家居布袍粗飯樂道安貧聞召就道嘗不能具冠裳學者稱念臺先生子沟字伯繩

黃道周字幼平漳浦人天啟二年進士改庶吉士授編修爲經筵展書官故事必膝行前道周獨否魏忠賢目攝之未幾內艱歸崇禎二年起故官進右中允三疏救故相錢龍錫降調龍錫得減死五年正月方侯補遺疾求去瀕行上疏曰臣自幼學易以天道爲準上下載籍二千四百年考其治亂百不失一陛下御極之元年正當師之上九其爻云大君有命開國承家小人勿用陛下思賢才不遽得懲小人不易絕蓋陛下有大君之實而小人懷干命之心臣入都以來所見諸大臣皆無遠猷動尋苛細治朝亡者以督責爲要談治邊疆者以姑息爲上策序仁義道德則以爲迂昧而不經奉刀筆簿書則以爲通達而知務一切磨勘則萬藤終年一意不調而株連四起陛下欲整頓紀綱斥攘外患諸臣用之以滋章法令摧折縉紳陛下欲剔弊防奸懲一警百諸臣用之以借題修隙斂怨市權且外廷諸臣敢誑陛下者必不在拘繫守文之士而在權力謬巧之人內廷諸臣敢誑陛下者必不在錐刀泉布之微而在阿柄神叢之大惟陛下超然省覽旁稽載籍自古迄今決無數米量薪可成遠大之猷吹毛數睫可奏三五之治者彼小人

見事智每短於事前言每多於事後不救凌園而謂凌城必不可築不理島民而謂島衆必不可用兵逃於久頓而謂亂生於無兵餉糜於漏卮而謂功銷於無餉亂視熒聽浸淫相欺馴至極壞不可復挽臣竊危之自二年以來以察去弊而弊愈多以威創頑而威滋殫是亦反申商以歸周孔捐苛細以崇惇大之時矣帝不憚摘葛藤株連數語令具陳道周上言曰邇年諸臣所目營心計無一實爲朝廷者其用人行事不過推求報復而已自前歲春月以後盛談邊疆實非爲陛下邊疆乃爲逆璫而翻邊疆也去歲春月以後盛言科場實非爲陛下科場乃爲仇隙而翻科場也此非所謂葛藤株連乎自古外患未弭則大臣一心以憂外患小人未退則大臣一心以憂小人今獨以遺君父而大臣自處於催科比較之末行事而事失則曰事不可爲用人而人失則曰人不足用此臣所謂舛也三十年來釀成門戶之禍今又取縉紳稍有器識者舉網投阱卽緩急安得一士之用乎凡絕餌而去者必非鱸魚戀棧而來者必非駿馬以利祿象士則所象者必嗜利之臣以箠楚驅人則就驅者必駑駘之骨今諸臣之才具心術陛下其知之矣知其爲小人而又以小人矯之則小人之焰益張知其爲君子而更以小人參之則君子之功不立天下總此人才不在廊廟則在林藪臣所知識者有馬如蛟毛羽健任贊化所聞習者有惠世揚李邦華在仕籍者有徐良彥曾纓朱大典陸夢龍鄒嘉生皆卓犖駿偉使當一面必有可觀語皆刺大學士周延儒溫

體仁帝益不懌斥爲民九年用薦召復故官明年閏月久旱修省道周上言近者中外齋宿爲百姓請命而五日內繫兩尙書未聞有人申一疏者安望其戡亂除凶贊平明之治乎陛下焦勞於上小民展轉於下而諸臣括囊其間稍有人心宜不至此又上疏曰陛下寬仁弘宥有身任重寄至七八載罔效擁權自若者積漸以來國無是非朝無枉直中外臣工率苟且圖事誠可痛憤然其視聽一係於上上急催科則下急賄賂上樂鏗覈則下樂巉險上喜告訐則下喜誣陷當此南北交訌奈何與市井細民申勃谿之談修睚眦之隙乎時體仁方招奸人構東林復社之獄故道周及之旋進右諭德掌司經局疏辭因言己有三罪四恥七不如三罪四恥以自責七不如者謂品行高峻卓絕倫表不如劉宗周至性奇情無愧純孝不如倪元璐湛深大慮遠見深計不如魏呈潤犯言敢諫清裁絕俗不如詹爾選吳執御志尙高雅博學多通不如華亭布衣陳繼儒龍溪舉人張燮至圖土曩係之臣朴心純行不如李汝璈傅朝佑文章意氣坎坷磊落不如錢謙益鄭鄮方被杖母大諾帝得疏駭異責以顛倒是非道周疏辯語復營護鄮帝怒嚴旨切責道周以文章風節高天下嚴冷方剛不諧流俗公卿多畏而忌之乃藉不如鄮語爲口實其冬擇東宮講官體仁已罷張至發當國擴道周不與其同官項煜楊廷麟不平上疏推讓道周至發言鄮杖毋明旨煌煌道周自謂不如安可爲元良輔導道周遂移疾乞休不許十一年二月帝御經筵刑部尙書

鄭三俊方下吏講官黃景昉救之帝未許而帝適追論舊講官姚希孟嘗請漕儲全折以爲非道周聽未審謂帝將寬三俊念希孟也因言故輔臣文震孟一生蹇直未蒙帷蓋恩天下士生如三俊歿如震孟希孟求其影似未可多得帝以所對失實責令回奏再奏再請至三奏乃已凡道周所建白未嘗得一俞旨道周顧言不已六月廷推閣臣道周已充日講官遷少詹事得與名帝不用楊嗣昌等五人道周乃草三疏一劾嗣昌一劾陳新甲一劾遼撫方一藻同日上之其劾嗣昌謂天下無無父之子亦無不臣之子衛開方不省其親管仲至比之羆狗李定不喪繼母宋世共指爲人梟今遂有不持兩服坐司馬堂如楊嗣昌者宣大督臣盧象昇以父殯在途搥心飲血請就近推補乃忽有并推在籍守制之旨夫守制者可推則聞喪者可不去聞喪者可不去則爲子者可不父爲臣者可不子即使人才甚乏奈何使不忠不孝者連苞引藁種其不祥以穢天下乎嗣昌在事二年張網溢地之談款市樂天之說才智亦可睹矣更起一不祥之人與之表裏陛下孝治天下縉紳家庭小小勃谿猶以法治之而冒喪數倫獨謂無禁臣竊以爲不可也其論新甲言其守制不終走邪徑託捷足天下卽甚無才未宜假借及此古有忠臣孝子無濟於艱難者決未有不忠不孝而可進乎功名道德之門者也臣二十躬耕手足胼胝以養二人四十餘削籍徒步荷擔二千里不解屣履今雖踰五十非有妻子之奉婢僕之累天下卽無人臣願解清華出管鎖

鑰何必使被棘負塗者祓不祥以玷王化哉其論一漢則力詆和議之非帝疑道周以不用怨望而縉紳勃谿語欲爲鄧鄧脫罪下吏部行譴嗣昌因上言鄧杖母禽獸不如今道周又不如鄧且其意徒欲庇凶徒飾前言之謬立心可知因自乞罷免帝優旨慰之七月五日召內閣及諸大臣於平臺并及道周帝與諸臣語所司事久之問道周曰凡無所爲而爲者謂之天理有所爲而爲者謂之人欲爾三疏適當廷推不用時果無所爲乎道周對曰臣三疏皆爲國家綱常自信無所爲帝曰先時何不言對曰先時猶可不言至簡用後不言更無當言之日帝曰清固美德但不可傲物遂非且惟伯夷爲聖之清若小廉曲謹是廉非清也時道周所對不合指帝屢駁道周復進曰惟孝弟之人始能經綸天下發育萬物不孝不弟者根本既無安有枝葉嗣昌出奏曰臣不生空桑豈不知父母顧念君爲臣綱父爲子綱君臣固在父子前況古爲列國之君臣可去此適彼今則一統之君臣無所逃於天地之間且仁不遺親義不後君難以偏重臣四疏力辭意詞臣中有如劉定之羅倫者抗疏爲臣代請得遂臣志及抵都門聞道周人品學術爲人宗師乃不如鄧鄧帝曰然朕正擬問之乃問道周曰古人心無所爲今則各有所主故孟子欲正人心息邪說古之邪說別爲一教今則直附於聖賢經傳中係世道人心更大且爾言不如鄧鄧何也對曰匡章見棄通國孟子不失禮貌臣言文章不如鄧帝曰章子不得於父豈鄧杖母者比爾言不如豈非朋比

道周曰衆惡必察帝曰陳新甲何以走邪徑託捷足且爾言軟美容悅叩首折枝者誰耶道周不能對但曰人心邪則行徑皆邪帝曰喪固凶禮豈遭凶者卽凶人盡不祥之人道周曰古三年喪君命不過其門自謂凶與不祥故軍禮鑿凶門而出奪情在疆外則可朝中則不可帝曰人既可用何分內外道周曰我朝自羅倫論奪情前後五十餘人多在邊疆故嗣昌在邊疆則可在中樞則不可在中樞猶可在政府則不可止嗣昌一人猶可又呼朋引類竟成一奪情世界益不可帝又詰問久之帝曰少正卯當時亦稱聞人心逆而險行僻而堅言僞而辨順非而澤記醜而博不免聖人之誅今人多類此道周曰少正卯心術不正臣心正無一毫私帝怒有間命出候旨道周曰臣今日不盡言臣負陛下陛下今日殺臣陛下負臣帝曰爾一生學問止成佞耳叱之退道周叩首起復跪奏臣敢將忠佞二字剖析言之夫人在君父前獨立敢言爲佞豈在君父前讒諂面諛爲忠耶忠佞不別邪正淆矣何以致治帝曰固也非朕漫加爾以佞但所問在此所答在彼非佞而何再叱之退顧嗣昌曰甚矣人心偷薄也道周恣肆如此其能無正乎乃召文武諸臣咸聆戒諭而退是時帝憂兵事謂可屬大事者惟嗣昌破格用之道周守經失帝意及奏對又不遜帝怒甚欲加以重罪憚其名高未敢決會劉同升趙士春亦劾嗣昌將予重譴而部擬道周譴顧輕嗣昌懼道周輕則論己者將無已時也亟購人劾道周者有刑部主事張若麒謀改兵部遂阿嗣昌意

上疏曰臣聞人主之尊尊無二上人臣無將將而必誅今黃道周及其徒黨造作語言虧損聖德舉古今未有之好語盡出道周無不可歸過於君父不頒示前日召對始末背公死黨之徒鼓煽以惑四方私記以疑後世揜聖天子正人心息邪說至意大不便帝卽傳諭廷臣毋爲道周劫持相朋黨凡數百言貶道周六秩爲江西按察司照磨而若麒果得兵部久之江西巡撫解學龍薦所部官推獎道周備至故事但下所司帝亦不覆閱而大學士魏照乘惡道周甚則擬旨責學龍濫薦帝遂發怒立削二人籍逮下刑部獄責以黨邪亂政並杖八十究黨與詞連編修黃文煥吏部主事陳天定工部司務董養河中書舍人文震亨並繫獄戶部主事葉廷秀監生涂仲吉救之亦繫獄尙書李覺斯獻輕嚴旨切責再擬謫戍烟瘴帝猶以爲失出除覺斯名移獄鎮撫司掠治乃還刑部獄逾年尙書劉澤深等言二人罪至永戍止矣過此惟論死論死非封疆則貪酷未有以建言者道周無封疆貪酷之罪而有建言蒙戮之名於道周得矣非我聖主覆載之量也陛下所疑者黨耳黨者見諸行事道周抗疏祇託空言一二知交相從罷斥烏覩所謂黨而煩朝廷大法乎且陛下豈有積恨道周萬一聖意轉圜而臣已論定悔之何及仍以原擬請乃永戍廣西十五年八月道周戍已經年一日帝召五輔臣入文華後殿手一編從容問曰張溥張采何如人也皆對曰讀書好學人也帝曰張溥已死張采小臣科道官何亟稱之對曰其胸中自有書科道官以其

用未竟而惜之帝曰亦不免偏時延儒自以嗣昌既已前死矣而已方再入相欲參用公議爲道周地也
卽對曰張溥黃道周皆未免偏徒以其善學故人人惜之帝默然德璟曰道周前日蒙戍上恩寬大獨其
家貧子幼其實可憫帝微笑演曰其事親亦極孝姓曰道周學無不通且極清苦帝不答但微笑而已明
日傳旨復故官道周在途疏謝稱學龍廷秀賢既還帝召見道周道周見帝而泣臣不自意今復得見陛
下臣故有犬馬之疾請假許之居久之福王監國用道周吏部左侍郎道周不欲出馬士英諷之曰人望
在公公不起欲從史可法擁立潞王耶乃不得已趨朝陳進取九策拜禮部尙書協理詹事府事而朝政
日非大臣相繼去國識者知其將亡矣明年三月遣祭告禹陵瀕行陳進取策時不能用甫竣事南都亡
見唐王聿鍵於衢州奉表勸進王以道周爲武英殿大學士道周學行高王敬禮之特甚賜宴鄭芝龍爵
通侯位道周上衆議抑芝龍文武由是不和一諸生上書誡道周迂不可居相位王知出芝龍意下督學
御史撻之當是時國勢衰政歸鄭氏大帥恃恩觀望不肯一出關募兵道周請自往江西圖恢復以七月
敗行所至遠近響應得義旅九千餘人由廣信出衢州十二月進至婺源遇

大清兵戰敗被執至江寧幽別室中囚服著書臨刑過東華門坐不起曰此與高皇帝寢近可死矣監
刑者從之幕下士中書賴雍蔡紹謹兵部主事趙士超等皆死道周學貫古今所至學者雲集銅山在孤

島中有石室道周自幼坐臥其中故學者稱爲石齋先生精天文厯數皇極諸書所著易象正三易洞璣及太函經學者窮年不能通其說而道周用以推驗治亂歿後家人得其小冊自謂終於丙戌年六十二始信其能知來也葉廷秀濮州人天啟五年進士歷知南樂衡水獲鹿三縣入爲順天府推官英國公張惟賢與民爭田廷秀斷歸之民惟賢屬御史袁弘勛駁執如初惟賢訴諸朝帝卒用廷秀奏還田於民崇禎中遷南京戶部主事遭內外艱服闋入都未補官疏陳吏治之弊言催科一事正供外有雜派新增外有暗加額辦外有貼助小民破產傾家安得不爲盜賊夫欲救州縣之弊當自監司郡守始不澄其源流安能潔乃保舉之令行已數年而稱考者希覲是連坐法不可不嚴也帝納之授戶部主事帝以傅永瀆爲吏部尙書廷秀言永瀆庸才不當任統均甫四月永瀆果敗道周逮下獄廷秀抗疏救之帝怒杖百繫詔獄明年冬遣戍福建廷秀受業劉宗周門造詣淵邃宗周門人以廷秀爲首與道周末相識冒死論救獲重罪處之恬然及道周釋還給事中左懋第御史李悅心復相繼論薦執政亦稱其賢道周在途又爲請帝令所司核議已而執政復薦十六年冬特旨起故官會都城陷未赴福王時兵部侍郎解學龍薦道周並及廷秀命以僉都御史用及暹朝馬士英惡之抑授光祿少卿南都覆唐王召拜左僉都御史進兵部右侍郎事敗爲僧以終

贊曰劉宗周黃道周所指陳深中時弊其論才守別忠佞足爲萬世龜鑑而聽者迂而遠之則救時濟變之說惑之也傳曰雖危起居竟信其志猶將不忘百姓之病也二臣有焉殺身成仁不違其素所守豈不卓哉

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉 敕修

崔景榮

黃克纘

畢自嚴

李長庚

王志遠

劉之鳳

崔景榮字自強長垣人萬曆十一年進士授平陽府推官擢御史劾東廠太監張鯨罪巡按甘肅湖廣河南最後按四川積臺資十八年播州亂景榮監大帥劉綎吳廣輩軍縱馳金帛至景榮家為其父壽景榮上疏劾之播州平或請以播北畀安氏景榮不可會總督李化龍憂去景榮為請蠲蜀一歲租卹上東五路罷礦使化龍疏敘監軍功弗及景榮已晉太僕少卿三年滿擢右僉都御史巡撫寧夏銀定素驕歲入掠景榮親督戰破之因議革導賊諸部賞諸部懼請與銀定絕銀定既失導亦叩關求市寧夏歲市費不貲景榮議省之在任三年僅一市而已其後延鎮吉能等挾款求補市卒勿許歲省金錢十餘萬四十一年入為兵部右侍郎總京營戎政改吏部以疾辭去踰年起宣府大同總督召還晉兵部尚書會遼瀋失熊廷弼王化貞議不協命廷臣議經撫去留景榮數為言官所論御史方震孺請罷景榮以孫承宗代之遂引疾歸天啟四年十一月特起為吏部尚書當是時魏忠賢盜國柄羣小更相倚附逐尚書趙南星鄧

家起景榮欲倚爲助比至忠賢飾大宅以待景榮不赴錦衣帥田爾耕來謁又辭不見帝幸太學忠賢欲先一日聽繁酒講議裁諸聽講大臣賜坐賜茶禮又議減考選員額汰京堂添注官景榮皆力持不行浸忤忠賢指又移書魏廣微勸其申救楊漣左光斗廣微不得已爲具揭尋以景榮書爲徵曰景榮教我也是御史倪文煥門克新先後劾景榮陰護東林媚奸邪而邀後福得旨削奪爲民崇禎改元復原職四年卒贈少保

黃克纘字紹夫晉江人萬厯八年進士除壽州知州入爲刑部員外郎累官山東左右布政使就遷右副都御史巡撫其地請停礦稅論劾稅使陳增馬堂他惠政甚著屢以平盜功加至兵部尙書四十年詔以故官參贊南京機務爲御史李若星魏雲中所劾還家候命居三年始履任四十四年冬隆德殿災上疏陳時政語極痛切不報召理京營戎政改刑部尙書預受兩朝顧命李選侍將移宮其內侍王永福姚進忠等八人坐盜乾清宮珠寶下吏克纘擬二人辟餘俱未減帝不從命辟六人餘遣戍克纘言姜昇鄭穩山劉尙理不持一物劉遜拾地上珠還之選侍而與永福進忠同戮輕重失倫況選侍篋中物安知非先朝所賜當是時諸璫罪重謀脫無自惟請帝厚待選侍則獄情自緩於是流言四布謂帝薄待先朝妃嬪而克纘首入其言帝不悅責克纘偏聽命如前旨已楊漣陳移宮始末帝卽宣諭廷臣備述選侍凌虐聖母

狀且曰大小臣工惟私李黨責備朕躬克纘皇恐上言禮父母並尊事有出於念母之誠跡或涉於彰父之過必委曲周全渾然無跡斯爲大孝若謂黨庇李氏責備聖躬臣萬死不敢出御史焦源溥力駁其持論之謬末言羣暨持貲百萬借安選侍爲名妄希脫罪克纘墮其術而不覺克纘奏辨因乞罷略言源溥謂在神宗時爲元子者爲忠爲福藩者非忠臣敢廣之曰神宗旣保護先帝授以大位則爲神考而全其貴妃富貴其愛子者尤忠之大也又謂在先帝時爲二后者爲忠爲選侍者非忠臣亦廣之曰聖母旣正名定位則光昭刑于之令德勿虛傳宮幃之忿爭尤忠之大也若如源溥言必先帝不得正其始聖母不得正其終方可議斯獄耳疏入帝怒甚責以輕肆無忌不諳忠孝克纘皇恐引罪大學士劉一燾等亦代爲言乃已無何給事中董承業孫杰毛士龍御史潘雲翼楊新期南京御史王允成並劾克纘是非舛謬克纘不服言曩不舉李三才故爲諸人所惡源溥復劾克纘借三才以傾言官克纘奏辨再乞休帝不問天啟元年冬加太子太保尋復以兵部尙書協理戎政廷臣議紅丸克纘進藥始末力爲方從哲辨給事中薛文周詆其滅倫常昵私交昧大義克纘憤援春秋不書隱公閔公之弑力詆文周且白選侍無礙聖母事給事中沈惟炳助文周復劾克纘先是帝宣諭百官明言選侍毆崩聖母及惟炳疏上得旨選侍向有觸忤朕一時傳諭不無過激追念皇考豈能忽然於是外議紛紛咸言前此上諭悉出王安矯託而

諸請安選侍者益得藉爲詞蓋是時王安已死魏忠賢方竊柄故前後諭旨牴牾如此克纘歷官中外清
疆有執持議與爭三案者吳攻擊紛起自是羣小排東林創要典率推克纘爲首功時東林方盛克纘移
疾詔加太子太傅乘傳歸四年十二月魏忠賢盡逐東林召克纘爲工部尙書視事數月復移疾歸三殿
成加太子太師崇禎元年起南京吏部尙書有劾之者不就卒於家

畢自巖字景曾淄川人萬厯二十年進士除松江推官年少有才幹徵授刑部主事歷工部員外郎中遷
淮徐道參議內艱闋分守冀寧改河東副使引疾去起洮岷兵備參政以按察使徙治榆林西路進右布
政使泰昌時召爲太僕卿天啟元年四月遼陽覆廷議設天津巡撫專飭海防改自巖右僉都御史以往
置水軍繕戰艦備戎器及熊廷弼建三方布置策天津居其一增設鎮海諸營用戚繼光遺法水軍先習
陸戰軍由是可用魏忠賢令錦衣千戶劉僑逮天津廢將自巖以無駕帖疏論之報聞四方所募兵日逃
亡用自巖言攝其親屬補伍兵部主事來斯行有武略自巖請爲監軍山東白蓮妖賊起令斯行率五千
人往功多初萬厯四十六年遼左用兵議行登萊海運明年二月特設戶部侍郎一人兼右僉都御史出
督遼餉語詳李長庚傳及是長庚遷乃命自巖代敘前平賊功進右都御史兼戶部左侍郎時議省天津
巡撫令督餉侍郎兼領其事卽以委自巖又議討朝鮮自巖言不可遠討當俟請貢輸誠東征効力徐許

其封耳京師數地震因言內批宜慎恩澤宜節人才宜惜內操宜罷誦甚切直自嚴在事數年絲核撙節公私賴之五年以右都御史掌南京都察院明年正月就改戶部尚書忠賢議鬻南太僕牧馬草場助廠工自嚴持不可遂引疾歸崇禎元年召拜戶部尚書自嚴以度支大絀請覈通賦督屯田嚴考成汰冗卒停餉密昌永四鎮新增鹽菜銀二十二萬俱報可二年三月疏言諸邊年例自遼餉外爲銀三百二十七萬八千有奇今餉密諸鎮節省三十三萬尙應二百九十四萬八千統計京邊歲入之數田賦百六十九萬二千鹽課百一十萬三千關稅十六萬一千雜稅十萬三千事例約二十萬凡三百二十六萬五千有奇而逋負相沿所入不滿二百萬卽盡充邊餉尙無贏餘乃京支雜項八十四萬遼東提塘三十餘萬餉遼撫賞十四萬遼東舊餉改新餉二十萬出浮於入已一百十三萬六千況內供召買宣大撫賞及一切不時之需又有出常額外者乞敕下廷臣各陳所見於是廷臣爭效計畫自嚴擇其可者先列上十二事曰增鹽引議鼓鑄括雜稅覈隱田稅寺產核牙行停修倉廩止葺公署南馬協濟崇文鋪稅京運撥兌板木折價已復列上十二事曰增關稅捐公費鬻生祠酌市稅汰冗役核虛冒加抵贖班軍折銀吏胥納班河濱灘蕩京東水田殿工冠帶帝悉允行詔輯賦役全書自嚴言全書之作自行一條鞭始距今已四十五年有一事而此多彼少者其弊爲混派有司聽奸吏暗灑瓜分其弊爲花派當大爲申飭因條八式以

獻帝卽命頒之天下給事中汪始亨極論盜屯損餉之弊自嚴言相沿已久難於覈實請無論軍種民種一照民田起科帝是其議先是忠賢亂政邊餉多缺自嚴給發如期又疏言最耗財者無如客餉諸鎮年例合三百二十七萬而客餉居三之一宜大裁省其次則有撫賞召買修築諸費皆不可不節帝褒納之其冬京師被兵帝憂勞國事旨中夜數發自嚴奏答無滯不敢安寢頭目臃腫事幸無乏明年夏以六罪自劾乞罷優旨慰留先以考滿加太子少保敘遵永克復功再進太子太保兵部尙書梁廷棟請增天下田賦自嚴不能止於是舊增五百二十萬之外更增百六十五萬有奇天下益耗矣已陳時務十事意主利民帝悉採納又以兵餉日增屢請清覈而兵部及督撫率爲寢閣復乞汰內地無用之兵帝卽令嚴飭然不能盡行也御史余應桂劾自嚴殿試讀卷首薦陳于泰乃輔臣周延儒姻婭自嚴引疾乞休疏四上不允時有詔縣令將行取者戶部先覈其錢穀華亭知縣鄭友元已入爲御史先任青浦進金花銀二千九百帝以諸戶部自嚴言友元已輸十之七貯太倉帝令主庫者核實無有帝怒責自嚴自嚴飾詞辨帝益怒遂下自嚴獄遣使逮友元御史李若讜疏救不納踰月給事中吳甘來復抗疏論救帝乃釋之八年五月敘四川平賊功復官致仕又三年卒賜卹如制

李長庚字酉卿麻城人萬曆二十三年進士授戶部主事歷江西左右布政使所在勵清操入爲順天府

尹改右副都御史巡撫山東盡心荒政民賴以蘇盜賊武定諸州縣討禽其渠魁四十六年遼東用兵議行登萊海運長庚初言不便後言自登州望鐵山西北口至羊頭凹歷中島長行島抵北信口又歷兔兒島至深井達蓋州剝運一百二十里抵娘娘宮陸行至廣寧一百八十里至遼陽一百六十里每石費一金部議以爲便遂行之明年二月特設戶部侍郎一人兼右僉都御史出督遼餉駐天津卽以長庚爲之奏行造淮船通津路議牛車酌海道截幫運議錢法設按臣開事例嚴海防九事時議歲運米百八十八萬石豆九十萬石草二千一百六十萬束銀三百二十四萬兩長庚請留金花行改折借稅課言臣考會計錄每歲本色折色通計千四百六十一萬有奇入內府者六百餘萬入太倉者自本色外折色四百餘萬內府六百萬自金花籽粒外皆絲綿布帛蠟茶顏料之類歲久皆朽敗若改折一年無損於上有益於下他若陝西羊絨江浙織造亦當稍停一年濟軍國急帝不悅言金花籽粒本祖宗舊制內供正額及軍官月俸所費不貲安得借留其以今年天津通州江西四川廣西上供稅銀盡充軍費於是戶科給事中官應震上言考會典於內庫則云金花銀國初解南京供武俸諸邊或有急亦取給其中正統元年始自南京改解內庫嗣後除武官俸外皆爲御用是金花銀國初常以濟邊而正統後方供御用也會典於太倉庫則云嘉靖二十二年題準諸處京運錢糧不拘金花籽粒應解內府者悉解貯太倉庫備各邊應用是

世宗朝金花盡充兵餉不知陛下初年何故斂之於內也今不考各邊取給應用之例而反云正供舊額何相左若是至武官月俸歲不過十餘萬乃云所費不貲哉且原數一百萬陛下始增二十萬年深日久顯末都忘以臣計之毋論今年當借卽嗣後年年借用可也毋論未來者當濟邊卽見在內帑者盡還太倉可也若夫物料改折隆慶元年曾行之以解部濟邊六年又行於南京監局亦以濟邊此則祖宗舊制陛下獨不聞耶帝卒不聽時諸事剝始百務全長庚悉辦治天啟二年遷南京刑部尙書就移戶部明年召拜戶部尙書未任以憂歸崇禎元年起工部尙書復以憂去久之代閔洪學爲吏部尙書六年正月修撰陳于泰疏陳時弊宣府監視中官王坤力詆之侵及首輔周延儒長庚率同列上言陛下博覽古今曾見有內臣參論輔臣者否自今以後廷臣拱手屏息豈盛朝所宜有臣等溺職祈立賜譴黜終不忍開內臣輕議朝政之端流禍無窮爲萬世口實帝不憚次日召對平臺時副都御史王志道劾坤語尤切帝責令回奏奏上帝益怒及面對詰責者久之竟削其籍志道漳浦人天啟時爲給事中議三案爲高攀龍所駁謝病歸其後附魏忠賢歷擢左通政論者薄之及是以忤中官罷長庚不植黨援與溫體仁不甚合推郎中王茂學爲眞定知府帝不允復推爲順德知府帝怒責以欺蒙並追咎冠帶監生授職事實令回奏奏上斥爲民家居十年國變久之卒

劉之鳳字離鳴中牟人萬曆四十四年進士歷南京御史天啟三年六月上疏別白孫承宗王象乾閩鳴
奏本末請定去留而撤毛文龍海外軍令居關內又請亟罷內操忤魏忠賢傳旨切責復宣諭廷臣再瀆
奏者罪無赦六年之鳳方視江防期滿奏報忠賢奪其職崇禎二年起故官帝召周延儒燕見宵分始出
之鳳偕同官上疏曰臣等待罪陪京去延儒原籍三百里其立身居鄉不堪置齒頰今乃特蒙眷注必將
曰舉朝盡欺獨延儒一人捐軀爲國使陛下眞若廷臣無可信而延儒乃得翦所忌樹所私日爲馮銓霍
維華等報怨此一召也於國事無纖毫益而於聖德有邱山之損忤旨詰責已復列上五事曰舉謀勇止
援兵練土著密偵探選守令俱見採納累遷刑部侍郎遂代鄧三俊爲本部尙書之鳳以天下囚徒皆五
年一審錄高牆罪獨不與上疏言之報可嘗與左侍郎王命璿召對平臺論律例及獄情帝申飭而退時
有火星之變之鳳特請修刑言自今獄情大者一月奏斷小者半月贓重人犯結案在數年前者大抵本
犯無髓可敲戚屬亦無脂可吸所悉宥免全好生之仁從之然之鳳雖爲此奏其後每上獄詞帝必嚴駁
之鳳懼甚諸司呈稿遲疑不敢遽發屢疏謝病帝不從會尙書范景文劾南京給事中荆可棟貪墨下部
訊之鳳予輕比帝疑其受賄下之吏法司希旨坐絞給事中李清言於律未合同官葛樞復論赦帝怒鑄
樞級調外十三年四月之鳳獄中上書自白無贓賄情可矜原亦置不省竟瘐死計崇禎朝刑部易尙書

十七人薛貞以奄黨抵死蘇茂相半歲而罷王在晉未任改兵部喬允升坐逸囚遣戍韓繼思坐議獄除名胡應台獨得善去馮英被劾遣戍鄭三俊坐議獄逮繫之鳳論絞瘐死獄中甄淑坐納賄下詔獄改繫刑部瘐死李覺斯坐議獄削籍劉澤深卒於位鄭三俊再爲尙書改吏部范景文未任改工部徐石麒坐議獄落職閒住胡應台再召不赴繼其後者張忻賊陷京師與子庶吉士端並降

贊曰崔景榮黃克纘皆不爲東林所與然特不附東林耳方東林勢盛羅天下清流士有落然自異者詬辭隨之矣攻東林者幸其近己也而援以爲重於是中立者類不免蒙小人之玷核人品者乃專以與東林厚薄爲輕重豈篤論哉畢自嚴李長庚計臣中辨治才而自嚴增賦之議識者病焉劉之鳳議獄不當罪止謫罷竟予重比刑罰不中欲求治得乎

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

張鶴鳴

弟鶴騰

董漢儒

在泗論

趙彥

王

王在晉高第

梁廷棟

熊明遇

張鳳翼

陳新甲

馮元颯

兄元颯

張鶴鳴字元平潁州人中萬曆十四年會試父病馳歸越六年始成進士除歷城知縣移南京兵部主事

累官陝西右參政分巡臨鞏以才略聞再遷右僉都御史巡撫貴州自楊應龍平後銷兵太多苗仲所在

為寇鶴鳴言仲賊乃粵西徭種流入黔中自貴陽抵滇人以三萬計若以千四百七十計分即為民合即

為盜又有紅苗環銅仁石阡思州思南四郡數幾十萬而鎮遠清平間大江小江九股諸種皆應龍遺孽

眾萬餘臣部卒止萬三千何以禦賊因列上增兵增餉九議合諸土兵剿洪邊十二馬頭大破紅苗追剿

獠坪賊首老蜡雞據峯巔仰天窩窩有九井地平衍容數千人下通三道各列三關老蜡雞僭王號鶴鳴

奪其關老蜡雞授首撫降餘眾而還尋發兵擊平定廣威平安館諸賊威名甚著遷兵部右侍郎總督陝

西三邊軍務未上轉左侍郎佐理部事時兵事亟兵部增設二侍郎而鶴鳴與祁伯裕王在晉並臥家園

不赴至天啟元年遼陽破兵事益亟右侍郎張經世督援師出關部中遂無侍郎言官請趣鶴鳴等章數十上帝乃尅期令兵部馬上督催鶴鳴等始履任至則論平苗功進本部尙書視侍郎事尙書王象乾出督薊遼軍務鶴鳴遂代其位給事中韋蕃請留象乾出鶴鳴督師忤旨謫外時熊廷弼經略遼東性剛貞氣好謾罵凌轢朝士鶴鳴與相失事多齟齬獨喜巡撫王化貞化貞本庸才好大言鶴鳴主之所奏請無不從令無受廷弼節度中外皆知經撫不和必誤封疆而鶴鳴化貞愈篤卒致疆事大壞二年正月廷議經撫去留給事中惠世揚周朝瑞議以鶴鳴代廷弼其他多言經撫宜並任鶴鳴獨毅然主撤廷弼專任化貞議甫上化貞已棄廣寧遁鶴鳴內慙且懼罪乃自請行邊詔加太子太保賜蟒玉及尙方劍鶴鳴憚行逗遛十七日始抵山海關至則無所籌畫日下令捕問諜厚嗽蒙古炒花宰賽諸部而已初廣寧敗書聞廷臣集議兵事鶴鳴盛氣言廷弼自解給事中劉弘化首論之坐奪俸御史江秉謙何薦可繼劾並貶官廷臣益憤御史謝文錦給事中惠世揚周朝瑞蕭良佐侯震陽熊德陽等交章極論請用世宗戮丁汝夔神宗逮石星故事與化貞並按鶴鳴抵言廷弼債疆事由故大學士劉一燝尙書周嘉謨黨庇不令出關所致因誡言者爲一燝鷹犬且曰祖宗故事大司馬不以封疆蒙功罪於是朝瑞等復合疏劾之御史周宗文亦列其八罪帝不問鶴鳴遷延數月謝病歸六年春魏忠賢勢大熾起鶴鳴南京工部尙書尋以

安邦彥未滅鶴鳴先有平苗功改兵部尙書總督貴州四川雲南湖廣廣西軍務賜尙方劍功未就莊烈帝嗣位給事中瞿式耜胡永順萬鵬以鶴鳴由忠賢進連章擊之鶴鳴求去詔加太子太師乘傳歸崇禎八年流賊陷潁州執鶴鳴倒懸於樹罵賊死年八十五弟鶴騰字元漢舉萬厯二十三年進士歷官雲南副使行誼醇篤譽過其兄城陷被執罵不絕口而死

董漢儒開州人萬厯十七年進士授河南府推官入爲戶部主事疏陳減織造裁冒濫諸事且曰邇來九闈三殿間惟聞縱酒淫刑黷貨時事可憂不止國計日絀已也不報朝鮮再用兵以郎中出理餉務尋遷山東僉事進副使歷湖廣左右布政使所在有聲四十年就拜右副都御史巡撫其地帝賜福王莊田責湖廣四千四百餘頃漢儒以無所得田請歲輸萬金代租不聽楚宗五十餘人訐假王事獲罪囚十載漢儒力言王假也請釋繫者又爲滿朝薦卞孔時等乞宥俱不報憂歸光宗立召拜工部右侍郎旋改兵部總督宣府大同山西軍務天啟改元遼陽失簡精卒二千入衛詔褒之明年秋以左侍郎協理戎政未上擢兵部尙書時遼地盡亡漢儒請逮治諸降將劉世勛等二十九人家屬立誅逃將蔡汝賢等報可毛文龍居海外屢以虛言誑中朝登萊巡撫袁可立每代爲奏請漢儒言文龍計畫疎虛聲未可長恃又請誅逃將管大藩張思任孟淑孔等語甚切帝命逮治思任等而大藩卒置不問諸鎮援遼軍多逃逸有出塞

投插部者漢儒請捕獲立誅同伍相禽捕者重賞且給餉以時則逃者自少帝亦嘉納奄人王體乾宋晉魏忠賢等十二人有舊勞命所廢錦衣官皆予世襲漢儒據祖制力爭帝不從給事中程註御史汪泗論等合疏諫給事中朱大典周之綱御史宋師襄胡良機特疏繼之卒不納漢儒旋以母喪歸後忠賢大橫漢儒服闋遂不召追敘甘肅功卽家進太子太保廢子錦衣百戶卒贈少保諡肅敏汪泗論字自魯休寧人祖垣嘉靖中進士歷官福建兵備僉事分守福寧倭犯同安垣釋重囚七人爲軍鋒擊倭却之捷聞賚金幣泗論中萬厯三十八年進士授漳浦知縣調福清有惠政清屯田繕城堡徵擢御史首請杜內批以嚴履霜之漸又請召還科臣楊漣等以作士氣巡按江西敦重持大體奸宄肅然宗人祿不給疏以橋稅贖錢存留接濟厯太僕寺少卿嘗識黃道周於諸生中人服其精鑒

趙彥膚施人萬厯十一年進士授行人屢遷山西左布政使光宗嗣位以右僉都御史巡撫山東遼陽旣失彥請增兵戍諸島特設大將登州登萊設鎮自此始天啟二年廣寧復失彥以山東南北咽喉列上八事詔多允行先是薊州人王森得妖狐異香倡白蓮教自稱聞香教主其徒有大小傳頭及會主諸號蔓延畿輔山東山西河南陝西四川森居灤州石佛莊徒黨輸金錢稱朝貢飛竹籌報機事一旦數百里萬厯二十三年有司捕繫森論死用賄得釋乃入京師結外戚中官行教自如後森徒李國用別立教用符

睨石鬼兩教相仇事盡露四十二年森復爲有司所播越五歲斃於獄其子好賢及鍾野徐鴻儒武邑于弘志輩踵其教徒黨益衆至是好賢見遼東盡失四方奸民思逞與鴻儒等約是年中秋並起兵會謀洩鴻儒遂先期反自號中興福烈帝稱大成興勝元年用紅巾爲識五月戊申陷鄆城俄陷鄒滕嶧衆至數萬時承平久郡縣無守備山東故不置重兵彥任都司楊國棟廖棟而檄所部練民兵增諸要地守卒請留京操班軍及廣東援遼軍以備征調薦起故大同總兵官楊肇基爲山東總兵官討賊賊乘肇基未至襲兗州爲滋陽知縣楊炳所却棟等擊敗賊復鄆城其別部犯鉅野知縣趙延慶固守不下國棟兵至敗之又敗其犯兗州者遂偕棟等合攻鄒縣兵潰遊擊張榜戰死賊遂圍曲阜郯城旋敗去遂復嶧縣七月彥視師兗州甫出城遇賊萬餘彥繼入城肇基急迎戰而令國棟及棟夾擊大敗之橫河時賊精銳聚鄒滕中道彥欲攻鄒滕副使徐從治曰攻鄒滕難下不如擣其中堅兩城可圖也彥乃與肇基令遊兵綴賊鄒城而以大軍擊賊精銳於黃陰紕王城大敗賊感而殪之嶧山遂圍鄒大小數十戰城未下令天津僉事來斯行及國棟等乘間復滕縣國棟又大破賊沙河乃築長圍以攻鄒鴻儒抗守三月食盡賊黨盡出降鴻儒單騎走被禽撫其衆四萬七千餘人彥乃紀績告廟獻俘磔鴻儒於市鴻儒躡山東二十年徒黨不下一百萬至是始伏誅于弘志亦於是年六月據武邑白家屯將取景州應鴻儒斯行方赴援山東還

軍計之弘志突圍走爲諸生葉廷珍所獲凡舉事七日而滅好賢亦捕得伏誅彥已加兵部侍郎論功進尚書兼右副都御史再加太子太保廕子錦衣世僉事資銀幣加等奏請振濟且捐鄒滕賦三年鄆城嶧滋陽曲阜一年鉅野半之皆報許三年八月召代董漢儒爲兵部尚書極陳邊將尅餉役軍虛伍占馬諸弊因條列綜核事宜帝稱善立下諸邊舉行參將王楹行邊爲哈刺慎部襲殺彥請覈實論罪并赦諸邊撫賞毋增故額有傳我

大清兵欲入喜峯口者彥憂之畫上八事帝皆褒納楊漣劾魏忠賢二十四罪彥亦抗疏劾之自是爲忠賢所惡貴州征苗兵屢敗彥列八策以獻詔頒示軍中彥有籌略曉暢兵事然征妖賊時諸將多殺良民冒功而其子官錦衣頗招搖都市給事御史交劾之彥三疏乞罷忠賢挾前憾令乘傳歸子削籍初妖賊興遼東經略王在晉遣兵助討彥敘功不及在晉在晉憾之至是爲南京吏部數詆彥給事中袁玉佩遂劾彥冒功濫廕且言京觀不當築詔削其世廕並京觀毀之尋追敘兵部時邊功卽家進太子太傅未幾卒

王洽字和仲臨邑人萬曆三十二年進士歷知東光任邱服闋補長垣洽儀表頌偉危坐堂上吏民望之若神明其廉能爲一方最擢吏部稽勳主事歷考功文選郎中天啟初諸賢彙進洽有力焉遷太常少卿

三年冬以右僉都御史巡撫浙江治本趙南星所引及魏忠賢逐南星治乞罷不許五年四月御史李應公希忠賢指劾治遂奪職閒住崇禎元年召拜工部右侍郎攝部事兵部尙書王在晉罷帝召見羣臣奇治狀貌卽擢任之上疏陳軍政十事曰嚴債帥修武備核實兵衡將材覈欺蔽懲賸削勤訓練釐積蠹異才弭盜賊帝並襲納宣大總督王象乾與大同巡撫張宗衡爭插漢款戰事帝召諸大臣平臺請問良久治及諸執政並主象乾策定款議詳見象乾宗衡傳尋上言祖宗養兵百萬不費朝廷一錢屯田是也今遼東永平天津登萊沿海荒地及寶坻香河豐潤玉田三河順義諸縣閒田百萬頃元虞集有京東水田之議本朝萬厯初總督張佳允巡撫張國彥行之薊鎮爲豪右所阻其後巡撫汪應蛟復行之河間今已墾者荒未墾者置不問遺天施地生之利而日講生財之術爲養軍資不大失策乎乞敕諸道監司遵先朝七分防操三分屯墾之制實心力行庶國計有裨軍食無缺帝稱善卽命行之嘗奏次年深武弁無薦者四十八人以邊才舉監司楊嗣昌梁廷棟後皆大用二年十月我大清兵由大安口入都城戒嚴治急徵四方兵入衛督師袁崇煥巡撫解經傳郭之琮總兵官祖大壽趙率教滿桂侯世祿尤世威曹鳴雷等先後至不能拒

大清兵遂深入帝憂甚十一月召對廷臣侍郎周延儒言本兵備禦疎忽調度乖張檢討項煜繼之且曰

世宗斬一丁汝襲將士震悚強敵宵遁帝頷之遂下治獄以左侍郎申用懋代明年四月治竟病死尋論罪復坐大辟治清修伉直雅負時望而應變非所長驟逢大故以時艱見絀遵化陷再日始得報帝怒其偵探不明又以廷臣玩愒擬用重典故於治不少貸厥後都城復三被兵樞臣咸獲免人多爲治惜之在晉字明初太倉人萬曆二十年進士授中書舍人自部曹歷監司由江西布政使擢巡撫山東右副都御史進督河道泰昌時遷添設兵部左侍郎天啟二年署部事三月遷兵部尚書兼右副都御史經略遼東薊鎮天津登萊代熊廷弼八月改南京兵部尚書尋請告歸五年起南京吏部尚書尋就改兵部崇禎元年召爲刑部尚書未幾遷兵部坐張慶臻改敕書事削籍歸卒高第字登之灤州人萬曆十七年進士歷官兵部尚書經略薊遼未數月以恆怯劾罷去崇禎二年冬

大清兵破灤州第竄免

梁廷棟鄆陵人父克從太常少卿廷棟舉萬曆四十七年進士授南京兵部主事召改禮部歷儀制郎中天啟五年遷撫治西寧參議七年調永平兵備副使督撫以下爲魏忠賢建祠廷棟獨不往乞終養歸崇禎元年起故官分巡口北道明年加右參政十一月

大清兵克遵化巡撫王元雅自縊卽擢廷棟右僉都御史代之廷棟請賜對面陳方略報可未幾督師袁

崇煥下獄復擢廷棟兵部右侍郎兼故官總督薊遼保定軍務及四方援軍廷棟有才知兵奏對明爽帝心異之三年正月兵部尙書申用懋罷特召廷棟掌部事時京師雖解嚴羽書旁午廷棟剖決無滯而廷臣見其驟用心嫉之給事中陳良訓首刺廷棟同官陶崇道復言廷棟數月前一監司耳倏而爲巡撫總督本兵國士之遇宜何如報乃在通州時言遵永易復良固難破自以爲神算今何以難者易易者難且嘗請躬履行間隨敵追擊以爲此報主熱血今偃然中樞熱血何銷亡也謂制敵不專在戰似矣而伐謀用間其計安在帝不聽崇道言廷棟疏辨乞一巖疆自效優詔慰留之未幾工部主事李逢申劾廷棟虛名崇道又言廷棟輕於發言致臨洮固原入衛兵變帝皆不納五月永平四城復賞廷棟調度功加太子少保世廕錦衣僉事其秋廷棟以兵食不足將加賦因言今日閭左雖窮然不窮於遼餉也一歲中陰爲加派者不知其數如朝覲考滿行取推陞少者費五六千金合海內計之國家選一番守令天下加派數百萬巡按查盤訪緝餽遺謝薦多者至二三萬金合天下計之國家遣一番巡方天下加派百餘萬而曰民窮於遼餉何也臣考九邊額設兵餉兵不過五十萬餉不過千五百三十餘萬何憂不足故今日民窮之故惟在官貪使貪風不除卽不加派民愁苦自若使貪風一息卽再加派民懽忻亦自若疏入帝俞其言下戶部協議戶部尙書畢自巖阿廷棟意卽言今日之策無踰加賦請畝加九釐之外再增三釐於是

增賦百六十五萬有奇海內並咨怨已陳釐弊五事曰屯田曰鹽法曰錢法曰茶馬曰積粟又極陳陝西致寇之由請重懲將吏貪汙者以紓軍民之憤塞叛亂之源帝皆褒納廷棟居中樞歲餘所陳兵事多中機宜帝甚倚任然頗挾數行私不爲朝論所重給事中葛應斗劾御史袁弘勛參將胡宗明金請囑兵部廷棟亦劾弘勛及錦衣張道濬通賄狀兩人遂下獄兩人者吏部尙書王永光私人也廷棟謀并去永光以己代之得釋兵事永光遂由此去御史水佳允者弘勛郡人也兩疏力攻廷棟發其所與司官手書且言其縱奸人沈敏交關撫劉可訓納賄營私廷棟疏辯求去帝猶慰留有安國棟者初以通判主插漢撫賞事廷棟薦其才特擢職方主事仍主撫賞頗爲奸利廷棟庇之後佳允坐他事左遷行人司副復上疏發兩人交通狀并列其賄鬻將領數事事俱有迹廷棟危甚賴中人左右之得閒住去以熊明遇代八年冬召拜兵部右侍郎兼右都御史代楊嗣昌總督宣大山西軍務明年七月我

大清兵由間道踰天壽山克昌平逼京師山後地乃廷棟所轄也命戴罪入援兵部尙書張鳳翼懼罪自請督師兩人懼怯不敢戰近畿地多殘破言官交章論劾兩人益懼度解嚴後必罹重譴日服大黃藥求死八月十九日

大清兵出塞至九月朔鳳翼卒踰旬日廷棟亦卒已法司定罪廷棟坐大辟以旣死不究云廷棟旣歿其

父克從尙在後賊破鄢陵避開封及開封被淹死於水

熊明遇字良孺進賢人萬曆二十九年進士知長興縣四十三年擢兵科給事中旋掌科事上疏極陳時弊言今春以來天鼓兩震於晉地流星晝隕於清豐地震二十八天火九石首雨菽河內女妖遼東兵端吐火卽春秋二百四十年間未有稠於今日者且山東大祲人相食黃河水稽天兼以太白經天輔星湛沒熒惑襲月金水愆行或日光無芒日月同暈爲恆風爲枯旱天譴愈深而陛下所行皆誣天拂經之事此誠禽息碎首賈生痛哭之時也敢以八憂五漸三無之說進今內庫太實外庫太虛可憂一餉臣乏餉邊臣開邊可憂二套部圖王插部覬賞可憂三黃河泛濫運河膠淤可憂四齊苦荒天楚苦寒地可憂五鼎鉉不備棟梁常撓可憂六羣譁盈衢訛言載道可憂七吳民喜亂冠履倒置可憂八八憂未已五漸繼之太阿之柄漸入中涓魁壘之人漸如隕籜制科之法漸成奸藪武庫之器漸見銷亡商旅之途漸至梗塞五漸未已三無繼之匹夫可熒惑天子小校可濫邀絲綸是朝廷無紀綱滇黔之守令皆途窮揚粵之監司多規避是遠方無吏治讒構之口甚於戈戟傾危之禍慘於蘇張是士大夫無人心天下事可不寒心哉帝不省元詩教等以明遇與東林通出爲福建僉事遷監夏參議天啟元年以尙寶少卿進太僕少卿尋擢南京右僉都御史提督操江建營伏虎山選練蒼頭軍以資守禦永樂中齊王博以罪廢其子孫

居南京號齊庶人有睿燧者自負異表與奸人謀不軌明遇捕獲之寘其黨十餘人於法魏忠賢黨謀盡逐東林以明遇營救御史游士任五年三月給事中薛國觀遂劾其黨庇徇私忠賢卽矯旨革職未幾坐汪文言獄追贓千二百金謫戍貴州平溪衛莊烈帝卽位釋還崇禎元年起兵部右侍郎明年進左遷南京刑部尙書四年召拜兵部尙書疏陳四司宿弊悉見採納楊鶴被逮明遇言秦中流寇明旨許撫勦並行臣謂渠魁乞降亦宜撫脅從負固亦宜勦今鶴以撫賊無功就逮倘諸臣因鶴故欲盡戮無辜被脅之人絕其生路宜急敕新督臣洪承疇諭賊黨殺賊自效卽神一魁劉金輩果立奇功亦一體敘錄而諸將善撫馭如吳弘器等仍與陞擢庶賊黨日孤帝亦納之五年正月山東叛將李九成等陷登州明遇過信巡撫余大成言力主撫議久愈猖獗萊城被圍幾陷乃調關外軍討定之語詳徐從治傳當是時我

大清兵入宣府巡撫沈燬與中官王坤等遣使議和饋金帛牢禮師乃旋事聞帝惡燬專擅召對明遇等於平臺明遇曲爲燬解帝不悅逮燬下吏於是給事中孫三杰力詆明遇燬交關誤國同官陳贊化呂黃鐘御史趙繼鼎連劾之明遇再疏乞罷帝責以疎庸債事命解任候勘尋以故官致仕久之用薦起南京兵部尙書改工部引疾歸國變後卒

張鳳翼代州人萬曆四十一年進士授戶部主事歷廣寧兵備副使憂歸天啟初起右參政飭遵化兵備

三年五月遼東巡撫閻鳴泰罷擢鳳翼右僉都御史代之自王化貞棄廣寧後關外八城盡空樞輔孫承宗銳意修復而版築未興鳳翼聞命疑承宗欲還朝以遼事委之己甚懼卽疏請專守關門其座主葉向高鄉人韓爌柄政抑使弗上既抵關以八月出關前屯寧遠諸城上疏極頌承宗經理功且曰八城畚插非一年可就之工六載瘡痍非一時可起之疾今日議勦不能言戰不得計惟固守當以山海爲根基寧遠爲門戶廣寧爲哨探其意專主守關與承宗異議時趙率教駐前屯墾田練卒有成效及袁崇煥滿桂守寧遠關外規模略定忽有傳中左所被兵者永平吏民洶洶思竄鳳翼心動亟遣妻子西歸承宗曰我不出關人心不定遂於四年正月東行鳳翼語人曰樞輔欲以寧前荒塞居我是殺我也國家卽棄遼左猶不失全盛如大寧河套棄之何害今舉世不欲復遼彼一人獨欲復耶密令所知居言路者詆馬世龍貪淫及三大將建閫之非以撼承宗承宗不悅舉其言入告適鳳翼遭內艱遂解去承宗復上疏爲世龍等辨因詆鳳翼才鄙而怯識闇而狡工於趨利巧於避患廷議以既去不復問六年秋起故官巡撫保定明年冬薊遼總督劉詔罷進鳳翼右都御史兼兵部右侍郎代之崇禎元年二月御史甯光先劾鳳翼前撫保定建魏忠賢生祠鳳翼引罪乞罷不許未幾謝病去諸建祠者俱入逆案鳳翼以邊臣故獲宥三年起故官代劉策總督薊遼保定軍務既復遵永四城敘功進太子少保兵部尙書世廢錦衣僉事鳳翼以

西協單弱條奏增良將宿重兵備火器預軍儲遠哨探數事從之已復謝病去久之召爲兵部尙書明年二月召對平臺與吏部尙書李長庚同奉爲國任事潔己率屬之論尋以宣大兵寡上言國初額軍宣府十五萬一千今止六萬七千大同十三萬五千今止七萬五千乞兩鎮各增募萬人分營訓練且月餉止給五錢安能致赴桓之士乞一人食二餉帝並從之給事中周純修御史葛徵奇等以兵事日棘劾鳳翼瀾職鳳翼連疏乞休皆不許七年以恢復登州功加太子少保七月我

大清西征插漢師旋入山西大同宣府境帝怒守臣失機下兵部論罪部議巡撫戴君恩胡沾恩焦源清革職贖杖總督張宗衡閒住帝以爲輕責鳳翼對狀於是總督巡撫及三鎮總兵睦自強曹文詔張全昌俱遣戍監視中官劉允中劉文中王坤亦充淨軍時討賊總督陳奇瑜以招撫僨事給事中顧國寶劾鳳翼舉用非人帝亦不問奇瑜既罷卽命三邊總督洪承疇兼督河南山西湖廣軍務勦中原羣盜言官以承疇勢難兼顧請別遣一人爲總督鳳翼不能決旣而承疇竟無功及賊將南犯請以江北巡撫楊一鵬鎮鳳陽防護皇陵溫體仁不聽鳳翼言不能再請八年正月賊果燬鳳陽皇陵言官交章劾鳳翼鳳翼亦自危引罪乞罷帝不許令戴罪視事初賊之犯江北也給事中桐城孫晉以鄉里爲憂鳳翼曰公南人何憂賊賊起西北不食稻米賊馬不飼江南草閭者笑之事益急始令朱大典鎮鳳陽尋推盧象昇爲總理

與洪承疇分討南北賊而賊已蔓延不可制矣給事中劉昌劾鳳翼推總兵陳壯猷納其重賄鳳翼力辯昌貶秩調外已而鳳翼言勦賊之役原議集兵七萬二千隨賊所向以殄滅爲期督臣承疇以二萬人分布豫楚數千里力薄又久戍生疾故尤世威徐來朝俱潰以二萬人散布三秦千里內勢分又孤軍無援故艾萬年曹文詔俱敗今旣益以祖寬李重鎮倪寵牟文綬兵萬二千又募楚兵七千合九萬有奇兵力厚矣請以賊在關內者屬承疇在關外者屬象昇倘賊盡出關則承疇合勦於豫盡入關則象昇合勦於秦臣更有慮者賊號三四十萬更迭出犯勢衆而力合我零星四應勢寡而力分賊所至因糧於我人皆宿飽我所至樵蘇後爨動輒呼庚賊馬多行疾一二日而十舍可至我步多行緩三日而重鹵難馳衆寡饑飽勞逸之勢相懸如此賊何日平乞嚴敕督理二臣選將統軍軍各一二萬人俾前茅後勁中權聯絡相貫然後可制賊而不爲賊制今賊大勢東行北有黃河南有長江東有漕渠彼無舟楫豈能飛越我兵從西北窮追猶易爲力此防河扼險目前要策所當申飭者也帝稱善命速行之鳳翼自請督師討賊帝優詔不允九年二月給事中陳昌文上言將在軍君命有所不受今旣假督理二臣以便宜則行軍機要不當中制若今日議不許斬級明日又議必斬級今日議徵兵援鳳明日又議撤兵防河必至無所適從願樞臣自今凡可擊督撫之肘者俱寬之文法俾得展布可也兵法守敵所不攻攻敵所不守奇正錯出

滅賊何難今不惟不能滅乃今日破軍殺將明日又陷邑殘州止罪守令而不及巡撫豈法之平願樞臣自今凡可責諸撫之成者勿寬文法俾加磨礪可也帝納其言江北之賊自滁州歸德兩敗後盡趨潁廬盧氏內鄉浙川大山中關中賊亦由閩鄉靈寶與之合鳳翼請敕河南鄖陽陝西三巡撫各督將吏扼防毋使軼出四川湖廣兩巡撫移師近界聽援勤而督理二臣以大軍入山感之且嚴遏米商通販賊可盡殄帝深然之寇期五月蕩平老師費財督撫以下罪無赦鳳翼雖建此策象昇所部多騎軍不善入山賊竟不能滅至七月我

大清兵自天壽山後入昌平都城戒嚴給事中王家彥以陵寢震驚劾鳳翼坐視不救鳳翼懼自請督師賜尙方劍盡督諸鎮勤王兵以左侍郎王業浩署部事命中官羅維靈監督通津臨德軍務而宣大總督梁廷棟亦統兵入援三人相犄角皆退怯不敢戰於是寶坻順義文安永清雄安肅定興諸縣及安州定州相繼失守言官劾疏五六上鳳翼憂甚己巳之變尙書王洽下獄死復坐大辟鳳翼知不免日服大黃藥病已殆猶治軍書不休至八月末都城解嚴鳳翼卽以九月朔卒已而議罪奪其官十一年七月諭前勅寇功有詔敘復帝在位十七年間易中樞十四人皆不久獲罪鳳翼善溫體仁獨居位五載其督師也意圖道貴乃竟以畏法死

陳新甲長壽人萬曆時舉於鄉爲定州知州崇禎元年入爲刑部員外郎進郎中遷監前兵備僉事監前關外要地新甲以才能著四年大凌新城被圍援師雲集征繕悉倚賴焉及城破坐削籍巡撫方一藻惜其才請留之未報監視中官馬雲程亦以爲言乃報可新甲言臣蒙使過之恩由監視疏下此心未白清議隨之不敢受不許尋進副使乃泄竄遠七年九月擢右僉都御史代焦源清巡撫宣府新甲以戎備久弛親歷塞垣經前人足跡所不到具得土馬損耗城堡傾頽弓矢甲仗朽敝狀屢疏請於朝加整飭邊防賴之楊嗣昌爲總督與新甲共事以是知其才九年五月內艱歸十一年六月宣大總督盧象昇丁外艱嗣昌方任中樞薦新甲堪代詔擢兵部右侍郎兼右僉都御史奪情任之會

大清兵深入內地詔新甲受代卽督所部兵協禦未幾象昇戰歿孫傳庭代統其軍新甲與相倚仗終不敢戰明年春畿輔解嚴順天巡按劉呈瑞劾其前後逗撓新甲歷陳功狀且言呈瑞挾讐帝不問旣赴鎮列上編隊伍嚴哨探明訓練飭馬政練火器禁侵漁諸事報可麾下交夜譁新甲請罪亦不問給事中戴明說嘗劾之帝以輕議重臣停其俸十三年正月召代傅宗龍爲兵部尙書自弘治初賈俊後乙榜無至尙書者兵事方亟諸大臣避中樞故新甲得爲之陛見畢陳保邦十策多廷臣所嘗言惟言天壽山後宜設總兵徐州亦宜設重鎮通兩京咽喉南護鳳陵中防漕運帝並採用之復陳樞政四要及兵事四失帝

卽命飭行十四年三月賊陷雒陽襄陽福襄二王被難鑄新甲三秩視事舊制府州縣城郭失守者長吏
論死宛平知縣陳景建言村鎮焚掠三所者長吏當戍邊新甲主其議旨有司能兼顧鄉城卽與優敘若
四郊被寇與失機並論帝卽從之然是時中原皆盜其法亦不能行也楊嗣昌卒於軍中新甲舉丁啟睿
往代議者尤其失人然傅宗龍孫傳庭並以微罪繫獄新甲於召對時稱其才退復上章力薦兩人獲用
亦新甲力也尋論秋防功復所鑄秩時錦州被圍久聲援斷絕有卒逸出傳祖大壽語請以車營逼毋輕
戰總督洪承疇集兵數萬援之亦未敢決戰帝召新甲問策新甲請與閣臣及侍郎吳牲計之因陳十可
憂十可議而遣職方郎張若麒面商於承疇若麒未返新甲請分四道夾攻承疇以兵分力弱意主持重
以待帝以爲然而新甲堅執前議若麒素狂躁見諸軍稍有斬獲謂圍可立解密奏上聞新甲復貽書趣
承疇承疇激新甲言又奉密敕遂不敢主前議若麒益趣諸將進兵諸將以八月次松山爲我

大清兵所破大潰士卒死亡數萬人若麒自海道遁還言官請罪之新甲力庇復令出關監軍錦州圍未
解承疇又被圍於松山帝深以爲憂新甲不能救十五年二月御史甘惟燦劾新甲寡謀誤國請速令舉
賢自代不納三月松山錦州相繼失若麒復自寧遠遁還言官劾若麒者悉及新甲新甲屢乞罷皆不從
新甲雅有才膽邊事然不能持廉所用多債帥深結中貴爲援典司禮王德化尤昵故言路攻之不能入

當是時聞賊蹂躪河南開封屢被圍他郡縣失亡相踵總督傅宗龍汪喬年出關討賊先後陷歿賊勢愈張言官劾新甲者章至數十新甲請罪章亦十餘上帝輒慰留初新甲以南北交困遣使與

大清議和私言於傅宗龍宗龍出都日以語大學士謝陞陞後見疆事大壞述宗龍之言於帝帝召新甲詰責新甲叩頭謝罪陞進曰倘肯議和和亦可恃帝默然尋諭新甲密圖之而外廷不知也已言官謁陞陞言上意上和諸君幸勿多言言官駭愕交章劾陞陞遂斥去帝既以和議委新甲手詔往返者數十其戒以勿洩外廷漸知之故屢疏爭然不得左驗一日所遣職方郎馬紹愉以密語報新甲視之置几上皆家僮誤以爲塘報也付之抄傳於是言路譁然給事中方士亮首論之帝愠甚留疏不下已降嚴旨切責新甲令自陳新甲不引罪反自詡其功帝益怒至七月給事中馬嘉植復劾之遂下獄新甲從獄中上書乞宥不許新甲知不免徧行金內外給事中廖國遴楊枝起等營救於刑部侍郎徐石麒拒不聽大學士周延儒陳演亦於帝前力救且曰國法敵兵不薄城不殺大司馬帝曰他且勿論戮辱我親藩七不甚於薄城耶遂棄新甲於市新甲爲楊嗣昌引用其才品心術相似軍書旁午裁答無滯帝初甚倚之晚特惡其洩機事且彰主過故殺之不疑厥後給事中沈迅力詆其失帝曰令爾作新甲恐更不如迅慙而退新甲初自陽和入都門黃霧四塞識者以爲不祥及是果應

馮元颺字爾崧慈谿人父若愚南京太僕少卿天啟元年元颺與兄元颺同舉於鄉明年元颺成進士歷知澄海揭陽崇禎四年徵授戶科給事中帝遣中官出鎮元颺力爭時元颺亦疏論中官兄弟俱有直聲無何上疏力詆周延儒被切責尋論山東總督劉宇烈縱寇主撫罪又言禮部侍郎王應熊無大臣體宜罷復薦詞臣姚希孟孤忠獨立不當奪講官科臣趙東曦正詞讜論不當奪言路皆不納應熊謀改吏部元颺復撫劾其貪穢數事被旨譴責遂乞假歸八年春還朝時鳳陽皇陵燬廷臣交論溫體仁王應熊朋比誤國元颺上言政本大臣居實避名受功辭罪平時養威自重遇天下有事輒曰昭代本無相名吾儕止供票擬上委之聖裁下委之六部持片語叢百欺夫中外之責孰大於票擬有漢唐宰相之名而更代天言有國初顧問之榮而兼隆位號地親勢峻言聽志行柄用專且重者莫如今日猶可謝天下責哉遷禮科右給事中再遷刑科左給事中數言部囚多輕罪請帝寬宥並採納之詔簡東宮講官左諭德黃道周爲首輔張至發所扼且疏詆之元颺言道周至清無徒忠足以動人主惟不能得執政歡至發恚兩疏詆元颺帝皆置不問由戶科都給事中擢太常少卿改南京太僕卿就遷通政使十五年六月召拜兵部右侍郎轉左元颺多智數尙權譎與兄元颺並好結納一時翕然稱二馮然故與馮銓通譜誼初在言路詆周延儒及爲侍郎延儒方再相元颺因與善延儒欲以振饑爲銓功復其冠帶憚衆議元颺令引吳姓

入關助之既而銜背延儒議熊開元欲盡發延儒罪元颯沮止之開元以是獲重譴兵部尚書陳新甲棄市元颯署部事一日帝召諸大臣遊西苑賜宴明德殿因論兵事良久出御馬佳者百餘匹及內製火箭次第示元颯元颯爲辨其良楛帝曰大司馬缺久無踰卿者元颯以多病辭乃用張國維十六年五月國維下獄遂以元颯爲尙書帝倚之甚至元颯顧不能有所爲河南湖廣地盡陷關盜又日告警至八月以病劇乞休帝慰留之賜瓜果食物遣醫診視請益堅乃允其去元颯頗能料事孫傳庭治兵關中元颯謂不可輕戰廷臣多言不戰則賊益張兵久易懦元颯謂將士習懦未經行陣宜致賊而不宜致於賊乃於帝前爭之曰請先下臣獄俟一戰而勝斬臣謝之又貽書傳庭戒毋輕鬪白高兩將不可任傳庭果敗將歸薦李邦華史可法自代帝不用用兵科都給事中張縉彥都城遂不守福王時元颯卒其家請卹給事中吳适言元颯身膺特簡莫展一籌予以祭葬是使誤國之臣生死皆得志也部議卒如所請元颯字爾賡舉崇禎元年進士授都水主事帝遣中官張彝憲總理戶工二部事元颯抗疏謂內臣當別立公署不當踞二部堂二部司屬亦不得至彝憲門犯交結禁帝責以沽名彝憲亦愠元颯請告歸尋起禮部主事進員外郎中遷蘇松兵備參議温體仁當國唐世濟爲都御史皆烏程人其鄉人盜太湖以兩家爲輿主元颯捕得其渠魁則世濟族子也置之法遷福建提學副使巡按引回

官張溥張采倡復社亂天下巡按倪元珙以屬元颺元颺盛稱溥等元珙據以入告體仁庇文聲兩人並獲譴元颺謫山東鹽運司判官十一年濟南被兵攝濟寧兵備事十四年遷天津兵備副使十月擢右僉都御史代李繼貞巡撫天津兼督遼餉明年敘軍功廢一子錦衣衛時元颺已掌中樞帝顧其兄弟厚賞賜宮參療元颺疾而元颺以衰老乞休詔遣李希沆代未至而京城陷元颺乃由海道脫歸是秋九月卒贊曰明季疆場多故則重本兵之權而居是位者乃多庸闇闕冗之輩若張鶴鳴之任王化貞陳新甲之舉丁啟睿皆闇於知人至松山之役其誤國可勝言哉梁廷棟謂民窮之故在官貪似矣而因以售其加派之說是所謂亡國之言也

總裁官總理事務 經筵講官少保兼太子太保保和殿大學士兼管吏部戶部尚書事加大級張廷玉等奉

敕修

許譽卿

華允誠

魏呈潤

胡良機李曰輔趙東臆

毛羽健

黃宗昌韓一良

吳執御

吳彥芳王績燦

章正宸

黃紹杰

李世祺

傅朝佑

莊鼐獻李汝燦

姜琛

弟核

熊開元

方士高

詹爾選

湯開遠

成勇

陳龍正

許譽卿字公實華亭人萬曆四十四年進士授金華推官天啟三年徵拜吏科給事中疏言錦衣世職不當濫昇保姆奄尹織造中官李實誣劾蘇州同知楊姜侵撫按職中旨謂姜賄譽卿出疏停譽卿俸半年楊漣劾魏忠賢譽卿亦抗疏極論忠賢大逆不道視漢之朋結趙嬖唐之勢傾中外宋之典兵矯詔謀閭兩宮何異忠賢大怒又言內閣政本重地而票擬大權拱手授之內廷廠衛一奉打問之旨五毒備施邇復用立枷法士民槁項斃者不知凡幾又行數十年不行之廷杖流毒搢紳豈所以昭君德哉祖制宦官不典兵今禁旅日繁內操未罷聚虎狼於蕭牆之內逞金革於禁闥之中不為早除必貽後患於是忠賢怒益甚會趙南星高攀龍被逐譽卿偕同列論救遂錫秩歸莊烈帝即位誅崔魏將大計天下吏奄黨房

壯麗安伸楊維垣之徒冀收餘燼屢詔起廢輒把持使不得進引其同類譽卿時已起兵科給事中具疏爭吏部尚書王永光素附璫讎東林尤陰鷲詔定逆案頌璫者卽黨逆永光嘗頌璫治逆案陰護持之南京給事中陳堯言疏劾永光璫孽不當正銓席然帝方眷永光責堯言譽卿又抗疏爭於是都給事中薛國觀以己亦璫孽也遂許譽卿及同官沈惟炳東林主盟結黨亂政譽卿上疏自白卽日引去七年起故官歷工科都給事中明年正月流賊陷潁州譽卿請急調五千人守鳳陽疏入而鳳陽已陷皇陵毀焉譽卿痛憤直發本兵張鳳翼固位失事及大學士溫體仁王應熊玩寇速禍罪賊在秦晉時早設總督遏其渡河禍止西北一隅耳乃侍郎彭汝楠避不肯行及賊入楚豫人言交攻然後不得已而議設之侍郎汪慶百又避不行乃推極邊之陳奇瑜鞭長不及釀成今日之禍非樞臣之固位失事乎流寇發難已久樞臣因東南震隣始有淮撫操江移鎮之疏識者已恨其晚及奉旨則曰不必移鎮臣觀各地方稍有兵力賊卽不敢輕犯鳳陽何地使巡撫早移豈有今日今樞臣以曾請移鎮藉口撫臣以不必移鎮爲詞則輔臣欲諱玩寇速禍其可得哉帝以苛求責之而是時言官吳履中等復交章劾體仁應熊交相贊美其擬旨慰留曰忠悃曰蓋盡曰絕私奉公曰弘濟時艱不知時事至此忠盡安在而奉公濟艱者何事也譽卿再疏論帝仍不問譽卿曰皇上臨馭有年法無假貸獨於誤國輔臣不一問今者巡撫楊一鵬巡按吳振

纓且相繼就逮矣輔臣願從容入直退食委蛇謂可超然事外乎帝終不聽譽卿在天啟時謝陞方爲文選郎及是陞長吏部譽卿猶滯垣中以資深當擢京卿陞希體仁意出之南京大學士文震孟愠語侵陞陞亦愠適山東布政使勞永嘉賄營登萊巡撫主給事中宋之普家陞等列之舉首爲給事中張第元所發帝以詰陞言路因欲攻陞及都御史唐世濟譽卿以世濟恃體仁惡尤甚當先去之御史張纘曾乃獨劾陞疑出譽卿及震孟意之普又搆之陞先是福建布政使申紹芳亦欲得登萊巡撫譽卿曾言之陞陞遂疏攻譽卿謂其營求北缺不欲南遷爲把持朝政地并及囑紹芳事體仁從中主之譽卿遂削籍紹芳逮問遣戍十五年御史劉遠及給事中楊枝起相繼論薦竟不果用福王立起光祿卿不赴國變薙髮爲僧久之卒

華允誠字汝立無錫人曾祖舜欽瑞州知府祖啟直四川參政允誠舉天啟二年進士從同里高攀龍請學首善書院先後旋里遂受業爲弟子傳其主靜之學四年春從攀龍入都授都水司主事攀龍去官允誠亦告歸崇禎改元起營繕主事進員外郎二年冬京師戒嚴分守德勝門四十餘日不懈帝微行察知之賜白金敘功加俸一年改職方員外郎五年六月以溫體仁閔洪學亂政疏陳三大可惜四大可憂略言當事借皇上剛嚴而佐以舞文擊斷之術倚皇上綜核而聘其訟逋握算之能遂使和恆之世競尚刑

名清明之躬浸成叢脞以聖主圖治之盛心爲諸臣鬪智之捷徑可惜一帥屬大僚驚魂於回奏認罪封駁重臣奔命於接本守科遂使直指風裁徒徵事件長吏考課惟問錢糧以多士靖共之精神爲案牘鈎較之能事可惜二廟堂不以人心爲憂政府不以人才爲重四海漸成土崩瓦解之形諸臣但有角戶分門之念意見互觴議論滋擾遂使鞫撫等於築舍用舍有若舉碁以興邦啟聖之歲時爲卽聾從昧之舉動可惜三人主所以總一天下者法令也喪師誤國之王化貞與楊鎬異辟潔己愛民之余大成與孫元化並逮甚至一言一事之偶誤執訊隨之遂使刑罰不中鈇鉞無威一可憂也國家所恃以爲元氣者公論也直言敢諫之士一鳴輒斥指佞薦賢之章目爲奸黨不惟不用其言并錮其人又加之罪遂使暗默求容是非共蔽二可憂也國家所賴以防維者廉恥也近者中使一遣妄自尊大羣僚趨走惟恐後時皇上以近臣可倚而不知倖竇已開以操縱惟吾而不知屈辱士大夫已甚遂使阿諛成風羞惡盡喪三可憂也國家所藉以進賢退不肖者銓衡也我朝罷丞相以用人之權歸之吏部閣臣不得侵焉今次輔體仁與冢臣洪學同邑朋比惟異己之驅除閣臣兼操吏部之權吏部惟阿閣臣之意造門請命夜以爲常黜陟大柄祇供報復之私甚至庇同鄉則逆黨公然保舉而白簡反爲罪案排正類則講官借題逼逐而薦剡遂作爰書欺莫大於此矣擅莫專於此矣黨莫固於此矣遂使威福下移舉措倒置四可憂也疏入

帝請其別有指使允誠乃列上洪學徇私數事且曰體仁生平紆臂塗顏廉隅掃地陛下排衆議而用之以其倖直寡諧豈知包藏禍心陰肆其毒又有如洪學者爲之羽翼遍植私人戕盡善類無一人敢犯其鋒者臣復受何人指使帝以體仁純忠亮節而摘疏中握定機關語再令陳狀允誠復上言二人朋比舉朝共知溫育仁不識一丁以家貲而首拔鄧英以論沈演而謫羅喻義以左右非人一語而逐此非事之章明較著者乎帝亦悟兩人同里有私乃奪允誠俸半年而洪學亦旋罷去其冬以省親歸孝養母母年八十三而終後爲福王驗封員外郎十餘日卽引疾歸允誠踐履篤實不慕榮達延儒再召遣人以京卿唱之允誠拒不應入南都士英先造請亦不報謝國變後屏居墓田不肯薙髮與從孫尙濂駢斬於南京魏呈潤字中巖龍溪人崇禎元年進士由庶吉士改兵科給事中三年冬疏陳兵屯之策請敕順天保定兩巡撫簡所部壯士大邑五百人小邑二三百人分營訓練而天津翟鳳翀通州范景文昌平侯恂並建節鉞宜令練兵之外兼營屯田又陳閩海勦撫機宜六事並議行明年夏久旱求言疏言驛站所裁纔六十萬未足充軍餉十一而郵傳益疲勢必再編里甲是猶剜肉醫瘡瘡未瘳而肉先潰關外舊兵十八萬額餉七百餘萬今兵止十萬七千合薊門援卒非溢原數加派五百九十萬外新增又百四十餘萬猶憂不足可不爲稽核乎邊報告急非臣子言功之日而小捷頻聞躐加峻秩門客厮養詭名戎籍不階而升

悉靡俸料臣懼其難繼也江淮旱災五湖之間海岸爲谷舊穀不登新絲未熟上供織造宜且暫停銓法壞於事例正途口壅不可不疏通撫按諸臣捐貲助餉大抵索之民間顧奉急公之襲上蒙而下削不可不禁飭又條陳數策請大修北方水政帝皆納其言熹宗時司業朱之俊議建魏忠賢祠國學旁下教有功不在禹下語置籍責諸生捐助及帝卽位委過諸生陸萬齡曹代何以自解首輔韓爌以同鄉庇之漏逆案及是之俊已遷侍講呈濶發其奸請與萬齡棄西市之俊由是廢宣府監視中官王坤以冊籍委頓劾巡按御史胡良機帝奪良機官卽令坤按核呈濶上言我國家設御史巡九邊秩卑而任鉅良機在先朝以糾逆璫削籍今果有罪則有回道考覈之法在而乃以付坤且邊事日壞病在十羊九牧既有將帥又有監司既有督撫有巡方又有監視一官出增一官擾中貴之威又復十倍御史偶獲戾且莫自必其命誰復以國事抗者異日九邊聲息監視善惡奚從而聞之乞召還良機毋使仰鼻息於中貴帝以呈濶黨比貶三級出之外良機者南昌人也字省之萬厯四十四年進士天啟間爲御史嘗糾魏忠賢之惡不減汪直劉瑾忠賢憾之以年例遷廣東參議良機方按貴州不候代而去遂斥爲民崇禎元年起故官按宣大二鎮年滿當代以其敏練再巡一年至是遂爲坤劾罷時又有御史李曰輔者亦以論中官獲譴廷臣交章論救不聽而御史趙東曦又疏劾坤亦獲譴云曰輔字元卿亦南昌人也與胡良機同里閩萬厯

中舉於鄉爲成都推官與巡撫朱燾元計兵事借諸將攻復重慶崇禎四年擢南京御史時中官四出張彝憲總理戶工錢糧唐文征提督京營戎政王坤監餉宣府劉文忠監餉大同劉允中監餉山西又命王應期監軍關隘張國元監軍東協王之心監軍中協鄧希詔監軍西協又命吳直監餉登島李茂奇監茶馬陝西曰輔上疏諫曰邇者一日遣內臣四尋又遣用五非兵機則要地也廷臣方交章而登島陝西又有兩閩之遣假專擅之權駭中外之聽啟水火之隙開依附之門灰任事之心藉委卸之口臣愚實爲寒心陛下踐阼初盡撤內臣中外稱聖昔何以撤今何以遣天下多故擇將爲先陛下不築黃金臺招頗牧乃汲汲內臣是遣曾何補理亂之數哉帝怒謫曰輔廣東布政司照磨東曦字馭初上海人萬厯四十七年進士崇禎五年由知縣入爲刑科給事中請興屯塞下以充軍用不報適宣塞有私和事王坤時監宣餉且請代東曦上言宣塞失事陛下赫然震怒速巡撫沈榮罷本兵熊明遇乃監視王坤方會飲城樓商榷和議邊臣倚庇欺蔽日甚坤不得辭扶同罪反侈邊烽已熄爲己功且請代夫內臣之遣陛下用之非不易之典今卽盡撤之猶謂不早坤願請代圖彌縫於去後願陛下正坤罪撤各使還京帝言宣鎮擅和實坤奏發何謂欺隱調東曦外任謫福建布政司都事異時呈潤起官以光祿署丞終良機起光祿典簿終南京吏部主事東曦稍遷行人司正禮部郎中奉使還里福王時召東曦爲給事中曰輔爲御史而

二人者皆已死矣

毛羽健字芝田公安人天啟二年進士崇禎元年由知縣徵授御史好言事首劾楊維垣八大罪及阮大
鍼反覆變幻狀二人遂被斥王師討安邦彥久無功羽健言賊巢在大方黔其前門蜀遵永其後戶由黔
進兵必渡陸廣奇險七晝夜抵大方一夫當關千人自廢王三善蔡復一所以屢敗也遵義距大方三日
程而畢節止百餘里平衍從此進兵何患不克因畫上足兵措餉方略并薦舊總督朱燮元閔夢得等帝
卽議行後果平賊已陳驛遞之害兵部勘合有發出無繳入士紳遞相假一紙洗補數四差役之威如虎
小民之命如絲帝卽飭所司嚴加釐革積困爲蘇當是之時閹黨既敗東林大盛而朝端王永光陰陽閃
爍溫體仁猾賊周延儒回佞言路新進標直之徒尤競抨擊以爲名高體仁之訐錢謙益也以科場舊事
延儒助之惡且目攻己者爲結黨欺君帝怒而爲之罷會推矣御史黃宗昌疏糾體仁熱中枚卜欲以結
黨二字破前此公論之不予且箝後來言路之多口羽健亦憤朋黨之說曰彼附逆諸奸旣不可用勢不
得不用諸奸擯斥之人如以今之連袂登進者爲相黨而來抑將以昔之鱗次削奪者爲相黨而去乎陛
下不識在朝諸臣與奸黨諸臣之孰正孰邪不觀天啟七年前與崇禎元年後之天下乎孰危孰安今日
語太平則不足語剔弊則有餘諸臣亦何負國家哉一夫高張輒疑舉朝皆黨則株連蔓引不且一網盡

哉帝責羽健疑揣而以前條陳驛遞原之太常少卿謝陞求巡撫於永光永光長吏部陞當推劄鎮畏而引病以避後推太僕則不病羽健劾陞永光明比宜並罪永光召對文華殿力詆羽健請究主使之者大學士韓爌曰究言官非體也帝不從已而有一日帝御文華殿獨召延儒語良久事祕舉朝疑駭羽健曰召見不以盈廷而以獨待清問不以朝參而以燕閒更漏已沉閣門猶啟漢臣有言所言公公言之所言私王者不受私疏入切責羽健既積忤權要其黨思因事去之及袁崇煥下獄主事陸澄源以羽健嘗疏譽崇煥劾之落職歸卒黃宗昌字長倩卽墨人天啟二年進士崇禎初爲御史請斥矯旨僞官言先帝賓天在八月二十三日三殿敘功止先一日正當帝疾大漸之時豈能安閒出詔凡加銜進秩皆魏氏官也得旨汰敘功冒濫者宗昌爭曰臣所糾乃矯旨非冒濫也冒濫猶可容矯僞不可貸遂列上黃克纘范濟世霍維華邵輔忠呂純如等六十一人乞罷免帝以列名多不聽尋劾罷逆黨尙書張我續侍郎呂圖南通政使岳駿聲給事中潘士聞御史王琪又劾周延儒貪穢數事帝怒停俸半年旣而劾體仁不納二年冬巡按湖廣岷王禔洪爲校尉侍聖及善化王長子企鈺等所弑參政龔承薦等不以實聞獄不決者久之宗昌至羣奸始伏辜帝責問前諸臣失出罪宗昌糾承薦等時體仁延儒皆已入閣而永光意思以爲不先劾承薦也鑄宗昌四級宗昌遂歸十五年卽墨被兵宗昌率鄉人拒守城全仲子基中流矢死其

妻周氏及三妾郭氏二劉氏殉之謂之一門五烈莊烈帝初在位銳意圖治數召見羣臣論事然語不合輒訶譴而王永光長吏部尤樂沮之澄城人韓一良者元年授戶科給事中言陛下平臺召對有文官不愛錢語而今何處非用錢之地何官非愛錢之人向以錢進安得不以錢償以官言之則縣官爲行賄之首給事爲納賄之尤今言者俱咎守令不廉然守令亦安得廉俸薪幾何上司督取過客有書儀考滿朝覲之費無慮數千金此金非從天降非從地出而欲守令之廉得乎臣兩月來辭却書帕五百金臣寡交猶然餘可推矣伏乞陛下大爲懲創逮治其尤者帝大喜召見廷臣卽令一良宣讀讀已以疏遍視閣臣曰一良忠鯁可僉都御史永光請令指實一良唯唯如不欲告許人者則令密奏五日不奏而舉周應秋閻鳴泰一二舊事爲言語頗侵永光帝乃再召見一良永光及廷臣手前疏循環頌音琅然而曰此金非從天降非從地出則掩卷而嘆問一良五百金誰之餽也一良卒無所指固問則對如前帝欲一良指實將有所懲創一良卒以風聞謝大不懌謂大學士劉鴻訓曰都御史可輕授耶叱一良前後矛盾褫其官吳執御字朗公黃巖人天啟二年進士除濟南推官德州建魏忠賢祠不赴崇禎三年徵授刑科給事中明年請除掣簽法使人地相配議格不行請蠲畿輔加派示四方停免之期曉然知息肩有日不至召亂請罷捐助搜括毋爲貪墨藏奸藪帝以沽名市德責之劾吏部尙書王永光比匪用王元雅而封疆誤聽

張道潛賄舉尹同舉而祖制紊國家立法懲貪而永光誨貪官邪何日正寵賂何日清帝以永光清慎不納其言請召黃克績劉宗周鄭鄤忤旨譴讓又言往者邊警袁崇煥王元雅擁金錢數百萬士馬數十萬狼狽失守而史應聘王象雲張星左應選以一邑抗強敵故曰籌邊不在增兵餉而在擇人請畿輔東北及秦晉沿邊州縣選授精敏甲科賜璽書畀本地租賦撫練軍民自禦寇邊關文武吏繕修戰守外責以理財如先臣王鞠業盛輩所爲客兵可撤餉省可數百萬帝時未審執御所論畿輔秦晉也而曰歲賦留本地則國用何資不聽又劾首輔周延儒攬權其姻親陳于泰及幕客李元功等交關爲奸利初執御行取入都延儒遣元功招之不赴至是竟劾延儒又陳內外陰陽之說九邊中原廟堂之上無非陰氣心膺大臣不皆君子帝以所稱陽剛君子無主名令指實執御乃以前所薦劉宗周三人及姜曰廣文震孟陳仁錫黃道周倪元璐曹于汴惠世揚羅喻義易應昌對會御史吳彥芳言執御所舉固眞君子他若侍郎李瑾李邦華畢茂康倪思輝程紹皆忠良當用通政使章光岳邪媚當斥帝怒其朋比執政復從中搆之遂劾二人籍下法司訊時御史王績燦方以薦李邦華劉宗周等下獄而執御彥芳復繼之舉朝震駭言官爲申救卒坐三人贖徒三年彥芳字延祖歙縣人爲御史大凌被圍疏論孫承宗又駁逆案呂純如辨寃之謬登州用兵請設監島中官至是譴歸績燦字倬泰安福人與給事中鄧英陳奸吏私派之弊又進

賜環起廢容諫三說薦張鳳翔李邦華劉宗周惠世揚遂獲罪卒福王時復官彥芳績燦兩人者皆以天啟五年舉進士彥芳授莆田知縣績燦授興化知縣又皆以治行高等擢崇禎四年御史並有聲其免官也又皆以薦才不中與吳執御同論譴云

章正宸字羽侯會稽人從學同里劉宗周有學行崇禎四年進士由庶吉士改禮科給事中勸帝法周孔黜管商崇仁義賤富強禮部侍郎王應熊者溫體仁私人也廷推閣臣望輕不得與體仁引爲助爲營入閣正宸上言應熊強愎自張何緣特簡事因多擾變以刻成綜核傷察宜存渾厚奈何使復傲之人與贊平明之治哉帝大怒下獄拷訊竟削籍歸九年冬召爲戶科給事中遷吏科都給事中周延儒再相帝尊禮之特重正宸出其門與擡柱歲旦朝會帝隆師傅禮進延儒等而揖之曰朕以天下聽先生正宸曰陛下隆禮閣臣願閣臣積誠以格君心毋緣中官毋修恩怨毋以寵利居成功毋以爵祿私親暱語皆風刺延儒延儒欲用宣府巡撫江禹緒爲宣大總督正宸持不可吏部希延儒指用之延儒欲起江陵知縣史調元正宸止之延儒以罪輔馮銓力得再召欲假守涿功復銓冠帶正宸爭之事遂寢其不肯阿徇如此未幾會推閣臣救李日宣謫戍均州語在日宣傳福王立召復正宸故官正宸痛舉朝無討賊心上疏曰比者河北山左各結營寨禽殺僞官爲朝廷效死力忠義所激四方響應宜亟檄江北四鎮分渡河淮

絡諸路一心齊力互爲聲援兩京血脈通而後塞井陘絕孟津據武關以攻隴右陛下編素親率六師駐蹕淮上聲靈震動人切同仇勇氣將自倍簡車徒選將帥繕城塹進寸則寸進尺則尺據險處要以規中原天下大矣渠無人應運而出哉魏國公徐弘基薦逆案張捷部議並起用鄒之麟張孫振劉光斗安遠侯柳祚昌等薦起阮大鍼正宸並疏諫不納改大理丞正宸請假歸魯王監國署舊官事敗棄家爲僧黃紹杰萬安人天啟五年進士授中書舍人崇禎元年考選給事中需次劾罷奄黨南京御史李時馨徐復陽補授兵科五年薊遼總督曹文衡與監視中官鄧希詔相訐紹杰言文衡烈士受內臣指摘何顏立三軍上希詔內豎許邊臣辱國大不便宜亟更文衡而罷希詔帝不聽久之文衡以閒住去紹杰遷刑科左給事中七年五月因早求言紹杰疏論大學士溫體仁曰漢世災異策免三公宰執亦引罪以求罷今者久旱陛下修明政治納讜言可謂應天以寶矣而雨澤不降何哉天有所甚怒而不解也次輔溫體仁者秉政數載上千天和無歲不早曠無日不風霾無處不盜賊無人不愁怨秉政既久窺閭益工中外趨承益巧一人當用則曰體仁意未遠爾也一事當行則曰體仁聞恐不樂也覆一疏建一議又曰慮體仁有他屬不然則體仁忌諱毋櫻其兇鋒也凡此召變之尤願陛下罷體仁以回天意體仁罷而甘霖不降殺臣以正欺君之罪帝方眷體仁貶紹杰一秩體仁辨且許其別有指授紹杰言廷臣言事指及乘輿猶

荷優容一字涉體仁必遭貶黜誰不自愛爲人指授耶因列其罪狀東南不肯設立總督庇兵部侍郎彭汝楠致失機宜用貪穢胡鍾麟爲職方郎而黜李繼貞囑尙書閔洪學起私人唐世濟爲南京總憲錮正人瞿式耜等庇姻婭沈聚爲宣撫私款辱國庇主考丁進從寬磨勘且曰臣所仰祝聖明洞燭體仁奸欺者其說則有兩端下惟朋黨一語可以箝言官之口挑善類之禍上惟票擬一語可以激聖明之怒蓋債誤之愆體仁猶辨且以朋黨爲言紹杰遂言體仁受銅商王誠金體仁長子受巡撫聚及兩淮巡鹽高欽順等金皆萬計體仁用門幹王治東南之利皆其轉輸體仁私邸兩被盜失黃金寶玉無算匿不敢言帝怒調爲上林苑署丞遷行人司副八年賊犯皇陵紹杰再劾體仁誤國召寇再謫應天府檢校屢遷南京吏部郎中卒先是七年正月給事中李世祺論溫體仁及大學士吳宗達并劾兵部尙書張鳳翼溺職狀帝怒謫福建按察司檢校世祺字壽生青浦人天啟二年進士授行人崇禎三年擢刑科給事中陳大計之當定者二曰兵食之計民生之計大弊之當釐者三曰六曹之弊在吏胥邊吏之弊在欺隱貪墨之弊在奢靡夏旱禱雨未應乃進修政之說三曰恤畿甸議催科預儲備帝並納之中官出鎮世祺上言祖宗立法錢穀兵馬軍民各分事權防專擅內閣入奉天顏出司兵食內廷意旨既得而陰伺之外廷事權又得而顯操之魏忠賢盜弄神器則賴聖天子躬躬除之而奈何復躬自蹈之不聽五年八月淫雨損山陵

昌平地動世禩上言日者輔理調燮無聞精神爲固寵之用統軍衡才無術緩急無可恃之人中樞決策掩耳盜鈴主計持籌醫瘡剌肉州縣迫功令鞭策不前六曹窘簿書救過不贖簪筆執簡之臣接跡圜圜考槃過軸之士抗聲鴻舉一人議疑及衆人一事訾疑及衆事黃衣之使頡頏卿貳之堂貂蟬之座雄踞節鉞之上低眉則氣折強項則釁開各邊監視之遣已將期月初雖間有摘發至竟同歸模稜效不效可槩見伏願撤回各使以明陰不干陽之分然後採公論以進退大臣酌事情以衡量小臣釋疑忌之根開功名之路庶天變可回時艱可濟帝以借端瀆奏切責之給事中陳贊化劾周延儒謂延儒嘗語人曰今上羲皇上人也此成何語臣聞之世禩帝詰世禩則言聞之贊化帝詰責者再三世禩執如初乃已至是論體仁絕世之奸大貪之尤遂貶官久之起行人司副屢遷太僕寺卿遣祭魯王事竣旋里國變杜門不出久之卒

傅朝佑字右君臨川人有孝行萬厯中舉鄉試第一師事鄒元標天啟二年成進士授中書舍人崇禎三年考選給事中永平初復列上善後七事帝採納之補授兵科明年八月疏劾首輔周延儒以機械變詐之心運刑名督責之術見佞則加之膝結袁弘勛張道濬爲腹心遇賢則墜之淵擯錢象坤劉宗周於草莽傾陷正士加之極刑曰上意不測也攘竊明旨播諸朝右曰吾意固然也皇上因早求言則恐其揚己

過故削言官以立威皇上慎密兵機則欲其籍人口故挫直臣以悅衆往時糾其罪惡者盡遭斥逐而親知鄉曲遍列要津大臣之道固如是乎忤旨切責屢遷工科左給事中陳當務十二事一納諫二恤民三擇相四勿以內批用輔臣五勿使中官司彈劾六勿令法外加濫刑七止緹騎八停內操九抑武臣驕玩十廣起廢十一敕有司修城積粟十二講聖諭六條出封益藩事竣還里九年卽家進刑科都給事中還朝愆期爲給事中陳啟新所劾貶秩調外未行疏論溫體仁六大罪略言陛下當邊警時特簡體仁入閣體仁乃不以道事君而務刑名窺陛下意在振作彼則借以快恩仇窺陛下治尙精明彼則託以張威福此謂得罪於天子鳳陽昌平鍾靈之地體仁曾無未雨綢繆兩地失守陵寢震驚此謂得罪於祖宗燮理職在三公體仁爲相日月交蝕星辰失行風霾迭見四方告災歲比不登地震河決城陷并枯曾莫之懲則日尋恩怨圖報睚眦此謂得罪於天地強敵內逼大盜四起高麗旦暮且陷體仁冒賞冒廢中外解體因之此謂得罪於封疆體仁子見屏於復社諸生募人糾彈株連不已且七年又議裁減茂才國家三百年取士之經一旦壞於體仁之手此謂得罪於聖賢同生天地誰無本心體仁自有肺腸偏欲殘害忠良祇今文武臣僚幾數百人駢首囹圄天良盡喪此謂得罪於心性夫人主之辨姦在明而人主之去姦在斷伏願陛下大施明斷速去體仁毋以天變爲不足畏毋以人言爲不足恤毋以羣小之逢迎爲必可任

毋以一己之精明爲必可恃大赦天下除苛政庶倒懸可解太平可致帝怒除名下吏按治踰月體仁亦罷中官杜勳雅重朝佑令其上疏請罪而已從中主之可復故官朝佑不應十一年冬國事益棘獲罪者益衆獄幾滿朝佑乃從獄中上書請寬恤語過激會有邊警未報也明年春責以顛倒賢奸恣意誦侮廷杖六十創重而卒當時臺省競言事言不中多獲譴章正宸莊鼂獻李汝璈之徒好直諫朝佑嘗疏稱之鼂獻字任公晉江人崇禎六年由庶吉士改兵科給事中上太平十二策極論東廠之害忤旨貶浙江布政司照磨汝璈字用章南昌人崇禎時爲刑科給事中十年閏月因旱求言陳回天四要論財用政事之弊又言八九年來干和召災始於端揆積於四海水旱盜賊頻見疊出勢將未已何怪其然帝怒削籍歸國變衰絰北面哀號作祈死文祈死竟汝璈朝佑既死福王時復官鼂獻事福王復官久之卒

姜採字如農萊陽人崇禎四年進士授密雲知縣調儀真遷禮部主事十五年擢禮科給事中山陽武舉陳啟新者崇禎九年詣闕上書言天下三大病士子作文高談孝悌仁義及服官恣行奸慝此科目之病也國初典史授都御史貢士授布政秀才授尙書嘉靖時猶三途並用今惟一途舉貢不得至顯官一舉進士橫行放誕此資格之病也舊制給事御史教官得爲之其後途稍隘而舉人推官知縣猶與其列今惟以進士選彼受任時先以給事御史自待監司郡守承奉不暇剝下虐民恣其所爲此行取考選之病

也請停科目以紉虛文舉孝廉以崇實行罷行取考選以除積橫之習蠲災傷田賦以蘇民困專拜大將以節制有司便宜行事捧疏跪正陽門三日中官取以進帝大喜立擢吏科給事中歷兵科左給事中劉宗周詹爾選等先後論之歛人楊光先訐其出身賤役及徇私納賄狀帝悉不究然啟新在事所條奏率無關大計御史王聚奎劾其濶職帝怒謫聚奎以兪都御史李先春議聚奎罰輕並奪其職久之御史倫之楷劾其請託受賕還鄉驕橫始詔行勘未上而啟新遭母憂採因劾其不忠不孝大奸大詐遂削啟新籍下撫按追贓擬罪啟新竟逃去不知所之國變後爲僧以卒時帝以寇氛未息民罹鋒鏑建齋南城採上疏諫不報已陳蕩寇二策曰明農業收勇敢帝善其言初溫體仁及薛國觀排異己及建言者周延儒再相盡反所爲廣引清流言路亦蜂起論事忌者乃造二十四氣之說以指朝士二十四人直達御前帝適下詔戒諭百官責言路尤至採疑帝已入其說乃上言陛下視言官重故責之嚴如聖諭云代人規卸爲人出缺者臣敢謂無其事然陛下何所見而云倘如二十四氣輩語此必大奸巨慝恐言者不利己而思以中之激至尊之怒箝言官之口人皆暗默誰與陛下言天下事者先是給事中方士亮論密雲巡撫王繼謨不勝任保定參政錢天錫因賁緣給事中楊枝起廖國遴以屬延儒及廷推遂得兪旨適帝有爲人出缺諭蓋舉廷臣積習告戒之非爲天錫發也採探之未審謂帝實指其事倉卒拜疏而帝於是時方

憂勞天下默告上帝戴罪省愆所頒戒諭詞旨哀痛讀者感傷塚廬反覆請難若深疑於帝者帝遂大怒曰採敢詰問詔旨藐玩特甚立下詔獄考訊掌鎮撫梁清宏以獄詞上帝曰採情罪特重且二十四氣之說類匿名文書見卽當毀何故累騰奏牘其速按實以聞時行人熊開元亦以建言下錦衣衛帝怒兩人甚密旨下衛帥駱養性令潛斃之獄養性懼以語同官同官曰不見田爾耕許顯純事乎養性乃不敢奉命私以語同鄉給事中廖國遴國遴以語同官曹良直良直卽疏劾養性歸過於君而自以爲功陛下無此旨不宜誣謗卽有之不宜洩請並誅養性開元養性大懼帝亦不欲殺諫臣疏竟留中會鎮撫再上採獄言掠訊者再供無異詞養性亦封還密旨乃命移刑官定罪尙書徐石麒等擬採戍開元贖徒帝責以徇情執法對狀乃奪石麒及郎中劉沂春官而逮採開元至午門並杖一百採已死採弟垓口瀟灑之乃復蘇仍繫刑部獄明年秋大疫命諸囚出外收保採開元出卽謁謝賓客帝以語刑部尙書張忻忻懼復禁之獄十七年二月始釋採戍宣州衛將赴戍所而都城陷福王立遇赦起故官丁父艱不赴國變後流寓蘇州以卒且死語其二子曰吾奉先帝命戍宣州死必葬我敬亭之麓二子如其言垓字如須崇禎十三年進士授行人塚下獄垓盡力營護後聞鄉邑破父殉難一門死者二十餘人垓請代兄繫獄釋採歸葬不許卽日奔喪奉母南走蘇州初垓爲行人見署中題名碑崔呈秀阮大鍼與魏大中並列立拜疏

請去一人名及大劍得志滋欲殺垓甚垓乃變姓名逃之盪波國亡乃解

熊開元字魚山嘉魚人天啟五年進士除崇明知縣調繁吳江崇禎四年徵授吏科給事中帝遣中官王應期等監視關隘軍馬開元抗疏爭不納王化貞久繫不決奸人張應時等疏頌其功請以身代死俾戴罪立功開元疏駁之言化貞家貲鉅萬每會朝審輒買燕市少年雜立道旁投熊廷弼瓦礫嗟嘆化貞不休以此熒惑上聽今應時復敢爲此請宜立肆化貞市朝化貞卒正法時有令有司徵賦不及額者不得考選給事中周瑞豹考選而後完賦帝怒貶謫之命如瑞豹者悉以聞於是開元及御史鄭友元等三人並貶二秩調外開元不赴官久之起山西按察司照磨遷光祿寺監事十三年遷行人司副左降官率驟遷開元以淹久頗缺望會光祿丞缺開元詣首輔周延儒述己困頓狀延儒適以他事輒命駕出開元大愠會帝以畿輔被兵求言官民陳事者報名會極門卽日召對開元欲論延儒次日卽請見帝召入文昭閣開元請密論軍事帝屏左右獨輔臣在開元不敢言但奏軍事而出越十餘日復請見帝御德政殿秉燭坐開元從輔臣入奏言易稱君不密則失臣臣不密則失身請輔臣暫退延儒等引退者再帝不許開元遂言陛下求治十五年天下日以亂必有其故帝曰其故安在開元言今所謀畫惟兵食寇賊不揣其本而未是圖雖終日夜不寢食求天下治無益也陛下臨御以來輔臣至數十人不過陛下曰賢左右曰

賢而已未必諸大夫國人皆曰賢也天子心膂股肱而任之易如此庸人在高位相繼爲好人禍天殃迄無衰止迨言官發其罪狀誅之斥之已敗壞不可復救矣帝與諸問久之疑開元有所爲曰爾意有人欲用乎開元辨無有且奏且頽目延儒延儒謝帝曰天下不治皆朕過於卿等何與開元言陛下令大小臣工不時面奏而輔臣在左右誰敢爲異同之論以速禍且昔日輔臣繁刑厚斂屏棄忠良賢人君子攻之今輔臣奉行德意釋繫囚蠲逋賦起廢籍賢人君子皆其所引用偶有不平私慨嘆而已帝責開元有私開元辨延儒等亦前爲解開元復請徧召廷臣問以輔臣賢否輔臣心事明諸臣流品亦別陛下若不察將吏徃情面賄賂失地喪師皆得無罪誰復爲陛下捐軀報國者延儒等奏情面不盡無賄賂則無有開元復言敵兵入口四十餘日未聞逮治一督撫帝曰督撫初推人以爲賢數月後卽以爲不賢必欲去之而後快邊方與內地不同使人何以展布開元言四方督撫率自監司明日廷推今日傳單其人姓名不列至期吏部出諸袖諸臣唯唯而已旣推後言官轉相採訪而其人伎倆亦自露於數月間故人得而指之非初以爲賢繼以爲不賢也帝命之退延儒等請令補牘從之當是時開元欲發延儒罪以其在側不敢言而延儒慮其補牘謀沮之大理卿孫晉兵部侍郎馮元颯責開元首輔多引賢者首輔退賢者且盡遂開元意動大理丞吳履中至亦以開元言爲驟禮部郎中吳昌時者開元知吳江時所拔士也復致書

言之開元乃止述奏辭不更及延儒他事帝方信延儒

大清兵又未退焦勞甚得奏大怒令錦衣衛逮治衛帥駱養性開元鄉人也雅怨延儒次日卽以獄上帝益怒開元讒譖輔弼必使朕孤立於上乃便彼行私必有主使者養性不加刑溺職甚其再嚴訊以聞十二月朔嚴刑詣供主謀開元堅不承而盡發延儒之隱養性具以聞帝乃廷杖開元繫獄始方士亮劾罷密雲巡撫王繼謨參政錢天錫得巡撫御史孫鳳毛發其事劾給事中楊枝起廖國遴爲天錫實緣因言開元面奏實二人主之欲令邱瑜秉政陳演爲首輔御史李陳玉亦言之帝以開元已下吏不問而責令鳳毛陳奏鳳毛死其子訴寃謂國遴枝起酖殺之兩人及天錫並削職下獄士亮又言恐代繼謨者未能勝繼謨繼謨得留任十六年六月延儒罷言官多救開元者不報刑部擬贖徒不許明年正月遣戍杭州未幾京師陷福王召起吏科給事中丁母艱不赴唐王立起工科左給事中連擢太常卿左僉都御史隨征東閣大學士乞假歸汀州破棄家爲僧隱蘇州之靈巖以終士亮歛縣人崇禎四年進士歷嘉興福州推官擢兵科給事中與同官朱徽倪仁禎等謁大學士謝陞於朝房陞言人主以不用聰明爲高今上太用聰明致天下盡壞又曰款事諸君不必言皇上祈籤奉先殿意已決諸人退謂陞誹謗君父洩禁中語仁禎國遴等交章論之斥陞大不道無人臣禮士亮及他言官繼之疏數十上帝大怒削陞籍已而士亮

連劾諸督撫張福臻徐世廢朱大典葉廷貴及兵部侍郎呂大器甘肅總兵馬燦事多施行又請召舊諫臣姚思孝何楷李化龍張作楫張焜芳李模詹爾選李右讜林蘭友成勇傅元初而恤已死者吳執御魏呈潤傅朝佑吳彥芳王績燦萬樞帝頗採納周延儒出督師請士亮贊畫軍務延儒獲譴士亮亦削職下獄久之釋歸福王時復官國變後卒

詹爾選字思吉撫安人崇禎四年進士授太常博士八年擢御史時詔廷臣舉守令爾選言縣令多而難擇莫若精擇郡守郡守賢縣令無不賢因請起用侍郎陳子壯推官湯開遠報聞明年疏劾陳啟新宜召九卿科道覲面敷陳罄其底蘊果有他長然後授官遠爾授官非所以重名器吏部尙書謝陞大學士溫體仁不加駁正尸素可愧帝怒未幾大學士錢士升以爭武生李璉搜括富戶忤旨引罪乞休去爾選上疏曰輔臣引咎求黜遽奉回籍之諭夫人臣所以不肯言者其源在不肯去耳輔臣肯言肯去臣實榮之獨不能不爲朝廷惜此一舉也璉以非法導主上其端一開大亂將至輔臣憂心如焚忽奉改擬之命遂爾執奏皇上方嘉許不暇顧以爲疑君要譽耶人臣無故疑其君非忠也乃謂吾君萬舉萬當者第容悅之借名必非忠人臣沽名義所不敢出也乃人主不以名譽鼓天下使其臣尸位保寵寡廉鮮恥亦必非國家利況今天下疑皇上者不少矣將驕卒惰尙方不靈億萬民命徒供武夫貪冒則或疑過於右武穿

札與操觚並課非是者弗錄人見賣牛買馬絀德齊力徒使強寇混跡於道途父兄莫必其子弟則或疑緩於敷文免覲之說行上意在甦民困也而或疑朝宗之大義不敵數萬路用之金錢駁問之事煩上意在懲奸頑也而或疑明啟之刑書幾禁加等之紛亂其君子憂驅策之無當其小人懼陷累之多門明知一切苟且之政或拊心愧恨或對眾歎獻輔臣不過偶因一事代天下發憤耳而竟鬱鬱以去恐後之大臣無復有敢言者矣大臣不敢言而小臣愈難望其言矣所日與皇上言者惟苛細刻薄不識大體之徒似忠似直如狂如癡售則挺身招搖敗則潛形遁竄駭心志而燭耳目毀成法而釀隱憂天下事尙忍言哉祈皇上以遠大宅心以簡靜率憲責大臣彌違之義作言官敢諫之風寧獻可替否毋藉口聖明獨斷掩聖主之謙冲竄進禮退義毋藉口君恩未酬飾引身之濡滯臣愚不勝惓惓疏入帝震怒召見武英殿詰之曰輔臣之去前旨甚明汝安得爲此言對曰皇上大開言路輔臣乃以言去國恐後來大臣以言爲戒非皇上求言意帝曰建言乃諫官事大臣何建言對曰大臣雖在格心然非言亦無由格大臣止言其大者決無不言之理大臣不言誰當言者帝曰朕如此焦勞天下尙疑朕乎卽尙方劍何嘗不賜彼不能用何言不靈對曰誠如聖諭但臣見督理有參疏未蒙皇上大處分與未賜何異帝曰刑官擬罪不合朕不當駁乎對曰刑官不職但當易其人不當侵其事帝曰汝言一切苟且之政何者爲苟且對曰加派帝

曰加派因賊未平賊平何難停汝尙有言乎對曰搜括抽扣亦是帝曰此供軍國之用非輸之內帑汝更何言對曰卽捐助亦是帝曰本令願捐者聽何嘗強人時帝聲色俱厲左右皆震懾而爾選詞氣不撓帝又請發憤諸語及帖黃簡略斥爲欺罔命錦衣提下爾選叩頭曰臣死不足惜皇上幸聽臣事尙可爲卽不聽亦可留爲他日思帝愈怒罪且不測諸大臣力救乃命繫於直廬明日下都察院議罪議止停俸帝以譖涉誇詡并罪視草御史張三謨令吏部同議請鑄五級以雜職用復不許乃削籍歸自後言者屢薦皆不聽十五年給事中沈迅左懋第相繼薦有詔召還未及赴而都城陷福王立首起故官未上羣小用事憚爾選鯁直令補外僚遂不出國變後又十二年而終

湯開遠字伯開主事顯祖子也早負器識經濟自許崇禎五年由舉人爲河南府推官帝惡廷臣玩愒持法過嚴開遠疏諫曰陛下臨御以來明罰敕法自小臣至大臣蒙重譴下禁獄者相繼幾於刑亂國用重典矣見廷臣薦舉不當疑爲黨徇惡廷臣執奏不移疑爲藐抗以策勵望諸臣於是戴罪者多而不閉以立功之路以詳慎責諸臣於是引罪者衆而不諒其致誤之由墨吏宜逮然望稍寬出入無絀能臣至三時多害五方交警諸臣忱參罰惟急催科民窮則易爲亂陛下寬一分在臣子卽寬一分在民生此可不再計決者尤望推諸臣以心待諸臣以禮諭中外法司以平允至錦衣禁獄非寇賊奸宄不宜輕入帝怒

摘其疏中桮楊慘毒遍施勞臣語責令指實乃上奏曰時事孔棘諸臣有過可議亦有勞可準有罪可程亦有情可原究之議過不足懲過而後事轉因前事以灰心聲罪不足服罪而故者更藉誤者以實口綜核太過則要領失措懲創太深則本實多缺往往上以爲宜詳宜新之事而下以爲宜略宜仍之事朝所爲縲辱擯棄不少愛之人又野所爲推重愾嘆不可少之人上與下異心朝與野異議欲天下治平不可得也蘇州僉事左應選任昌黎縣令率土著保孤城事平之日擢任監司乃用小過卒以臧擬城池失守者既不少貸捍禦著績者又不獲原諸臣安所適從哉事急則鉅萬可捐事平則錙銖必較向使昌黎不守同於遵永不知費朝廷幾許金錢安所得涓滴而問之臣所惜者此其一給事中馬思理御史高倬值草場火發狂奔盡氣無救燎原此不過爲法受過耳更欲以他罪論則甚矣今歲盛夏雪雹地震京圻草場不蕪自焚陛下不寬刑修省反嚴鞫而長繫之非所以召天和稱善事也臣所惜者此其一宣大巡按胡良機陛下知其諳練兩任巖疆尋因過誤褫革輿論惜之豈成命終難反汗哉臣所惜者此其一監兌主事吳澧宵旦河干經營漕事運弁稽違量行責戒乃褫革之又欲究治之夫兵諱則爲兵易將將諱則爲武抑文勇於諱而怯於鬪安用此驕兵驕將爲也臣所惜者此又其一未復爲都御史陳于廷易應昌申辨帝怒切責之河南流賊大熾開遠監左良玉軍躬擐甲胄屢致克捷帝以天下用兵意頗重武督撫

失事多速繫而大將率姑息開遠以爲偏八年十月上疏曰比年寇賊縱橫撫鎮爲要乃陛下於撫臣則懲創之於鎮臣則優遇之試觀近日諸撫臣有不褫奪不囚繫者乎諸帥臣及偏裨有一禮貌不崇陞廢不遂者乎卽觀望敗衄罪狀顯著者有不寬假優容者乎夫懲創撫臣欲其惕而戒也優遇武臣欲其感而奮也然而封疆日破壞寇賊日蔓延者分別之法少也撫臣中清操如沈棨幹濟如練國事捍禦兩河身自爲將如元默拮据兵事沮賊長驅如吳甡或麗爰書或登白簡其他未可悉數而武臣桀驁恣睢無日不上條陳爭體統一旦有警輒逡巡退縮卽嚴旨屢頒寔如充耳如王樸尤世勛王世恩輩其罪可勝誅哉秦撫甘學闕有法紀全球一疏請正縱賊諸弁以法明旨顧切責之然則自今以後敗將當不問矣文臣未必無才能乃有寧甘斥黜必不肯任不敢任者以任亦罪不任亦罪不任之罪猶輕而任之罪更重也誠欲使諸臣踴躍任事在寬文法原情實分別去留毋以一眚棄賢才至韎韜之夫不使怯且欺者倖乎其間則賞罰以平文武用命矣帝以撫臣不任者無所指實責令再陳乃上言曰朝廷賞罰無章於是諸臣之不肯任不敢任者罪而肯任敢任者亦罪且其罪反重勸懲無當勘定大亂未之前聞從來無訕督臣以伸庸帥者至今而楊嗣昌不得關其說從來無抑言路以伸劣弁者至今而王肇坤不得保其秩王樸恆怯暴著聽敵飽去猶得與吳甡並論播之天下不大爲口實哉若撫臣之不肯任不敢任者

如陝西之胡廷晏山西之仙克謹宋統殷許鼎臣何以當日處分視後皆輕練國事元默承大壞極儼之後竭力撐持何以當日處分較前更重且近日爲辦寇而誅督臣者一逮督臣撫臣者二褫撫臣者亦二甚至巡方與撫臣並議而并逮兩按臣計典與失事牽合而并褫南樞臣若監司守令之獲重譴者不可勝紀試問前後諸帥臣有一誅且逮者乎卽降而偏裨有一誅且逮者乎甚至避寇縱寇養寇助寇者皆置弗問卽或處分不過降級戴罪而已然則諸將之不肯任不敢任者直謂之無罪可乎是陛下於文武二途委任同責成不同明旨所謂一體者終非一體矣不特此也按臣曾週當舊撫艱去力障寇鋒初非失事乃竟從逮配將來無肯任敢任之按臣矣道臣祝萬齡拮据兵食寢餌俱廢至疽發於背而遽行削籍將來無肯任敢任之監司矣史洪謨作令宜陽戰守素備賊渡澠池不敢薄城及知六安復有全城之績而褫奪驟加將來無肯任敢任之州縣矣賊薄永寧舊蜀撫張論與子給事鼎延傾貲募士夙夜登陴及論物故鼎延請恤并其子官奪之將來無肯任敢任之鄉官矣吏部惟雜職多弊臣鄉吳羽文竭力釐剔致刀筆賈豎鬩然而起羽文略不爲撓乃以起廢一事長繫深求將來無肯任敢任之部曹矣臣讀明旨謂諸事皆經確核以議處有銓部議罪有法司稽核糾舉有按臣也不知詔旨一下銓部卽議降議革有肯執奏曰此不當處者乎一下法司卽擬配擬戍有肯執奏曰此不當罪者乎至查核失事按臣不過

據事上聞有原功中之罪罪中之功乞貸於朝廷者乎是非諸臣不肯分別也知陛下之意重創言之必不聽或反以甚其罪也所以行間失事無日不議處議罪而於蕩寇安民毫無少補則今日所少者豈非大公之賞罰哉帝得奏大怒命削籍撫按解京訊治河南人聞之若失慈母左良玉偕將士七十餘人合奏乞留巡按金光辰亦備列其功狀以告帝爲動容命釋還戴罪辦賊十年正月討平舞陽大盜楊四論功當進秩總理王家禎復薦之乃擢按察僉事監安廬二郡軍其年冬太子將出閣奏言陛下言教不如身教請謹幽獨恤民窮優大臣容直諫寬拙吏薄貨財疏滯獄俾太子得習見習聞爲他日出治臨民之本帝深納之是時賊大擾江北開遠數有功巡撫史可法薦其治行卓異進秩副使監軍如故十三年與總兵官黃得功等大破革裏眼諸賊賊遂乞降朝議將用爲河南巡撫竟以勞瘁卒官軍民咸爲泣下贈太僕少卿

成勇字仁有安樂人天啟五年進士授饒州推官謁鄒元標於吉水師事之中使至知府以下郊迎勇不往且捕笞其從人丁內外艱歷開封歸德二府推官流賊攻歸德擊走之崇禎十年行取入京時變考選例優者得爲翰林公論首勇而吏部尙書田唯嘉抑之勇得南京吏部主事以去明年二月帝御經筵問講官保舉考選得失諭德黃景昉訟勇及朱天麟屈帝親策諸臣天麟得翰林而勇以先赴南京不與

用御史涂必泓言授南京御史楊嗣昌奪情入閣言者咸獲譴勇憤其年九月上疏言嗣昌秉樞兩年一經莫展邊警屢驚羣寇滿野清議不畏名教不畏萬世公義不畏臣竊爲青史慮疏入帝大怒削籍提訊請主使姓名勇獄中上書言臣十二年外吏數十日南臺無權可招無賄可納不知有黨帝怒竟戍靈波衛中外薦者十餘疏不召後以御史張瑋言執政合詞請擢用帝以勇有罪方新不當復職命以他官用甫闔命而京師陷福王時起御史不赴披緇爲僧越十五年而終

陳龍正字惕龍嘉善人父于玉福建按察使龍正遊高攀龍門崇禎七年成進士授中書舍人時政尙縈敷中外爭爲深文以避罪東廠緝事尤寃濫十一年五月熒惑守心下詔修省有哀懇上帝語龍正讀之泣上養和好生二疏略曰回天在好生好生無過減死臯陶贊舜曰罪疑惟輕是聖人於折獄不能無失也蓋獄情至隱人命至重故不貴專信而取兼疑不務必得而甘或失臣居家所見聞四方罪犯無甚窮凶奇謀者及來京師此等乃無虛月且罪案一成立就誅磔亦宜有所懲戒何犯者若此纍纍臣願陛下懷帝舜之疑竇使聖主有過仁之舉臣下獲不經之愆蓋陰指東廠事也越數日果諭提督中官王之心不得輕視人命云其冬京師戒嚴詔廷臣舉堪任督撫者御史葉紹勳舉龍正久之刑部主事趙奕昌請訪求天下真賢才帝命奕昌自舉亦以龍正對帝皆不用龍正居冷曹好言事十二年十月彗星見是歲

冬至大雷電雨雹十三年二月京師大風天黃日昏淡旬不解龍正皆應詔條奏大指在聽言省刑十五年夏帝復下詔求言云拯困甦殘不知何道龍正上言拯困甦殘以生財爲本但財非折色之謂以折色爲財則取於人而易盡必知本色爲財則生於地而不窮今持籌之臣曰設處曰搜括曰加派皆損下之事聚斂之別名也民日病國奚由足臣謂宜專意墾荒申明累朝永不起科之制招集南人巨賈盡墾荒田使畿輔河南山東菽粟日多則京倉之積邊軍之餉皆可隨宜取給或平糶或拜爵或中監國家命脉不專倚數千里外之轉運則民間加派自可盡除然是時中原多殘破有田不得耕龍正執常理而已翌日復進用人探本疏帝皆優容焉給事中黃雲師劾其學非而博言僞而辯又以進墾荒議爲陵競帝不問時議欲用龍正爲吏部御史黃澍以僞學誅之十七年正月左遷南京國子監丞甫抵家而京師陷福王立於南京用爲祠祭員外郎不就南京不守龍正已得疾遂卒

贊曰崇禎時僉壬相繼枋政天下多故事之可言者衆矣許譽卿諸人抨擊時宰有直臣之風然傅朝佑死杖下姜採熊開元得重譴而詹爾選抗雷霆之威顧獲放免言天子易言大臣難信哉湯開遠以疎遠外僚侃侃論事憤惋溢於辭表就其所列國勢亦重可慨矣夫

明史卷一百五十八終

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奏

敕修

楊

李維翰
周永春

袁應泰

薛國用

熊廷弼

王化貞

袁崇煥

毛文龍

趙光抃

范志完

楊鎬商邱人萬厯八年進士歷知南昌益二縣入為御史坐事調大理評事再遷山東參議分守遼海道嘗偕大帥董一元雪夜度墨山襲蒙古炒花帳大獲進副使墾荒田百三十餘頃歲積粟萬八千餘石進參政二十五年春偕副將李如梅出塞失部將十士卒百六十餘人會朝鮮再用兵命免鎬罪擢右叅都御史經略朝鮮軍務鎬未至先奏陳十事請令朝鮮官民輸粟得增秩授官贖罪及鄉吏奴丁免役大氏皆苟且之事又以朝鮮君臣隱藏儲蓄不餉軍劾奏其罪由是朝鮮多怨當是時倭將行長清正等已入據南原全州引兵犯全羅慶尙逼王京銳甚賴沈惟敬就禽鄉導乃絕而朝鮮兵燹之餘千里蕭條賊掠無所得故但積粟全羅為久留計而中國兵亦漸集九月朔鎬始抵王京會副將解生等屢挫賊朝鮮軍亦數有功倭乃退屯蔚山十二月鎬會總督邢玠提督麻貴議進兵方略分四萬人為三協副將高策將中軍李如梅將左李芳春解生將右合攻蔚山先以少兵嘗賊賊出戰大敗悉奔據島山結三柵城外

以自固鎬官遼東時與如梅深相得及是遊擊陳寅連破賊二柵第三柵垂拔矣鎬以如梅未至不欲寅
功出其上遽鳴金收軍賊乃閉城不出堅守以待援官兵四面圍之地泥淖且時際窮冬風雪裂膚士無
固志賊日夜發礮用藥煮彈遇者輒死軍兵攻圍十日不能下賊知官兵懈詭乞降以緩之明年正月二
日行長救兵驟至鎬大懼狼狽先奔諸軍繼之賊前襲擊死者無算副將吳惟忠遊擊茅國器斷後賊乃
遁輻重多喪失是役也謀之經年傾海內全力合朝鮮通國之衆委棄於一旦舉朝嗟恨鎬既奔挈貴奔
趨慶州懼賊乘襲盡撤兵還王京與總督玠詭以捷聞諸營上軍籍士卒死亡殆二萬鎬大怒屏不奏止
稱百餘人鎬遭父喪詔奪情視事御史汪先岸嘗劾其他罪閣臣庇之擬旨褒美有久不下贊畫主事丁
應泰聞鎬敗詣鎬咨後計鎬示以張位沈一貫手書并所擬未下旨揚揚詡功伐應泰憤抗疏盡列敗狀
言鎬當罪者二十八可羞者十竝劾位一貫扶同作奸帝震怒欲行法首輔趙志皋營救乃罷鎬令聽勘
以天津巡撫萬世德代之已東征事竣給事中楊應文敘鎬功詔許復用三十八年起撫遼東襲炒花於
鎮安破之御史田生金劾其開聲時遼左多事鎬力薦李如梅請復用爲大將爲給事中麻僖御史楊州
鶴所劾鎬疏辨乞休帝不問鎬竟引去四十六年四月我

大清兵起破撫順守將王命印死之遼東巡撫李維翰趣總兵官張承允往援與副總兵顏廷相等俱戰

殺遠近大震廷議鎬熟諳遼事起兵部右侍郎往經略既至申明紀律徵四方兵圍大舉至七月

大清兵由鴉鶻關克清河副將鄒儲賢戰死詔賜鎬尙方劍得斬總兵以下官乃斬清河逃將陳大道高
炫徇軍中其冬四方援兵大集遂議進師時蚩尤旗長竟天彗見東方星隕地震識者以爲敗徵大學士
方從哲兵部尙書黃嘉善兵科給事中趙興邦等皆以師久餉匱發紅旗日趨鎬進兵明年正月鎬乃會
總督汪可受巡撫周永春巡按陳玉庭等定議以二月十有一日誓師二十一日出塞兵分四道總兵官
馬林出開原攻北杜松出撫順攻西李如柏從鴉鶻關出趨清河攻南東南則以劉綎出寬奠由涼馬佃
搗後而以朝鮮兵助之號大兵四十七萬期三月二日會二道關並進天大雪兵不前師期洩松欲立首
功先期渡渾河進至二道關伏發軍盡覆林統開原兵從三岔口出聞松敗結營自固

大清兵乘高奮擊林不支遂大敗遁去鎬聞急檄止如柏綎兩軍如柏遂不進綎已深入三百里至深河
大清兵擊之而不動已乃張松旗幟被其衣甲給綎既入營營中大亂綎力戰死惟如柏軍獲全文武將
吏前後死者三百一十餘人軍士四萬五千八百餘人亡失馬駝甲仗無算敗書聞京師大震御史楊鶴
疏劾之不報無何開原鐵嶺又相繼失言官交章劾鎬逮下詔獄論死崇禎二年伏法李維翰睢州人萬
曆四十四年以右副都御史巡撫遼東遼三面受敵無歲不用兵自稅使高淮脛削十餘年軍民益困而

先後撫臣皆庸才玩愒苟歲月天子又置萬幾不理邊臣呼籲漠然不聞致遼事大壞及張承允覆沒維翰猶獲善歸至天啟初始下吏論死周永春金鄉人官禮科都給事中齊黨方熾永春與忝詩教爲之魁尋由太常少卿擢右僉都御史代維翰爲巡撫值喪敗之後佐經略調度軍食拮据勞瘁越二年罷歸天啟初言官追論開原失陷罪遣戍

袁應泰字大來鳳翔人萬曆二十三年進士授臨漳知縣築長堤四十餘里捍禦漳水調繁河內穿太行山引沁水成二十五堰溉田數萬頃鄰邑皆享其利河決朱旺役夫多死者應泰設蓆爲廬飲食作止有度民懽然趨事治行冠兩河遷工部主事歷兵部武選郎中汰遣假冒世職數百人遷淮徐兵備參議山東大饑設粥廠哺流民繕城濬濠修先聖廟饑者盡得食更搜額外稅及漕折馬價數萬金先後發振戶部劾其擅移官廩時已遷副使遂移疾歸久之起河南右參政以按察使治兵永平遼事方棘應泰練兵繕甲修亭障飭樓櫓關外所需芻蕘火藥之屬呼吸立應經略熊廷弼深賴焉泰昌元年九月擢右僉都御史代周永春巡撫遼東踰月擢兵部右侍郎兼前職代廷弼爲經略而以薛國用爲巡撫應泰受事卽刑白馬祀神誓以身委遼疏言臣願與遼相終始更願文武諸臣無懷二心與臣相終始有託故謝事者罪無赦熹宗優詔褒答賜尙方劍乃戮貪將何光先汰大將李光榮以下十餘人遂謀進取撫順議用兵

十八萬大將十人上奏陳方略應泰歷官精敏強毅用兵非所長規畫頗疎廷弼在邊持法嚴部伍整肅應泰以寬矯之多所更易而是時蒙古諸部大饑多入塞乞食應泰言我不急救則彼必歸敵是益之兵也乃下令招降於是歸者日衆處之遼瀋二城優其月廩與民雜居潛行淫掠居民苦之議者言收降過多或陰爲敵用或敵雜間諜其中爲內應禍且叵測應泰方自詡得計將藉以抗

大清兵會三岔兒之戰降人爲前鋒陣死者二十餘人應泰遂用以釋羣議明年天啟改元三月十有二日我

大清兵來攻瀋陽總兵官賀世賢尤世功出城力戰敗還明日降人果內應城遂破二將戰死總兵官陳策童仲揆等赴援亦戰死應泰乃撤奉集威寧諸軍并力守遼陽引水注濠沿濠列火器兵環四面守十有九日

大清兵臨城應泰身督總兵官侯世祿李秉誠梁仲善姜勰朱萬良出城五里迎戰軍敗多死其夕應泰宿營中不入城明日

大清兵掘城西開以洩濠水分兵塞城東水口擊敗諸將兵遂渡濠大呼而進屢戰良久騎來者益衆諸將兵俱敗望城奔殺溺死者無算應泰乃入城與巡按御史張銓等分陴固守諸監司高出牛維曜胡嘉

棟及督餉郎中傅國並踰城遁人心離沮又明日攻城急應泰督諸軍列楯大戰又敗薄暮譙樓火

大清兵從小西門入城中大亂民家多啟扉張炬以待婦女亦盛飾迎門或言降人導之也應泰居城樓知事不濟太息謂銓曰公無守城責宜急去吾死於此遂佩劍印自縊死婦弟姚居秀從之僕唐世明憑屍大慟縱火焚樓死事聞贈兵部尙書予祭葬官其一子國用洛南人歷官山東右參政分守海遼道以右僉都御史代應泰巡撫遼東應泰死廷議將起廷弼道遠未至乃進國用兵部右侍郎代應泰爲經略歷官醇謹久於遼日夜憂戰守備會

大清兵不至得安其位無何請告竟卒於官

熊廷弼字飛百江夏人萬厯二十五年舉鄉試第一明年成進士授保定推官擢御史三十六年巡按遼東巡撫趙楫與總兵官李成梁棄寬奠新疆八百里徙編民六萬家於內地已論功受賞給事中宋一韓論之下廷弼覆勘具得棄地驅民狀劾兩人罪及先任按臣何爾健康丕揚黨庇疏竟不下時有詔興屯廷弼言遼多曠土歲於額軍八萬中以三分屯種可得粟百二十萬石帝優詔褒美命推行於諸邊邊將好搗巢輒生釁端廷弼言防邊以守爲上繕垣建堡有十五利奏行之歲大旱廷弼行部金州禱城隍神約七日雨不雨毀其廟及至廣寧踰三日大書白牌封劍使使往斬之未至風雷大作雨如注遼人以爲

神在遼數年杜欒遺核軍實援劾將吏不事姑息風紀大振督學南畿嚴明有聲以杖死諸生事與巡按御史荆養喬相許奏養喬投劾去廷弼亦聽勘歸四十七年楊鎬既喪師廷議以廷弼熟邊事起大理寺丞兼河南道御史宣慰遼東旋擢兵部右侍郎兼右僉都御史代鎬經略未出京開原失廷弼上言遼左京師肩背河東遼鎮腹心開原又河東根本欲保遼東則開原必不可棄敵未破開原時北關朝鮮猶足爲腹背患今已破開原北關不敢不服遣一介使朝鮮不敢不從旣無腹背憂必合東西之勢以交攻然則遼瀋何可守也乞速遣將士備芻糧修器械毋窘臣用毋緩臣期毋中格以沮臣氣毋旁撓以掣臣肘毋獨遣臣以艱危以致誤臣誤遼兼誤國也疏入悉報允且賜尙方劍重其權甫出關鐵嶺復失瀋陽及諸城堡軍民一時盡竄遼陽洵廷弼兼程進遇逃者諭令歸斬逃將劉遇節王捷王文鼎以祭死節士誅貪將陳倫劾罷總兵官李如楨以李懷信代督軍士造戰車治火器濬濠繕城爲守禦計令嚴法行數月守備大固乃上方略請集兵十八萬分布豐陽清河撫順柴河三岔兒鎮江諸要口首尾相應小警自爲堵禦大敵互爲應援更挑精悍者爲遊徼乘間掠零騎擾耕牧更番迭出使敵疲於奔命然後相機進剿疏入帝從之廷弼之初抵遼也令僉事韓原善往撫瀋陽憚不肯行繼命僉事閻鳴泰至虎皮驛慟哭而返廷弼乃躬自巡歷自虎皮驛抵瀋陽復乘雪夜赴撫順總兵賀世賢以近敵沮之廷弼曰冰雪滿地

敵不料我來鼓吹入時兵燹後數百里無人跡廷弼祭諸死事者而哭之遂耀兵奉集相度形勢而還所至招流移繕守具分置士馬由是人心復固廷弼身長七尺有膽知兵善左右射自按遼卽持守邊議至是主守禦益堅然性剛負氣好謾罵不爲人下物情以故不甚附明年五月我

大清兵略地花嶺六月略王大人屯八月略蒲河將士失亡七百餘人諸將世賢等亦有斬獲功而給事中姚宗文騰謗於朝廷弼遂不安其位宗文者故戶科給事中丁憂歸還朝欲補官而吏部題請諸疏率數年不下宗文患之假招徠西部名屬當事薦己疏屢上不得命宗文計窮致書廷弼令代請廷弼不從宗文由是怨後黃緣復吏科閹視遼東士馬與廷弼議多不合遼東人劉國縉先爲御史坐大計謫官遼事起廷議用遼人遂以兵部主事贊畫軍務國縉主募遼人爲兵所募萬七千餘人逃亡過半廷弼聞於朝國縉亦怨廷弼爲御史時與國縉宗文同在言路意氣相得並以排東林攻道學爲事國縉輩以故意望弼廷弼不能如前益相失宗文故出國縉門下兩人益相比而傾廷弼及宗文歸疏陳遼土日感詆廷弼廢羣策而雄獨智且曰軍馬不訓練將領不部署人心不親附刑威有時窮工作無時止復鼓其同類攻擊欲必去之御史顧慥首劾廷弼出關踰年漫無定畫蒲河失守匿不上聞荷戈之士徒供挑濟尙方之劍逞志作威當是時光宗崩熹宗初立朝端方多事而封疆議起御史馮三元劾廷弼無謀者八欺

君者三謂不罷遼必不保詔下廷議廷弼憤抗疏極辨且求罷而御史張修德劾其破壞遼陽廷弼益憤再疏自明云遼已轉危爲安臣且之生致死遂繳還尙方劍力求罷斥給事中魏應嘉復劾之朝議允廷弼去以袁應泰代廷弼乃上疏求勘言遼師覆沒臣始驅羸卒數千踉蹌出關至杏山而鐵嶺又失廷臣咸謂遼必亡而今且地方安堵舉朝帖席此非不操練不部署者所能致也若謂擁兵十萬不能斬將禽王誠臣之罪然求此於今日亦豈易言令箭催而張帥殞命馬上催而三路喪師臣何敢復蹈前軌三元應嘉修德等復連章極論廷弼卽請三人往勘帝從之御史吳應奇給事中楊漣等力言不可乃改命兵科給事中朱童蒙往廷弼復上疏曰臣蒙恩回籍聽勘行矣但臺省責臣以破壞之遼遣他人臣不得不一一陳之於上今朝堂議論全不知兵冬春之際敵以冰雪稍緩闕然言師老財匱馬上促戰及軍敗始愀然不敢復言比臣收拾甫定而愀然者又復闕然責戰矣自有遼難以來用武將用文吏何非臺省所建白何嘗有一效疆場事當聽疆場吏自爲之何用拾帖括語徒亂人意一不從輒怫然怒哉及童蒙還奏備陳廷弼功狀末言臣入遼時士民垂泣而道謂數十萬生靈皆廷弼一人所留其罪何可輕議獨是廷弼受知最深蒲河之役敵攻瀋陽策馬趨救何其壯也及見官兵驚弱遽爾乞骸以歸將置君恩何地廷弼効在存遼微勞雖有可紀罪在負君大義實無所逃此則罪浮於功者矣帝以廷弼力保危城仍

議起用天啟元年瀋陽破應泰死廷臣復思廷弼給事中郭鞏力諫之并及閣臣劉一燝及遼陽破河西軍民盡奔自塔山至閭陽二百餘里烟火斷絕京師大震一燝曰使廷弼在遼當不至此御史江秉謙直言廷弼保守危遼功兼以排擠勞臣爲鞏罪帝乃治前劾廷弼者貶三元修德應嘉鞏三秩除宗文名御史劉廷宣救之亦被斥乃復詔起廷弼於家而擢王化貞爲巡撫化貞諸城人萬曆四十一年進士由戶部主事歷右參議分守廣靈蒙古炒花諸部長乘機窺塞下化貞撫之皆不敢動朱童蒙勘事還極言化貞得西人心勿輕調噶撫事化貞亦言遼事將壞惟發帑金百萬亟款西人則敵顧忌不敢深入會遼藩相繼亡廷議將起廷弼御史方震孺請加化貞秩便宜從事令與薛國用同守河西乃進化貞右僉都御史巡撫廣靈廣寧城在山隈登山可俯瞰城內恃三岔河爲阻而三岔之黃泥窪又水淺可涉廣靈止辱卒于化貞招集散亡復得萬餘人激厲士民聯絡西部人心稍定遼陽初失遠近震驚謂河西必不能保化貞提弱卒守孤城氣不攝時望赫然中朝亦謂其才足倚悉以河西事付之而化貞又以登萊天津兵可不設諸鎮入衛兵可止當事益信其有才所奏請輒報可時金復諸衛軍民及東山曠徒多結砦自固以待官軍其逃入朝鮮者亦不下二萬化貞請鼓舞諸人優以爵祿俾自奮於功名詔諭朝鮮襲以忠義勉之同仇帝亦從之至六月廷弼入朝首請免言官貶謫帝不可乃建三方布置策廣靈用馬步列壘河

上以形勢格之纔敵全力天津登萊各置舟師乘虛入南衛動搖其人心敵必內顧而遼陽可復於是登萊議設巡撫如天津以陶朗先爲之而山海特設經略節制三方一事權遂進廷弼兵部尙書兼右副都御史駐山海關經略遼東軍務廷弼因請尙方劍請調兵二十餘萬以兵馬芻糧器械之屬責成戶兵工三部白監軍道臣高出胡嘉棟督餉郎中傅國無罪請復官任事議用遼人故贊畫主事劉國縉爲登萊招練副使夔州同知佟卜年爲登萊監軍僉事故臨洮推官洪敷教爲職方主事軍前贊畫用收拾遼人心並報允七月廷弼將啟行帝特賜麒麟服一彩幣四宴之郊外命文武大臣陪餞異數也又以京營選鋒五千護廷弼行先是袁應泰死薛國用代爲經略病不任事化貞乃部署諸將沿河設六營營置參將一人守備二人畫地分守西平鎮武柳河盤山諸要害各置戍設防議旣上廷弼不謂然疏言河窄難恃堡小難容今日但宜固守廣寧若駐兵河上兵分則力弱敵輕騎潛渡直攻一營力必不支一營潰則諸營俱潰西平諸戍亦不能守河上止宜置遊徼兵更番出入示敵不測不宜屯聚一處爲敵所乘自河抵廣寧止宜多置烽墩西平諸處止宜稍置戍兵爲傳烽哨探之用而大兵悉聚廣寧相度城外形勢犄角立營深壘高柵以俟蓋遼陽去廣寧三百六十里非敵騎一日能到有聲息我必預知斷不宜分兵防河先爲自弱之計也疏上優旨褒答會御史方震孺亦言防河六不足恃議乃寢而化貞以計不行愠甚盡

委軍事於廷弼廷弼乃請申諭化貞不得藉口節制坐失事機先是四方援遼之師化貞悉改爲平遼遼人多不悅廷弼言遼人未叛乞改爲平東或征東以慰其心自是化貞與廷弼有隙而經撫不和之議起矣八月朔廷弼言三方建置須聯絡朝鮮請亟發敕使往勞彼國君臣俾盡發八道之師連營江上助我聲勢又發詔書憫恤遼人之避難彼國者招集團練別爲一軍與朝鮮軍合勢而我使臣卽權駐義州控制聯絡俾與登萊聲息相通於事有濟更宜發銀六萬兩分犒朝鮮及遼人而臣給與空名劄付百道俾承制拜除其東山曠徒能結聚千人者卽署都司五百人者署守備將一呼立應而一二萬勁兵可立致也因薦監軍副將梁之垣生長海濱習朝鮮事可充命使帝立從之且命如行人奉使故事賜一品服以寵其行之垣乃列上重事權定職掌八事帝亦報可之垣方與所司議兵餉而化貞所遣都司毛文龍已襲取鎮江奏捷舉朝大喜亟命登萊天津發水師二萬應文龍化貞督廣寧兵四萬進據河上合蒙古軍乘機進取而廷弼居中節制命旣下經撫各鎮互觀望兵不果進頃之化貞備陳東西情形言敵棄遼陽不守河東失陷將士日夜望官軍至卽執敵將以降而西部虎墩兔炒花咸願助兵敵兵守海州不過二千河上止遼卒三千若濟師夜襲勢在必克敵南防者聞而北歸我據險以擊其惰可盡也兵部尙書張鶴鳴以爲然奏言時不可失御史徐卿伯復趣之請令廷弼進駐廣寧薊遼總督王象乾移鎮山海會化

貞復馳奏敵因官軍收復鎮江遂驅掠四衛屯民屯民據鐵山死守傷敵三四千人敵圍之益急急宜赴救於是兵部愈促進師化貞卽以是月渡河廷弼不得已出關次右屯而馳奏海州取易守難不宜輕舉化貞卒無功而還化貞爲人駭而愾素不習兵輕視大敵好謾語文武將吏進諫悉不入與廷弼尤牴牾妄意降敵者李永芳爲內應信西部言謂虎墩兔助兵四十萬遂欲以不戰取全勝一切土馬甲仗糧糧營壘俱置不問務爲大言罔中朝尙書鶴鳴深信之所請無不允以故廷弼不得行其志廣寧有兵十四萬而廷弼關上無一卒徒擁經略虛號而已延綏入衛兵不堪用廷弼請罪其帥杜文煥鶴鳴議寬之廷弼請用卜年鶴鳴上駁議廷弼奏遣之坦鶴鳴故稽其餉兩人遂相怨事事齟齬而廷弼亦褊淺剛愎有觸必發盛氣相加朝士多厭惡之毛文龍鎮江之捷化貞自謂發蹤奇功廷弼言三方兵力未集文龍發之太早致敵恨遼人屠戮四衛軍民殆盡灰東山之心寒朝鮮之膽奪河西之氣亂三方並進之謀誤屬國聯絡之算目爲奇功乃奇禍耳貽書京師力詆化貞朝士方以鎮江爲奇捷聞其言亦多不服廷弼又顯詆鶴鳴謂臣旣任經略四方援軍宜聽臣調遣乃鶴鳴徑自發戍不令臣知七月中臣咨部問調軍之數經今兩月置不答臣有經略名無其實遼左事惟樞臣與撫臣共爲之鶴鳴益恨至九月化貞猶言虎墩兔兵四十萬且至請速濟師廷弼言撫臣恃西部欲以不戰爲戰計西部與我進不同進彼入北道我

入南道相距二百餘里敵分兵來應亦須我自撐拒臣未敢輕視敵人謂可不戰勝也臣初議三方布置必使兵馬器械舟車芻蕘無一不備而後尅期齊舉進足戰退亦足以守今臨事中亂雖樞臣主謀於中撫臣決策於外卜一舉成功而臣猶有萬一不必然之慮也既而西部竟不至化貞兵亦不敢進廷弼既與化貞隙中朝右化貞者多誡廷弼給事中楊道寅謂出嘉棟不宜用御史徐景濂極譽化貞刺廷弼誡之但逍遙故鄉不稱任使御史蘇琰則言廷弼宜駐廣寧不當遠駐山海因言登萊水師無所用廷弼怒抗疏力誡三人帝皆無所問而帝於講筵忽問卜年係叛族何擢僉事國縉數經論列何起用嘉棟立功贖罪何在天津廷弼知左右譖之抗疏辨語頗憤激是時廷弼主守謂遼人不可用西部不可恃承芳不可信廣寧多間諜可虞化貞一切反之絕口不言守謂我一渡河河東人必內應且騰書中朝言仲秋之月可高枕而聽捷音識者知其必僨事以疆場事重無敢言其短者至十月冰合廣寧人謂

大清兵必渡河紛然思竄化貞乃與震孺計分兵守鎮武西平閭陽鎮寧諸城堡而以大軍守廣寧鶴鳴亦以廣寧可慮請敕廷弼出關廷弼上言樞臣第知經略一出足鎮人心不知徒手之經略一出其動搖人心更甚且臣駐廣寧化貞駐何地鶴鳴責經撫協心同力而樞臣與經臣獨不當協心同力乎爲今日計惟樞部俯同於臣臣始得爲陛下任東方事也其言甚切至鶴鳴益不悅廷弼乃復出關至右屯議以

重兵內護廣寧外扼鎮武閭陽乃令劉渠以二萬人守鍾武祁秉忠以萬人守閭陽又令羅一貫以三千人守西平復申令曰敵來越鎮武一步者文武將吏誅無赦敵至廣寧而鎮武閭陽不夾攻掠右屯餉道而三路不救援者亦如之部署甫定化貞又信諜者言遽發兵襲海州旋亦引退廷弼乃上言撫臣之進及今而五矣八九月間屢進屢止猶未有疏請也若十月二十五日之役則拜疏輒行者也臣疾趨出關而撫臣歸矣西平之會相與協心議守犄角設營而進兵之書又以晦日至矣撫臣以十一月二日赴鎮武臣卽以次日赴杜家屯北至中途而軍馬又遣還矣初五日撫臣又欲以輕兵襲牛莊奪馬圈守之爲明年進兵門戶時馬圈無一敵兵卽得牛莊我不能守敵何損我何益會將吏力持不可撫臣亦怏怏回矣兵屢進屢退敵已窺盡伎倆而臣之虛名亦以輕出而損願陛下明諭撫臣慎重舉止毋爲敵人所笑化貞見疏不悅馳奏辨且曰願請兵六萬一舉蕩平臣不敢貪天功但厚賚從征將士遼民賜復十年海內得免加派臣願足矣卽有不稱亦必殺傷相當敵不復振保不爲河西憂因請便宜行事時葉向高復當國化貞座主也頗右之廷臣惟太僕少卿何喬遠言宜專守廣寧御史夏之令言蒙古不可信款賞無益給事中趙時用言永芳必不可信與廷弼合餘多右化貞令毋受廷弼節制而給事中李精白欲授化貞尙方劍得便宜操縱孫杰劾一煜以用出嘉棟卜年爲罪而言廷弼不宜駐關內廷弼憤上言臣以東

西南北所欲殺之人而適遇事機難處之會諸臣能爲封疆容則容之不能爲門戶容則去之何必內借閣部外借撫道以相困又言經撫不和恃有言官言官交攻恃有樞部樞部佐鬪恃有閣臣臣今無望矣帝以兩臣爭言遣兵部堂官及給事中各一人往諭抗違不遵者治罪命既下廷臣言遣官不便乃下廷臣集議初廷弼之出關也化貞慮奪己兵權佯以兵事委廷弼廷弼上言臣奉命控扼山海非廣寧所得私撫臣不宜卸責於臣會震孺奏經撫不和有化貞心意懶語廷弼據以刺化貞化貞益不悅及化貞請一舉蕩平廷弼乃言宜如撫臣約亟罷臣以鼓士氣當是時中外舉知經撫不和必誤疆事章日上而鶴鳴篤信化貞遂欲去廷弼二年正月員外郎徐大化希指劾廷弼大言軍世嫉能妬功不去必壞遼事疏并下部鶴鳴乃集廷臣大議議撤廷弼者數人餘多請分任責成鶴鳴獨言化貞一去毛文龍必不用命遼人爲兵者必潰西部必解體宜賜化貞尙方劍專委以廣寧而撤廷弼他用議上帝不從責吏兵二部再奏會

大清兵逼西平遂罷議仍兼任二臣責以功罪一體無何西平圍急化貞信中軍孫得功計盡發廣寧兵昇得功及祖大壽往會秉忠進戰廷弼亦馳檄渠撤營赴援二十二日遇

大清兵平陽橋鋒始交得功及參將鮑承先等先奔鎮武閭陽兵遂大潰渠秉忠戰沒沙嶺大壽走覺華

烏西平守將一貫待援不至與參將黑雲鶴亦戰歿廷弼已離右屯次聞陽參議刑慎言勸急救廣寧爲
僉事韓勅命所沮遂退還時

大清兵頓沙嶺不進化貞素任得功爲腹心而得功潛降於

大清欲生縛化貞以爲功訛言敵已薄城城中大亂奔走參政高邦佐禁之不能止化貞方閱署理軍書
不知也參將江朝棟排闥入化貞怒呵之朝棟大呼曰事急矣請公速走化貞莫知所爲朝棟掖之出上
馬二僕人徒步從遂棄廣寧踉蹌走與廷弼遇天凌河化貞哭廷弼微笑曰六萬衆一舉蕩平竟何如化
貞慙議守寧遠及前屯廷弼曰噫已晚惟護潰民入關可耳乃以己所將五千人授化貞爲殿盡焚積聚
二十六日偕初命護潰民入關化貞出嘉棟先後入獨邦佐自經死得功率廣寧叛將迎

大清兵入廣寧化貞逃已兩日矣

大清兵追逐化貞等二百里不得食乃還報至京師大震鶴鳴恐自請視師二月逮化貞罷廷弼聽勘四
月刑部尙書王紀左都御史鄒元標大理寺卿周應秋等奏上獄詞廷弼化貞並論死後當行刑廷弼令
汪文言賄內廷四萬金祈緩旣而背之魏忠賢大恨誓速斬廷弼及楊漣等下獄誣以受廷弼賄甚其罪
已邇者獲市人蔣應暘謂與廷弼子出入禁獄陰謀叵測忠賢愈欲速殺廷弼其黨門克新郭興治石三

畏卓邁等遂希指趣之會馮銓亦憾廷弼與顧秉謙等侍講筵出市刊遼東傳譖於帝曰此廷弼所作希脫罪耳帝怒遂以五年八月棄市傳首九邊已御史梁夢環謂廷弼侵盜軍資十七萬御史劉徽謂廷弼家資百萬宜籍以佐軍忠賢卽矯旨嚴追罄貲不足姻族家俱破江夏知縣王爾玉責廷弼子貂裘珍玩不獲將撻之其長子兆珪自到死兆珪母稱冤爾玉去其兩婢衣撻之四十遠近莫不嗟憤崇禎元年詔免追贓其秋工部主事徐爾一訟廷弼冤曰廷弼以失陷封疆至傳首陳屍籍產追贓而臣考當年第覺其罪無足據而勞有足矜也廣寧兵十三萬糧數百萬盡屬化貞廷弼止援遼兵五千人駐右屯距廣寧四十里耳化貞忽同三四百萬遼民一時盡潰廷弼五千人不同潰足矣尙望其屹然壁哉廷弼罪安在化貞仗西部廷弼云必不足仗化貞信李永芳內附廷弼云必不足信無一事不力爭無一言不奇中廷弼罪安在且屢疏爭各鎮節制不行屢疏爭原派兵馬不與徒擁虛器抱空名廷弼罪安在唐郭子儀李光弼與九節度師同潰自應收潰兵扼河陽橋無再往河陽坐待思明縛去之理今計廣寧西止關上一門限不趣扼關門何待史稱慕容垂一軍三萬獨全亦無再駐淝水與晉人決戰之理廷弼能令五千人不散至大凌河付與化貞事政相類寧得與化貞同日道乎所謂勞有足矜者當三路同時陷沒開鐵北關相繼奔潰廷弼經理不及一年俄進築秦集藩陽俄進屯虎皮驛俄迎扼敵兵於橫河上於遼陽城

下鑿河列柵埋礮屹然樹金湯令得竟所施何至舉榆口關外拱手授人而今俱抹撥不論乃其所由必死則有故矣其才既籠蓋一時其氣又陵厲一世揭辯紛紛致撓衆怒共起殺機是則所由必殺其軀之道耳當廷弼被勘被逮之時天日輒爲無光足明其冤乞賜昭雪爲勞臣勸不從明年五月大學士韓爌等言廷弼遺骸至今不得歸葬從來國法所未有今其子疏請歸葬臣等擬票許之蓋國典皇仁並行不悖理合如此若廷弼罪狀始末亦有可言皇祖朝戊申己酉間廷弼以御史按遼東早以遼患爲慮請核地界飭營伍聯絡南北關大聲疾呼人莫爲應十年而驗若左券其可言者一戊午己未楊鎬三路喪師撫順清河陷沒皇祖用楊鶴言召起廷弼代鎬一年餘修飭守具邊患稍寧會皇祖賓天廷議以廷弼無戰功攻使去使袁應泰代四閱月而遼亡使廷弼在未必至此其可言者二遼陽旣失先帝思廷弼言再起之田間復任經略化貞主戰廷弼主守羣議皆是化貞廷弼屢言玩師必敗奸細當防莫有聽者徘徊躑躅以五千人駐右屯化貞兵十三萬駐廣寧廣瀆右屯乃與俱潰其可言者三假令廷弼於此時死守右屯捐軀殉封疆豈非節烈奇男子不然支撐寧前錦義間扶傷救敗收拾殘黎猶可圖桑榆之效乃倉皇風鶴偕化貞並馬入關其意以我固嘗言之言而不聽罪當未減此則私心短見殺身以此殺身而無辭公論亦以此傳首邊庭頭足異處亦足爲臨難鮮忠者之戒矣然使誅廷弼者按封疆失陷之條偕

同事諸臣一體伏法廷弼九原目瞑乃先以賄賂搆坐楊漣魏大中等作清流陷阱既而刊書惑眾借題曲殺身死尙懸坐贓十七萬辱及妻孥長子兆珪迫極自刎斯則廷弼死未心服海內忠臣義士亦多憤惋竊歎者特以封疆二字噤不敢訟陳皇上之前臣等平心論之自有遼事以來詎官營私者何算廷弼不取一金錢不通一饋問焦胥傲舌爭言大計魏忠賢盜竊威福士大夫靡然從風廷弼以長繫待決之人屈曲則生抗違則死乃終不改其強直自遂之性致獨鷹顯戮慷慨赴市耿耿剛腸猶未盡泯今縱不敢深言而傳首已踰三年收葬原無禁例聖明必當垂仁臣所以娓娓及此者以茲事雖屬封疆而竇陰繫朝中邪正本末皇上天縱英哲或不以臣等爲大謬也詔許其子持首歸葬五年化貞始伏誅

袁崇煥字元素東莞人萬曆四十七年進士授邵武知縣爲人慷慨負膽略好談兵遇老校退卒輒與論塞上事曉其阨塞情形以邊才自許天啟二年正月朝朝在都御史侯恂請破格用之遂擢兵部職方主事無何廣盜師潰廷議扼山海關崇煥卽單騎出閩關內外部中失袁主事訝之家人亦莫知所往已還朝具言關上形勢曰予我軍馬錢穀我一人足守此廷臣益稱其才遂超擢僉事監關外軍發帑金二十萬俾招募時關外地悉爲哈刺慎諸部所據崇煥乃駐守關內未幾諸部受款經略王在晉令崇煥移駐中前所監參將周守廉遊擊左輔軍經理前屯衛事尋令赴前屯安置遼人之失業者崇煥卽夜行荆棘

虎豹中以四鼓入城將士莫不壯其膽在晉深倚重之題爲靈前兵備愈事然崇煥薄在晉無遠略不盡遵其令及在晉議築重城八里鋪崇煥以爲非策爭不得奏記首輔葉向高十三山難民十餘萬久困不能出大學士孫承宗行邊崇煥請將五千人駐靈遠以壯十三山勢別遣驍將救之靈遠去山二百里便則進據錦州否則退守靈遠奈何委十萬人置度外承宗謀於總督王象乾象乾以關上軍方喪氣議發插部護關者三千人往承宗以爲然告在晉在晉竟不能救衆遂沒脫歸者僅六千人而已及承宗駁重城議集將吏謀所守閭鳴泰主覺華崇煥主靈遠在晉及張應吾邢慎言持不可承宗竟主崇煥議已承宗鎮關門益倚崇煥崇煥內拊軍民外飭邊備勞績大著崇煥嘗核虛伍立斬一校承宗怒曰監軍可專殺耶崇煥頓首謝其果於用法類此三年九月承宗決守靈遠愈事萬有孚劉詔力阻不聽命滿桂偕崇煥往初承宗令祖大壽築靈遠城大壽度中朝不能遠守築僅十一且疎薄不中程崇煥乃定規制高三丈二尺雉高六尺址廣三丈上二丈四尺大壽與參將高見賀謙分督之明年迄工遂爲關外重鎮桂夏將而崇煥勤職誓與城存亡又善撫將士樂爲盡力由是商旅輻輳流移駢集遠近望爲樂土遺父憂奪情視事四年九月偕大將馬世龍王世欽率水陸馬步軍萬二千東巡廣靈謁北鎮祠歷十三山抵右屯遂由水道泛三岔河而還尋以五防敘勞進兵備副使再進右參政崇煥之東巡也請卽復錦州右屯諸

城承宗以爲時未可乃止至五年夏承宗與崇煥計遣將分據錦州松山杏山右屯及大小凌河繕城郭居之自是寧遠且爲內地開疆復二百里十月承宗罷高第來代謂關外必不可守令盡撤錦右諸城守具移其將士於關內督屯通判金啟傑上書崇煥曰錦右大凌三城皆前鋒要地倘收兵退旣安之民庶復播遷已得之封疆再淪沒關內外堪幾次退守耶崇煥亦力爭不可言兵法有進無退三城已復安可輕撤錦右動搖則寧前震驚關門亦失保障今但擇良將守之必無他慮第意堅且欲并撤寧前一城崇煥曰我寧前道也官此當死此我必不去第無以難乃撤錦州右屯大小凌河及松山杏山塔山守具盡驅屯兵入關委棄米粟十餘萬而死亡載途哭聲震野民怨而軍益不振崇煥遂乞終制不許十二月進按察使視事如故我

大清知經略易與六年正月舉大軍西渡遼河二十三日抵寧遠崇煥聞卽偕大將桂副將左輔朱海參將大壽守備何可剛等集將士誓死守崇煥更刺血爲書激以忠義爲之下拜將士咸請效死乃盡焚城外民居攜守具入城清野以待令同知程維祺請奸通判啟傑具守卒食辟道上行入繳前屯守將趙率教山海守將楊麒將士逃至者悉斬人心始定明日

大軍進攻戴楯穴城矢石不能退崇煥令閩卒羅立發西洋巨礮傷城外軍明日再攻復被却圍遂解而

啟倬亦以然礮死啟倬起小吏官經歷主賞功事勦敵有志介承宗重之用爲通判核兵馬錢糧督城工
理軍民詞訟大得衆心死贈光祿少卿世廕錦衣試百戶初中朝聞警兵部尙書王永光大集廷臣議戰
守無善策經略第總兵麒竝擁兵關上不救中外謂竄遠必不守及崇煥以書聞舉朝大喜立擢崇煥右
僉都御史璽書獎勵桂等進秩有差我

大清初解圍分兵數萬略覺華島殺參將金冠等及軍民數萬崇煥方完城力竭不能救也高第鎮關門
大反承宗政務折辱諸將諸將咸解體遇麒若偏裨麒至見侮其卒至是坐失援第麒並褫官去而以王
之臣代第趙率教代麒我

大清舉兵所向無不摧破諸將罔敢議戰守議戰守自崇煥始三月復設遼東巡撫以崇煥爲之魏忠賢
遣其黨劉應坤紀用等出鎮崇煥抗疏諫不納敘功加兵部右侍郎賚銀幣世廕錦衣千戶崇煥旣解圍
志漸驕與桂不協請移之他鎮乃召桂還崇煥以之臣奏留桂又與不協中朝慮債事命之臣專督關內
以關外屬崇煥畫關守崇煥虞廷臣忌己上言陛下以關內外分責二臣用遼人守遼土且守且戰且築
且屯屯種所入可漸減海運大要堅壁清野以爲體乘間擊瑕以爲用戰雖不足守則有餘守旣有餘戰
無不足顧勇猛圖敵必讎奮迅立功衆必忌任勞則必召怨蒙罪始可有功怨不深則勞不著罪不大

則功不成謗書盈篋毀言日至從古已然惟聖明與廷臣始終之帝優旨褒答其冬崇煥偕應坤用率教巡歷錦州大小凌河議大興屯田漸復第所棄舊土忠賢與應坤等並因是廢錦衣崇煥進所廢爲指揮僉事崇煥遂言遼左之壞雖人心不固亦緣失有形之險無以固人心兵不利野戰祇有憑堅城用大礮一策今山海四城旣新當更修松山諸城班軍四萬人缺一不可帝報從之先是八月中我

太祖高皇帝晏駕崇煥遣使弔且以覘虛實我

太宗文皇帝遣使報之崇煥欲議和以書附使者還報我

大清兵將討朝鮮欲因此阻其兵得一意南下七年正月再遣使答之遂大興兵渡鴨綠江南討朝議以崇煥之臣不相能召之臣還罷經略不設以關內外盡屬崇煥與鎮守中官應坤用並便宜從事崇煥銳意恢復乃乘

大軍之出遣將繕錦州中左大凌三城而再使使持書議和會朝鮮及毛文龍同告急朝命崇煥發兵援崇煥以水師援文龍又遣左輔趙率教朱梅等九將將精卒九千先後逼三岔河爲牽制之勢而朝鮮已爲

大清所服諸將乃還崇煥初議和中朝不知及奏報優旨許之後以爲非計頗有戒諭崇煥欲藉自修故

疆持愈力而朝鮮及文龍被兵言官因謂和議所致四月崇煥上言關外四城雖延袤二百里北負山南阻海廣四十里爾今屯兵六萬商民數十萬地隘人稠安所得食錦州中左大凌三城修築必不可已業移商民廣開屯種倘城不完而敵至勢必撤還是棄垂成功也故乘敵有事江東姑以和之說緩之敵知則三城已完戰守又在關門四百里外金湯益固矣帝優旨報聞時率教駐錦州護版築朝命尤世祿來代又以輔爲前鋒總兵官駐大凌河世祿未至輔未入大凌五月十一日

大清兵直抵錦州四面合圍率教偕中官用嬰城守而遣使議和欲援師以待救使三返不決圍益急崇煥以靈遠兵不可動選精騎四千令世祿大壽將繞出

大軍後決戰別遣水師東出相牽制且請發薊鎮宣大兵東護關門朝廷已命山海滿桂移前屯三屯孫祖壽移山海宣府黑雲龍移一片石薊遼總督閻鳴泰移關城又發昌平天津保定兵馳赴上關檄山西河南山東守臣整兵聽調世祿等將行

大清已於二十八日分兵趨靈遠崇煥與中官應坤副使畢自肅督將士登陴守列營濠內用礮距擊而桂世祿大壽大戰城外士多死桂身被數矢

大軍亦旋引去益兵攻錦州以海暑不能克士卒多損傷六月五日亦引還因毀大小凌河二城時稱靈

錦大捷桂率教功爲多忠賢因使其黨論崇煥不救錦州爲暮氣崇煥遂乞休中外方爭頌忠賢崇煥不得已亦請建祠終不爲所喜七月遂允其歸而以王之臣代爲督師兼遼東巡撫駐寧遠及敘功文武增秩賜廕者數百人忠賢子亦封伯而崇煥止增一秩尙書霍維華不平疏乞讓廕忠賢亦不許未幾熹宗崩莊烈帝卽位忠賢伏誅削諸冒功者廷臣爭請召崇煥其年十一月擢右都御史視兵部添注左侍郎事崇禎元年四月命以兵部尙書兼右副都御史督師薊遼兼督登萊天津軍務所司敦促上道七月崇煥入都先奏陳兵事帝召見平臺慰勞甚至咨以方略對曰方略已具疏中臣受陛下特眷願假以便宜計五年全遼可復帝曰復遼朕不吝封侯賞卿努力解天下倒懸卿子孫亦受其福崇煥頓首謝帝退少憩給事中許譽卿叩以五年之略崇煥言聖心焦勞聊以是相慰耳譽卿曰上英明安可漫對異日按期責效奈何崇煥慨然自失頃之帝出卽奏言東事本不易竣陛下旣委臣臣安敢辭難但五年內戶部轉軍餉工部給器械吏部用人兵部調兵選將須中外事事相應方克有濟帝爲飭四部臣如其言崇煥又言以臣之力制全遼有餘調衆口不足一出國門便成萬里忌能妬功夫豈無人卽不以權力掣臣肘亦能以意見亂臣謀帝起立傾聽諭之曰卿無疑慮朕自有主持大學士劉鴻訓等請收還之臣桂尙方劍以賜崇煥假之便宜帝悉從之賜崇煥酒饌而出崇煥以前此熊廷弼孫承宗皆爲人排搆不得竟其志

上言恢復之計不外臣昔年以遼人守遼土以遼土養遼人守爲正著戰爲奇著和爲旁著之說法在漸不在驟在實不在虛此臣與諸邊臣所能爲至用人之人與爲人用之人皆至尊司其鑰何以任而勿貳信而勿疑蓋取邊臣與廷臣異軍中可驚可疑者殊多但當論成敗之大局不必摘一言一行之微瑣事任既重爲怨實多諸有利於封疆者皆不利於此身者也況圖敵之急敵亦從而間之是以爲邊臣甚難陛下愛臣知臣臣何必過疑懼但中有所危不敢不告帝優詔答之賜蟒玉銀幣疏辭蟒玉不受是月川湖兵戍盜遠者以缺餉四月大譟餘十三營起應之縛繫巡撫畢自肅總兵官朱梅通判張世榮推官蘇涵瀄於譙樓上自肅傷重兵備副使郭廣初至羽翼自肅括撫賞及朋椿二萬金以散不厭貸商民足五萬乃解自肅疏引罪走中左所自經死崇煥以八月初抵關聞變馳與廣密謀宥首惡張正朝張思順令捕十五人戮之市斬知謀中軍吳國琦責參將彭簪古黜都司左良玉等四人發正朝思順前鋒立功世榮涵瀄以貪虐致變亦斥之獨都司程大樂一營不從變特爲獎勵一方乃靖關外大將四五人事多掣肘後定設二人以梅鎮遠大壽仍駐錦州至是梅將解任崇煥請合靈錦爲一鎮大壽仍駐錦州加中軍副將何可剛都督僉事代梅駐靈遠而移薊鎮率教於關門關內外止設二大將因極稱三人才謂臣自期五年專藉此三人當與臣相終始屆期不效臣手戮三人而身歸死於司敗帝可之崇煥遂留鎮

盜遠自肅既死崇煥請停巡撫及登萊巡撫孫國楨免崇煥又請罷不設帝亦報可哈刺慎三十六家向受撫賞後爲插漢所迫且歲饑有叛志崇煥召至於邊親撫慰皆聽命二年閏四月敘春秋兩防功加太子太保賜蟒衣銀幣廕錦衣千戶崇煥始受事卽欲誅毛文龍文龍者仁和人以都司援朝鮮逗留遼東遼東失自海道遁回乘虛襲殺

大清鎮江守將報巡撫王化貞而不及經略熊廷弼兩人隙始開用事者方主化貞遂授文龍總兵累加至左都督掛將軍印賜尙方劍設軍鎮皮島如內地皮島亦謂之東江在登萊大海中綿互八十里不生草木遼南岸近北岸北岸海面八十里卽抵

大清界其東北海則朝鮮也島上兵本河東民自天啟元年河東失民多逃島中文龍籠絡其民爲兵分布哨船聯接登州以爲犄角計中朝是之島事由此起四年五月文龍遣將沿鴨綠江越長白山侵大清國東偏爲守將擊敗衆盡殲八月遣兵從義州城西渡江入島中屯田

大清守將覺潛師襲擊斬五百餘級島中糧悉被焚五年六月遣兵襲耀州之官屯寨敗歸六年五月遣兵襲鞍山驛喪其卒千餘越數日又遣兵襲撤爾河攻城南爲

大清守將所却七年正月

大清兵征朝鮮并規勸文龍三月

大清兵克義州分兵夜擣文龍於鐵山文龍敗遁歸島中時

大清惡文龍躡後故致討朝鮮以其助文龍爲兵端顧文龍所居東江形勢雖足牽制其人本無大略往輒敗衄而未糜餉無算且惟務廣招商賈販易禁物名濟朝鮮寶闕出塞無事則鬻參販布爲業有事亦罕得其用工科給事中潘士闕劾文龍糜餉殺降尙寶卿董茂忠請撤文龍治兵關寧兵部議不可而崇煥心弗善也嘗疏請遣部臣理餉文龍惡文臣監制抗疏駁之崇煥不悅及文龍來謁接以賓禮文龍又不讓崇煥謀益決至是遂以閩兵爲名泛海抵雙島文龍來會崇煥與相燕飲每至夜分文龍不覺也崇煥議更營制設監司文龍怫然崇煥以歸鄉動之文龍曰向有此意但惟我知東事東事畢朝鮮衰弱可襲而有也崇煥亦不悅以六月五日邀文龍觀將士射先設幄山上令參將謝尙政等伏甲士幄外文龍至其部卒不得入崇煥曰予請朝行公當海外重寄受予一拜交拜畢登山崇煥問從官姓名多毛姓文龍曰此皆予孫崇煥笑因曰爾等積勞海外月米止一斛言之痛心亦受予一拜爲國家盡力衆皆頓首謝崇煥因詰文龍違令數事文龍抗辯崇煥厲色叱之命去冠帶繫縛文龍猶倔強崇煥曰爾有十二斬罪知之乎祖制大將在外必命文臣監爾專制一方軍馬錢糧不受核一當斬人臣之罪莫大欺君爾奏

報盡欺罔殺降人難民冒功二當斬人臣無將將則必誅爾奏有牧馬登州取南京如反掌爾大逆不道
三當斬每歲餉銀數十萬不以給兵月止散米三斗有半侵盜軍糧四當斬擅開馬市於皮島私通外番
五當斬部將數千人悉冒己姓副將以下濫給札付千走卒與夫盡金緋六當斬自盜遠還劫掠商船自
爲盜賊七當斬強取民間子女不知紀極部下效尤人不安室八當斬驅難民遠竊人參不從則餓死島
上白骨如莽九當斬輦金京師拜魏忠賢爲父塑冕旒像於島中十當斬鐵山之敗喪軍無算掩敗爲功
十一當斬開鎮八年不能復寸土觀望養敵十二當斬數畢文龍喪魂魄不能言但叩頭乞免崇煥召諭
其部將曰文龍罪狀當斬否皆惶怖唯唯中有稱文龍數年勞苦者崇煥叱之曰文龍一布衣爾官極品
滿門封廕足酬勞何悖逆如是乃頓首請旨曰臣今誅文龍以肅軍諸將中有若文龍者悉誅臣不能成
功皇上亦以誅文龍者誅臣遂取尙方劍斬之帳前乃出諭其將士曰誅止文龍餘無罪當是時文龍磨
下健校悍卒數萬懼崇煥威無一敢動者於是命棺斂文龍明日具牲醴拜奠曰昨斬爾朝廷大法今祭
爾僚友私情爲下淚乃分其卒二萬八千爲四協以文龍子承祚副將陳繼盛參將徐敷奏遊擊劉興祚
主之收文龍敕印尙方劍令繼盛代掌犒軍士檄撫諸島盡除文龍虐政還鎮以其狀上聞未言文龍大
將非臣得擅誅謹席藁待罪時崇禎二年五月也帝驟聞意殊駭念既死且方倚崇煥乃優旨褒答俄傳

諭暴文龍罪以安崇煥心其爪牙伏京師者令所司捕崇煥上言文龍一匹夫不法至此以海外易爲亂也其衆合老稚四萬七千妄稱十萬且民多兵不能二萬妄設將領千今不宜更置帥卽以繼盛攝之於計便帝報可崇煥雖誅文龍慮其部下爲變增餉銀至十八萬然島弁失主帥心漸攜益不可用其後致有叛去者崇煥言東江一鎮牽制所必資今定兩協馬軍十營步軍五歲餉銀四十二萬米十三萬六千帝頗以兵減餉增爲疑以崇煥故特如其請崇煥在遼與率教大壽可剛定兵制漸及登萊天津及定東江兵制合四鎮兵十五萬三千有奇馬八萬一千有奇歲費度支四百八十餘萬減舊一百二十餘萬帝嘉獎之文龍旣死甫踰三月我

大清兵數十萬分道入龍井關大安口崇煥卽督大壽可剛等入衛以十一月十日抵薊州所歷撫寧永平遷安豐潤玉田諸城皆留兵守帝聞其至甚喜溫旨褒勉發帑金犒將士令盡統諸道援軍俄聞率教戰歿遵化三屯營皆破巡撫王元雅總兵朱國彥自盡

大清兵越薊州而西崇煥懼急引兵入護京師營廣渠門外帝立召見深加慰勞咨以戰守策賜御饌及貂裘崇煥以士馬疲敝請入休城中不許出與

大軍鏖戰互有殺傷時所入隘口乃薊遼總理劉策所轄而崇煥甫聞變卽千里赴救自謂有功無罪然

都人驟遭兵怨謗紛起謂崇煥縱敵擁兵朝士因前通和議誣其引敵脅和將爲城下之盟帝頗聞之不能無感會我

大清設問謂崇煥密有成約令所獲宦官知之陰縱使去其人奔告於帝帝信之不疑十二月朔再召對遂縛下詔獄大壽在旁戰栗失措出卽擁兵叛歸大壽嘗有罪孫承宗欲殺之愛其才密令崇煥救解大壽以故德崇煥懼并誅遂叛帝取崇煥獄中手書往召大壽乃歸命方崇煥在朝嘗與大學士錢龍錫語微及欲殺毛文龍狀及崇煥欲成和議龍錫嘗移書止之龍錫故主定逆案魏忠賢遺黨王永光高捷袁弘勳史涇輩謀興大獄爲逆黨報讎見崇煥下吏遂以擅主和議專戮大帥二事爲兩人罪捷首疏力攻涇弘勳繼之必欲并誅龍錫法司坐崇煥謀叛龍錫亦論死三年八月遂磔崇煥於市兄弟妻子流三千里籍其家崇煥無子家亦無餘貲天下寃之崇煥旣縛大壽潰而去武經略滿桂以趣戰急與

大清兵戰竟死去縛崇煥時甫半月初崇煥妄殺文龍至是帝誤殺崇煥自崇煥死邊事益無人明亡徵決矣

趙光抃字彥清九江德化人父贊化工部郎中光抃舉天啟五年進士鄉人曹欽程父事魏忠賢驟得太僕少卿光抃語之曰富貴一時名節千古君不可不審欽程惡之卽日出贊化爲南寧知府南寧惡地贊

化倥傯而死光抃奔喪歸崇禎初服闋除工部都水主事歷兵部職方郎中十年秋遣關餉遼戎務盡得邊塞形勢戰守機宜列十二事以獻明年冬

大清兵入密雲總督吳阿衡敗歿廷議增設巡撫一人駐密雲遂擢光抃右僉都御史任之至卽發監視中官鄧希詔奸謀帝召希詔還而令分守中官孫茂霖覈實茂霖爲希詔解光抃反得罪遣戍廣東十五年兵事益棘廷臣薦光抃復官光抃家素饒聞命持數萬金入都爲軍資既至召見德政殿奏對稱旨拜兵部右侍郎兼右僉都御史總督薊州永平山海通州天津諸鎮軍務而

大清已克薊州分兵四出命光抃兼督諸路援軍諸援軍觀望河間迤南皆失守光抃不敢救尾而南已聞塞上警又驅而北廷臣交章劾光抃謂列城被攻不救退回高陽坐視淪覆明年復論光抃及范志完四月

大清兵北旋光抃唐通白廣恩等八鎮兵邀於螺山皆敗走帝聞大怒旣解嚴與志完並獲譴帝召見雷縝祚縝祚誠志完而稱光抃帝曰志完光抃逗遛河間獨罪志完渠服其心乎遂并逮光抃光抃嘗薦廣恩廣恩抗不赴召帝以是益惡光抃卒與志完同日斬西市光抃才氣豪邁而於大慮亦疎在職方深爲尙書楊嗣昌所倚曰吾不及光抃先是毛文龍據東江海疆賴之文龍死陳繼盛黃龍沈世魁代其部往

往爲亂中朝又素以糜餉爲憂及世魁死島中無帥光抃愆與嗣昌撤之二十年積患一朝而除而於邊計亦左焉光抃雖文士有膽決嘗遇敵諸將欲奔光抃坐地不起久之乃引歸其起戍中也將士不相習猝遇大敵先膽落故所當輒敗然受事破軍之餘身先被創顧與志完同誅人咸以爲冤福王時太僕萬元吉奏復其官范志完虞城人崇禎四年進士授永平推官專理插漢撫賞意不欲行上疏言權輕請得特疏奏軍事當事者惡之謫湖廣布政司檢校擢寧國推官歷官分巡關內僉事十四年冬超擢右僉都御史巡撫山西其座主周延儒當國遂拜志完兵部右侍郎兼右僉都御史總督薊州永平山海通州天津諸鎮軍務代楊繩武繩武者雲南彌勒人也由庶吉士改授御史十一年冬用楊嗣昌薦召見吐言如沈費地成圖帝偉之遂超擢右僉都御史巡撫順天洪承疇困松山遂擢繩武總督尋以志完代之而令繩武總督遼東寧遠諸軍出關救松錦加銜督師明年正月繩武卒官贈兵部尙書廕錦衣世襲百戶遂進志完左侍郎督師出關如繩武而以張福臻督薊鎮駐關內自王樸諸軍敗兵力益單松錦相繼失志完乃築五城寧遠城南護轉輸募土著實之又議修覺華島城爲犄角勢帝甚倚之六月易銜欽命督師總督薊遼昌通等處軍務節制登津撫鎮遼事急則移駐中後前屯關內急則星馳入援二協有警則會同薊昌二督并力策應時關內外並建二督而關外加督師銜地望尤尊又於昌平保定設二督於是千

里之內有四督臣又有寧遠永平順天密雲天津保定大巡撫寧遠山海中協西協昌平通州天津保定八總兵星羅碁置無地不防而事權反不一十五年給事中方士亮劾福臻昏庸因言移督師關內則劄督可裁福臻可罷於是召還福臻令志完兼制關內移駐關門志完辭不許求去不許上疏言不能兼劄請仍設劄督踰月始以趙光抃任之而

大清兵已入自牆子嶺克薊州而南下矣兵部劾志完疎防廷臣亦言志完貪懦帝以敵兵未退責令戴罪立功然志完無謀略恆怯甚不敢一戰所在州縣覆沒惟尾而呵噪兵所到剽虜至德州僉事雷繼祚劾之自是論列者益衆帝猶責志完後效志完終不敢戰明年

大清兵攻下海州贛榆沭陽豐縣已而北旋志完光抃卒觀望皆不進事定議罪召續祚廷質問志完還遛淫掠狀志完辨問御史吳履中對如續祚言時座主延儒督師亦無功遂命下志完獄以十二月斬志完先是十二年封疆之案伏罪者三十有六人至是失事甚於前誅止志完光抃及巡撫馬成名潘永圖總兵薛敏忠副將柏永鎮其他悉置不問而保定巡撫楊進得善去山東巡撫王永吉反獲遷擢帝之用刑至是窮矣

贊曰三路夷師收降取敗錫與應泰同辜然君子重繩錫而寬論應泰豈不以士所重在節哉惜乎廷弼

以蓋世之材褊性取忌功名顯於遼亦隳於遼假使廷弼效死邊城義不反顧豈不毅然節烈丈夫哉廣
寧之失罪由化貞乃以門戶曲殺廷弼化貞稽誅者且數年崇煥智雖疎差有膽略莊烈帝又以讒聞誅
之國步將移刑章顛覆豈非天哉

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

楊

鶴 從弟鶴

陳奇瑜

元獻

熊文燦

洪雲蒸

練國事

丁啟睿

從父魁

鄭崇儉

方孔炤

邵捷春

余應桂

高斗樞

張任學

楊鶴字修齡武陵人萬曆三十二年進士授雒南知縣調長安四十年擢御史上疏請東宮講學且言頃者愛女被躡於宮奴館甥受撻於朝市叩閭不聞上書不達壅蔽極矣時壽寧主壻冉興讓為掌家宮人梁盈女內官彭進朝等毆辱公主三奏不達興讓掛冠長安門去故鶴言及之尋出督兩淮鹽法巡按貴州貴州接壤烏撒去川南敘州千里節制難士官安雲龍死其族人與霑益安效良爭印搆兵三十年後竟為效良所據其父紹慶又據霑益州皆川雲貴咽喉地鶴請割烏撒隸貴州地近節制便可弭後患朝議不決未幾效良為亂如其言貴州土官以百數水西安氏最大而土地戶口貢賦之屬無籍可稽鶴乃檄宣慰安位盡著之籍并首領目把主名承襲源委悉列上有司自是簿牒始明奸弊易核事竣不候命徑歸久之還朝楊鎬四路師敗鶴薦熊廷弼張鶴鳴李長庚薛國用袁應泰言遼事之失不料彼己喪師

辱國誤在經略不諳機宜馬上催戰誤在輔臣調度不聞束手無策誤在樞部至尊優柔不斷又至尊自誤當事惡其直將假他事逐之乃引疾去丁外艱天啟初起太僕少卿擢右僉都御史巡撫南贛未任丁內艱而廣寧又敗魏忠賢以鶴黨護廷弼除鶴名崇禎元年召拜左僉都御史進左副都御史鶴上言圖治之要在培元氣自大兵大役加派頻仍公私交罄小民之元氣傷自遼左黔蜀喪師失律暴骨成邱封疆之元氣傷自搢紳構黨彼此相傾逆奄乘之誅鋤善類士大夫之元氣傷譬如重病初起百脉未調風邪易入道在培養時以爲名言先是遼左用兵逃軍憚不敢歸伍相聚剽虜至是關中頻歲祲有司不恤下白水王二者鳩衆墨其面闖入澄城殺知縣張耀采由是府谷王嘉允漢南王大梁階州周大旺羣賊益起三邊饑軍應之流氛之始也當是時承平久卒被兵人無固志大吏惡聞賊曰此饑氓徐自定耳明年總督武之望死久之廷臣莫肯往者羣推鶴帝召見鶴問方略對曰清慎自持撫恤將卒而已遂拜鶴兵部右侍郎代之望總督陝西三邊軍務至則大梁大旺王二已前誅滅而繼起者益衆鶴素有清望然不知兵其冬京師戒嚴延綏寧夏甘肅固原臨洮五鎮總兵官悉以勤王行延綏兵中道逃歸甘肅兵亦譁懼誅並合於賊賊益張三年正月王左掛等攻宜川爲知縣成材所却轉攻韓城軍中無帥鶴命參政洪承疇禦之俘斬三百餘人圍解賊走清澗鶴連疏請諸將還鎮不果起故將杜文煥任之二月延安知

府張肇都司艾穆感賊延川降其魁王子順張述聖姬三兒別賊王嘉允掠延安慶陽鶴匿不奏而給降賊王虎小紅狼一丈青掠地虎混江龍等免死牒安置延綏河曲間賊淫掠如故有司不敢問寇患成於此矣七月嘉允陷黃甫清水木瓜遂陷府谷文煥擊走之賊流入山西已撫王左掛以白汝學攻綏德州謀內應事覺巡按李應期與承疇計誅左掛等綏德五十七人皆死十二月賊神一元攻陷新安靈塞柳樹澗等堡靈塞文煥所居宗人多死明年正月賊棄靈塞陷保安一元死弟一魁圍慶陽陷合水鶴聞移駐靈州一魁求撫送還合水知縣蔣應昌別賊拓先齡金翅鵬過天星田近菴獨頭虎上天龍等亦先後降鶴設御座於城樓賊跪拜呼萬歲鶴宣聖諭令設誓或歸伍或歸農賊佯應之則立赦其罪羣盜自是視總督如兒戲矣鶴又以一魁最強致其婿帳中同臥起而一魁果至數以十罪則稽首謝卽宣詔赦之昇以官處其衆四千餘人於靈塞使守備吳弘器護焉文煥聞之歎曰靈塞之役賊畏我而逃今者賊僞降楊公信之僭名城爲盜資我宗人可與賊逼處此土乎遂以其族行五月鶴移駐耀州賊攻破金鎖關殺都司王廉七月別賊李老柴獨行狼攻陷中部田近菴以六百人守馬欄山應之而降渠一魁之黨茹成名者尤桀鷩鶴令一魁誘殺之於耀州其黨猜懼挾一魁以叛御史謝三賓言鶴謂慶陽撫局旣畢賊散遣俱盡中部之賊靈自天降疏下巡按御史吳姓敷奏姓奏鶴主撫誤國帝怒逮鶴下獄戍袁州七年

秋子嗣昌擢宣大山西總督疏辭言臣父鶴以總督蒙譴已三年臣何心復居此職帝優詔答之而不赦鶴罪八年冬鶴卒於戍所嗣昌請恤帝復鶴官而不予恤鶴初以尤世祿寧夏大捷功進兵部尚書太子少保世膺錦衣千戶十年叙賀虎臣寧夏破賊功追加太子少傅十三年又以甘肅叙功任一子官從弟鸚崇禎四年進士官御史有才名擢順天巡撫京師陷南歸福王以爲兵部右侍郎總督川湖軍務

陳奇瑜字玉鉉保德州人萬曆四十四年進士除洛陽知縣天啟二年擢禮科給事中楊漣劾魏忠賢奇瑜亦抗疏力詆六年春由戶科左給事中出爲陝西副使遷右參政分守南陽崇禎改元加按察使職尋歷陝西左右布政使五年擢右僉都御史代張福臻巡撫延綏時大盜神一魁不沾泥等已殲而餘黨猶衆歲大凶民多從賊明年五月奇瑜上疏極言廊延達鎮城千餘里饑荒盜賊狀詔免延安慶陽田租奇瑜乃遣副將盧文善討斬截山虎柳盜跖金翅鵬等尋遣遊擊常懷德斬薛仁貴參政戴君恩斬一條龍金剛鑽開山鶴黑煞神人中虎五閻王馬上飛都司賀思賢斬王登槐巡撫羅聖楚斬馬紅狼滿天飛參政張伯鯨斬滿鵝禽黃參耀溝隔飛守備閻士衡斬張聰樊登科樊計榮一塊鐵青背狼穿山甲老將軍二將軍滿天星上山虎把總白士祥斬埽地虎守備郭金城斬扒地虎括天飛守備郭太斬跳山虎新來將就地滾小黃鶯房日兔遊擊羅世勛斬賈總管逼上天小紅旗他將斬草上飛一隻虎一翅飛雲裏手

四天王薛紅旗獨尾狼諸渠魁略盡奇瑜乃上疏曰流寇作難始於歲饑而成於元兇之煽誘致兩郡三路皆盜藪今未頓一兵未絕一弦禽斬頭目百七十七人及其黨千有奇頭目既除餘黨自散向之斬木揭竿者今且荷鋤負耒矣帝嘉之令錄有功將士以聞延綏羣賊多解獨鑽天哨開山斧據永寧關永寧在鎮城東前阻山下臨黃河數年不下奇瑜謂是不可以力取乃陰簡銳士陽言總制檄發兵令賀人龍將之而西身爲後勁直抵延川俄策馬東曰視吾馬首所向潛師疾走入山賊不虞大兵至驚潰焚其巢斬首千六百有奇二賊俱馘分兵擊斬金翅鵬一座城獲首五百五十延水羣盜盡平奇瑜威名著關陝於是羣盜盡萃於山西流突河北畿南冬冰堅從澗池渡躡河南湖廣窺四川明年廷議諸鎮撫事權不一宜設大臣統之多推薦洪承疇以承疇方督三邊不可易乃擢奇瑜兵部右侍郎兼右僉都御史總督陝西山西河南湖廣四川軍務專辦流賊奇瑜檄諸將會兵陝州先是老回過天星滿天星闖塌天混世王五大營自楚入蜀陷夔州阻險復走還楚分爲三一犯均州往河南一犯鄭陽往浙川一犯金漆坪渡河犯商南奇瑜乃馳至均州檄四巡撫會討陝西練國事駐商南遏其西北鄭陽盧象昇駐房竹遏其西河南元默駐盧氏遏其東北湖廣唐暉駐南漳遏其東南奇瑜乃偕象昇督將士由竹谿至平利之烏林關十餘戰斬賊千七百餘級越七日大破之七家溝斬千八十餘級總兵鄧玘功爲多已設伏納谿連

戰斬三百餘級至獅子山斬七百二十餘級別將楊化麟楊世恩周任鳳楊正芳等分道擊殺賊禽其魁
闖王翻山虎等奇瑜上言楚中屢捷一時大盜幾盡其竄伏深山者臣督鄉兵爲嚮道無穴不搜楚中漸
有寧宇帝嘉勞之乃督副將劉遷等搜竹谿平利賊追至五狼河禽其魁十二人遣參將賀人龍等追入
晝夜至紫陽賊死者萬餘人先是賊入蜀復自蜀入秦由陽平關奔鞏昌承疇禦之秦州賊遂越兩當襲
破鳳縣分爲二一向漢中取間道犯城固洋縣一由鳳縣奔寶雞汧陽於是賊在平利洵陽間者數萬自
四川入西鄉者二三萬犯城固洋縣者又東下石泉漢陰會漢興窺商維當是時奇瑜以湖廣賊盡鼓行
而西謂賊不足平也乃遣遊擊唐通防漢中以護藩封遣參將賀人龍劉遷夏鎬拒略陽沔縣防賊西遁
道副將楊正芳余世任扼襄城防賊北遁自督副將楊化麟柳國鎮等駐洋縣防賊東遁又檄練國事盧
象昇元默各守要害截賊奔逸賊見官軍四集大懼悉遁入興安之車廂峽諸渠魁李自成張獻忠等咸
在焉峽四山巉立中互四十里易入難出賊誤入其中山上居民下石擊或投以炬火山口繫石塞路絕
無所得食困甚又大雨二旬弓矢盡脫馬乏芻死者過半當是時官軍感之可盡殲自成等見勢絀用其
黨顧君恩謀以重寶賄奇瑜左右及諸將帥僞請降奇瑜無大計遽許之先後籍三萬六千餘人悉勞遣
歸農每百人以安撫官一護之檄所過州縣具糗糧傳送諸將無邀撓撫事諸賊未大創降非實也既出

棧道遂不受約束盡殺安撫官五十餘人攻掠諸州縣關中大震奇瑜悔失計乃委罪他人以自解賊初叛猝至鳳翔誘開城守城知其詐給以縋城上殺其先登者三十六人餘謀而去其犯寶雞亦爲知縣李嘉彥所挫奇瑜遂劾嘉彥及鳳翔鄉官孫鵬等撓撫局撫按官亦異心帝怒切責撫按逮嘉彥鵬及士民五十餘人奇瑜又請敕陝西鄜陽湖廣河南山西五巡撫各守要害有失則治諸臣罪冀以分已過又委罪巡撫練國事國事亦被逮給事中顧國寶劾奇瑜誤封疆詔解任候勘御史傅永淳復劾奇瑜解隴州圍報首功不實詔除名錦衣官逮訊九年六月謫戍邊初奇瑜官南陽唐王殺其世子欲并廢世子子聿鍵賴奇瑜力聿鍵得爲世孫後聿鍵自立於閩召奇瑜爲東閣大學士道遠未聞命卒於家元默字中象靜海人萬曆四十七年進士除懷慶推官擢吏科給事中魏忠賢熾方熾以鄉里欲招致之默謝不可言路承忠賢意劾罷歸崇禎初復官歷遷太常卿六年春以僉都御史巡撫河南流賊由均州犯河內默率左良玉湯九州李卑鄧玘兵待境上復率九州乘雪夜薄吳城賊營大破之嵩雒以北名城數十賊避勿敢攻奇瑜既失李自成於車箱峽默自汝州移駐盧氏檄良玉九州各陳兵守要害得稍寧者數月當是時賊勢張良玉等承督師檄守備尙固默率諸將斬獲多賊多趨秦楚境已分爲三自潁州犯鳳陽皇陵中州所在告急八年夏默被逮去久之得釋歸八年卒

熊文燦貴州永寧衛人萬曆三十五年進士授貴州推官遷禮部主事歷郎中出封琉球還擢山東左參政山西按察使山東右布政使憂歸自是徙家蘄水崇禎元年起福建左布政使三月就拜右僉都御史巡撫其地海上故多劇盜袁進李忠既降楊六楊七及鄭芝龍繼起總兵官俞咨臯招六七降芝龍猖獗如故然芝龍常敗都司洪先春釋不追獲一遊擊不殺咨臯戰敗縱之走當事知其可撫遣使諭降之文燦至善遇芝龍使爲己用其黨李魁奇再降再叛去芝龍擊禽之海警漸息而鍾斌又起斌初亦就撫後復叛寇福州文燦誘斌往泉州令芝龍擊敗之既而感之大洋斌投海死閩中屢平巨寇皆芝龍力文燦亦敘功增秩焉五年二月擢文燦兵部右侍郎兼右僉都御史總督兩廣軍務兼巡撫廣東先是海寇鍾靈秀既降復叛爲芝龍所禽其黨潰入長汀轉掠江西屬邑文燦檄芝龍屢敗賊而福建有紅夷之患海盜劉香乘之連犯閩廣沿海邑帝以責文燦文燦不能討乃議招撫賊佯許之參政洪靈蒸長沙人初官廣西參政嘗搜靈秀餘黨斬三十餘級盡毀其巢文燦乃令靈蒸與副使康承祖參將夏之本張一傑入賊舟宣諭俱被執文燦懼罪奏諸臣信賊自陷給事中朱國棟劾之詔貶秩戴罪自效八年芝龍合廣東兵擊香於田尾遠洋香脅靈蒸止兵靈蒸大呼曰我矢死報國急擊勿失遂遇害香勢感自焚溺斃承祖等脫還賊黨千餘人詣浙江歸款海盜盡平文燦官閩廣久積貲無算厚以珍寶結中外權要謀久鎮嶺

南會帝疑劉香未死且不識文燦爲人遣中使假廣西采辦名往覘之既至文燦盛有所贈遺留飲十日中使喜語及中原寇亂文燦方中酒擊案罵曰諸臣誤國耳若文燦往詎令鼠輩至是哉中使起立曰吾非往廣西采辦也銜上命覘公公信有當世才非公不足辦此賊文燦出不意悔失言隨言有五難四不可中使曰吾見上自請之若上無所吝卽公不得辭矣文燦辭窮應曰諾中使還朝果言之帝初文燦徙蘄水與邑人姚明恭爲姻婭明恭官詹事又與楊嗣昌善嗣昌握兵柄承帝眷以帝急平賊冀得一人自助明恭因薦文燦且曰此有內援可引也嗣昌喜遂薦之十年四月拜文燦兵部尙書兼右副都御史代王家禎總理南畿河南山西陝西湖廣四川軍務文燦拜命卽請左良玉所將六千人爲己軍而大募粵人及烏蠻精火器者一二千人以自護弓刀甲冑甚整次廬山謁所善僧空隱僧迎謂曰公誤矣文燦屏人問故僧曰公自度所將兵足制賊死命乎曰不能曰諸將有可屬大事當一面不煩指揮而定者乎曰未知何如也曰二者旣不能當賊上特以名使公厚望一不效誅矣文燦卻立良久曰撫之何如僧曰吾料公必撫然流寇非海寇比公其慎之文燦去抵安慶帝所遣中官劉元斌盧九德監勇衛營軍者亦至良玉宿將桀驁不受文吏節制會其下與粵軍不和大詬文燦不得已遣還南兵然良玉軍實不爲用嗣昌言於帝乃以邊將馮舉苗有才兵五千人隸焉有才敗於真陽而京營將黃得功連破賊兵威甚振

當是時嗣昌建四正六隅之策增兵餉大半期滅賊賊頗懼及文燦至京軍屢捷益懼文燦顧決計招降初抵安慶卽遣人招張獻忠劉國能二人聽命乃益刊招降檄布通都又請盡遷民與粟閉城中賊無所掠當自退帝怒譙讓文燦嗣昌亦心非之旣已在任之則曲爲文燦解因其請畀以畿輔山西兵各三千明年國能果降而獻忠襲據穀城會得功又大破賊舞陽馬士秀杜應金夜半降信陽城下獻忠爲左良玉所創幾被禽其下饑困多散去獻忠窮蹙亦因陳洪範以降於是嗣昌議功罪絀洪承疇曹變蛟等而稱文燦功焉已而京軍解遂平圍斬獲三千有奇時文燦在裕州馬進忠羅汝才十三家賊聚南陽文燦下令殺賊者償死賊不肯從則齎金帛酒牢犒之名曰求賊帝詎得狀曰文燦大言無實文燦恐孫傳庭出關擊賊文燦不救而嗣昌已入政府掌中樞矣九月文燦次襄陽賊分踞鄖襄諸險諸將請戰文燦議分兵盧九德曰兵分則力弱一失利全軍搖矣莫若厚集其力而合擊之衆曰善乃以僉事張大經監大將左良玉陳洪範軍以通判孔貞會監副將龍在田軍戰於雙溝大破之斬首二千餘級羅汝才惠登相率九營走均州李萬慶率三營走光固十一月京師戒嚴召洪承疇孫傳庭入衛汝才等以爲討己也懼而叩太和山提督中官求撫於文燦許之處汝才及一丈青小秦王一條龍四營於鄖縣處登相及王國盜常德安楊友賢王光恩五營於均州上言臣於李萬慶賀一龍馬光玉及順天王主剿他皆主撫請赦汝

才等罪授之官可之時京軍賈玉軍皆以入衛行馬士秀杜應金遂叛於許州初士秀等降賈玉以其衆處許之郊外許大州也賈玉諸將寄擊與賈玉久征不歸士秀應金在文燦軍中僞請急假賈玉軍號入城夜半兵從府第出燒城南樓刦庫殺官吏挈其貲投萬慶萬慶者賊魁射塌天也十二年三月賈玉遣破降馬進忠使劉國能擊降萬慶士秀應金亦再降順天王已前死其黨順義王爲其下所殺文燦遂上言臣兵威震懼降者接踵十三家之賊惟革左及馬光裕三部尙稽天誅可歲月平也帝優詔報之初張獻忠之降也擁兵萬人踞穀城索十萬人餉文燦及中外要人曰與之爲請官請地請關防矣獻忠列軍狀曰請備遣旣而三檄其兵不應朝野知獻忠必叛也其後汝才降不肯釋甲及進忠萬慶等並降文燦以爲得策謂天下且無賊也五月獻忠遂反於穀城刦汝才於房縣於是九營俱反初均州五營懼見討自疑相與歃血拒獻忠無何亦叛去帝聞變大驚削文燦官戴罪視事七月賈玉擊獻忠羅漢山敗績帝大怒命嗣昌來代嗣昌已至軍卽遣使逮文燦下獄坐大辟所親姚明恭柄國而不能救也十三年十月文燦竟棄市

練國事字君豫永城人萬曆四十四年進士授沛縣知縣調山陽天啟二年徵授御史廣寧失守國事請薊州宣府大同及山東山西河南撫臣各練兵萬以壯山海聲援又請捕誅殺大同妖人又疏論魏忠賢

使羣屬辱尙書鍾羽正索冬衣傷國體國事在諫垣匡救多給事中趙興邦忠賢私人也以國事爲趙南
星黨劾之削籍崇禎元年復官擢太僕少卿進右僉都御史巡撫陝西關中頻歲饑盜賊蠡起四年正月
神一元陷保安國事遣賀虎臣援延安而身率副將張全昌連破點燈子於中部邵陽韓城又破別部於
宜君雒川降其魁李應鰲諸將張全昌趙大允王承恩杜文煥賀虎臣等分剿賊澄城宜川耀州白水邵
陽斬首千九百有奇總督楊鶴旣受羣賊降已復相繼叛田近菴李老柴陷中部國事借承恩攻圍五月
克之而所部亦頻失事楊鶴被徵國事亦戴罪自贖五年紅軍友李都司等將犯平涼國事自涇趨固原
檄大帥楊嘉謨殺賊塘馬斷其偵探賊乃走慶陽西壕嘉謨曹文詔邀擊大敗之自三月至五月大小數
十戰賊迄破滅國事免戴罪當是時關中五鎮大帥曹文詔楊嘉謨王承恩楊麟賀虎臣各督邊軍協討
總督洪承疇尤善調度賊魁多殲餘盡走山西關中稍靖六年冬賊旣從澠池渡入盧氏明年賊遂由河
南湖廣入漢南總督陳奇瑜檄國事駐商州協剿商南盧氏賊漢南賊遂由靈羌至兩當掠鳳縣出棧道
陷寶雞關中賊復熾旣而奇瑜受賊降檄諸軍勿擊賊出險遂大掠鳳翔麟游寶雞扶風汧陽乾州涇陽
醴泉奇瑜委罪國事以自解國事上言漢南賊盡入棧道奇瑜檄止兵臣未知所撫實數及見奇瑜疏八
大王都萬三千餘人蠟子塊部萬五百餘人張妙手部九千一百餘人八大王又一部八千三百餘人臣

不覺仰天長歎夫一月內擁強寇四萬餘盡從棧道入內地食飲何自出安得無剽掠且一大帥將三千人而一賊魁反擁萬餘衆安能受紀律卽藉口回籍延安州縣驟增四萬餘人安集何所合諸征剿兵不滿二萬而降賊踰四萬豈內地兵力所能支宜其連陷名城而不可救也若咎臣不堵剿則先有止兵檄矣若云賊已受撫因誤殺使人致然則未誤殺之先何爲破麟游永壽今事已至此惟急調大軍致討若仍以願回原籍禁兵勿剿三秦之禍安所終極哉疏入事已不可爲遂逮下獄九年正月遣戍廣西久之敘前功赦還復冠帶福王時召爲戶部左侍郎尋改兵部十二月加尙書仍泄侍郎事明年二月致仕未幾卒

丁啟睿永城人萬曆四十七年進士崇禎初歷山東右參政坐事謫陝西副使九年寧夏兵變啟睿捕斬殺巡撫王楫者首惡六人軍中大定再遷右布政使分守關南從巡撫孫傳庭討賊十一年冬就拜右僉都御史代傳庭巡撫陝西歲頻旱民益爲盜長武環白水長安臨潼咸陽賊起如蝟毛十三年用督師楊嗣昌薦擢兵部右侍郎兼右僉都御史代鄭崇儉總督陝西三邊軍務討賊明年嗣昌死加啟睿兵部尙書改稱督師代嗣昌盡督陝西湖廣河南四川山西及江南北諸軍仍兼總督陝西三邊軍務賜劍敕印如嗣昌啟睿自謫河西副使數遷皆在陝西然實庸才爲督撫奉督師期會謹慎無功過及督師任重專

制卽莫知爲計啟睿已受命出潼關將由承天赴嗣昌軍於荊州湖廣巡按汪承詔言大寇在河南荆襄幸息警無煩大軍盡匿漢津船啟睿至五日不得渡折而向鄧州州人閉門詬過內鄉長吏閉之糴軍行荒山間割馬羸燎以野草土啗不得飽是時李自成已陷洛陽圍開封有衆七十萬啟睿憚不敢援聞張獻忠在光山固始聞少弱乃謀於諸將曰上命我勦豫賊此亦豫賊也遂檄左良玉破之於麻城斬首千二百開封日告急則曰我方有事於獻忠不赴矣聞傅宗龍將入關督秦師啟睿曰三邊已置總督矣乞帝更敕書乃更敕書宗龍辦自成九月宗龍敗歿於項城啟睿不能救賊乘勝陷南陽殺唐王開汝二郡望風下十二月自成再圍開封河南巡撫高名衝飛檄至啟睿督兵赴之避賊入城部下大淫掠總兵陳永福射自成中其左目明年正月賊解圍去啟睿之在許州也畏賊逼始赴開封離城三十里而城卽破其抵開封啟門入賊乘之幾陷四月自成合羣賊復攻開封六月帝釋侯恂於獄命督援勦諸軍救開封未至開封圍益急帝數詔切責啟睿啟睿不得已乃大集良玉虎大威楊德政方國安之軍偕保安總督楊文岳以七月會於朱仙鎮與賊壘相望賊衆百萬啟睿欲戰良玉曰賊鋒銳未可擊也啟睿曰圍已急必擊之諸將皆懼良玉歸營卽先走諸營俱走啟睿文岳聯騎奔汝寧賊渡河逐之追奔四百里喪馬羸七千將士數萬啟睿敕書印劍俱失事聞詔褫職候代九月賊決馬家口河灌開封開封遂陷乃徵下吏

久之釋歸自嗣昌死二年而啟睿敗啟睿敗又二年而明亡矣福王時啟睿資緣馬士英充爲事官督河南勸農剿寇諸務尋以禽斬歸德僞官拜兵部尙書加太子太保官其一子事敗脫身旋里久之卒從父魁楚崇禎四年春以右僉都御史巡撫保定七年擢兵部右侍郎代傅宗龍總督薊遼保定軍務九年七月畿輔被兵魁楚坐下吏久之放還福王時起故官總督河南湖廣兼巡撫承天德安襄陽未赴會兩廣總督沈猶龍入爲侍郎魁楚竟代其任尋加兵部尙書唐王自立於福州命以故官協理戎政靖江王寧嘉反桂林下梧州執巡撫瞿式耜魁楚檄思恩參將陳邦傳等襲走之獲於桂林封魁楚平粵伯仍留鎮兩廣閩中事敗與式耜擁立桂王於肇慶進東閣大學士兼理戎政

大清兵下廣州漸迫肇慶魁楚奉王走梧州復棄之走岑溪輜重多舳艫相屬爲大將李成棟追獲魁楚遂降成棟與有隙錄其家數百人殺之魁楚乞一子成棟笑曰汝身且莫保尙求活人耶并殺之

鄭崇儉字大章寧鄉人萬厯四十四年進士授河南府推官歷濟南兵備副使崇禎初遷陝西右參政屢遷右僉都御史巡撫盩厔數敗套寇資銀幣世廕錦衣副千戶十二年正月擢兵部右侍郎代洪承疇總督陝西三邊軍務五月張獻忠反穀城羅汝才等九營皆反興安告警總理熊文燦請敕楚撫方孔炤防荆門當陽鄖撫王鰲永防江陵遠安陝撫丁啟睿蜀撫邵捷春各嚴兵於其境而崇儉主提兵合擊時固

原臨洮寧夏三總兵左光先曹變蛟馬科隨承疇入衛柴時華中道還甘肅徵之不應崇儉乃檄副將翼人龍李國奇等軍發西安國奇至洛陽卒大諫剽瑞王租國奇已擢陝西總兵官坐停新命崇儉亦貶一秩獻忠既叛大敗左良玉軍於房縣之羅漢山謀入陝崇儉率人龍國奇軍扼之興安賊還走興山太平處楚蜀交是時楊嗣昌已出師入文燦軍而代之矣先是尙書傅宗龍議令崇儉兼督蜀軍而嗣昌亦檄秦軍入蜀崇儉乃以十三年二月率人龍國奇會良玉大敗賊於瑯瑤山獲首功千三百三十有三降賊將二十有五人獲馬羸甲仗無算是役也崇儉身在行而嗣昌遠處襄陽及論功所賜半嗣昌但增一秩復先所降一秩而已獻忠既敗竄柯家坪蜀將張令追之被圍崇儉遣兵擊走賊人龍國奇等復追敗之寒溪寺鹽井先後斬首千五百級其黨順天王一條龍一隻龍皆降崇儉軍五日三捷威名甚振以年衰乞骸骨不許令率總兵鄭家棟還關中留人龍國奇討賊當是時獻忠竄伏興歸山中秦楚師俱集於夔諸將協心窮搜深箐千餘殘寇可盡殲崇儉既去未幾人龍軍亦自開縣謀而西歸楚師遂敗績於土地嶺蜀中由是大亂嗣昌因言崇儉撤兵太早致賊猖獗帝初以崇儉不能馭軍不悅及是命削籍以啟睿赴軍前代理而疑崇儉託疾令按臣核實明年春獻忠陷襄陽嗣昌死帝益恨崇儉不犄角平賊也逮下獄責以縱兵擅還失誤軍律不俟秋後以五月棄市帝自卽位以來誅總督七人崇儉及袁崇煥劉策楊

一鵬熊文燦范志完趙光抃也帝憤寇日熾用法益峻功罪不假貸而疆事寢壞卒至於亡福王時給事中李清言崇儉未失一城喪一旅因他人巧卸遂服上刑羣臣微知其寃無敢訟言者臣甚痛之崇儉寬始白方孔炤字潛夫桐城人萬曆四十四年進士天啟初爲職方員外郎忤崔呈秀削籍崇禎元年起故官憂歸定桐城民變還朝十一年以右僉都御史巡撫湖廣擊賊李萬慶馬光玉羅汝才於承天八戰八捷時文燦納獻忠降處之穀城孔炤條上八議言主撫之誤不聽而陰厲士馬備戰守已而賊果叛如孔炤言賊果畏孔炤不敢東文燦乃檄孔炤防荆門當陽鰲永防江陵遠安秦蜀各嚴兵崇儉主合擊孔炤乃請專斷德黃守承天護獻陵而江漢以南責鰲永會嗣昌代文燦令孔炤仍駐當陽惠王常澗言孔炤遇獻忠有來家河神通堡之捷射中賊魁馬光玉陵寢得無虞請增秩久任章下部未奏而部將楊世恩羅安邦奉調會川沅兵勦竹山寇兩將深入至香油坪而敗嗣昌旣以孔炤撫議異己也又忤其言中遂因事獨劾孔炤逮下詔獄子簡討以智國變後棄家爲僧號無可者也伏闕訟父寃膝行沙壠者兩年帝爲心動下議孔炤護陵寢功多減死戍紹興久之用薦復官以右僉都御史屯田山東河北馳至濟南復命兼理軍務督大名廣平二監司禦賊命甫下而京師陷孔炤南奔馬阮亂政歸隱十餘年而終先是有以陵寢失守獲重譴者爲楊一鵬一鵬臨湘人歷官大理寺丞削籍崇禎六年以兵部左侍郎拜戶部尚

書兼右僉都御史總督漕運巡撫江北四府鳳陽軍民素疾守陵太監楊澤貪虐引賊來寇八年正月賊遂攻陷鳳陽焚皇陵燒龍興寺燔公私邸舍二萬二千六百五十戮中都留守朱國相指揮使程永寧等四十有一員殺軍民數萬人先是賊漸逼江北兵部尙書張鳳翼請敕一鵬移鎮鳳陽溫體仁格其議賊驟至一鵬在淮安遠不及救帝聞變大驚素服避殿親祭告太廟遂遣一鵬及巡按御史吳振纓守陵官澤澤先自殺一鵬棄市振纓戍邊

邵捷春字肇復侯官人萬厯四十七年進士累官稽勳郎中崇禎二年出爲四川右參政分守川南撫定天全六番高楊二氏遷浙江按察使大計坐貶久之起四川副使以十年秋抵成都時秦賊已入蜀巡撫王維章總兵侯良柱悉衆北拒城中惟屯田軍及蜀府護衛軍人情恆懼捷春啟門納鄉民避賊者中尉奉鑿勾賊抵城下捷春與御史陳廷謨禽擊奉鑿而募市人起廢將固守賊去蜀王疏其功會維章罷傅宗龍代命捷春監軍偕總兵羅尙文擊賊明年尙文及安錦副使吳麟徵大破賊過天星等捷春進右參政仍監軍十二年五月宗龍入掌中樞卽擢捷春右僉都御史代之時張獻忠羅汝才已叛謀入秦秦兵扼之興安乃犯興山及蜀太平遂窺大寧捷春遣副將王之綸方國安分道扼之國安連破賊賊遂還入秦楚十月朔楊嗣昌督師襄陽檄蜀軍受節度嗣昌以楚地廣衍賊難制驅使入蜀蜀險阻賊不得還

之可全勝又慮蜀重兵扼險賊將邇壽楚調蜀精銳萬餘爲己用蜀中卒自是益罷弱不足支矣捷春憤曰令甲失一城巡撫坐今以蜀委賊是督師殺我也爭之不能得於是汝才惠登相遂自興山遠安犯大寧大昌獻忠亦西至太平明年二月左良王大破獻忠瑪瑙山他將張應元張令等復數敗之獻忠乃逃興歸山中久之復振由汝才入寧昌故道走而西初汝才在寧昌阻江爲諸將劉貴秦良玉秦翼明楊茂選等所拒不得渡會獻忠西遂與合貴等戰皆卻賊乃渡江營萬頃山苦桃灣其別部營紅茨崖青平皆歸巫閭大震嗣昌乃上夷陵而檄捷春扼夔門蜀大寧大昌界楚竹溪房縣有三十二隘口嗣昌欲厚集兵力專守夔棄寧昌噉賊官軍環攻之捷春曰棄隘口不守是延賊入戶也乃遣茂選及覃思岱等出關分守二將不相得思岱潛殺茂選捷春令兼統其衆其衆相率去賊入隘守者潰賊夜斬夔關將士大驚潰新寧大竹皆陷而汝才登相越巴霧河陷開縣爲鄭嘉棟賀人龍所破汝才乃與小秦王混世王東奔而登相獨過開縣西人龍及李國奇又西追之汝才等遁還興山屢挫會嗣昌下招降令小秦王混世王皆降惟汝才逸去嗣昌見楚地無賊以八月終率師入蜀於是羣賊盡萃蜀中當是時捷春提弱卒二萬守重慶所倚惟秦良玉張令軍無何秦師譟而西歸楚將張應元等敗績於夔州之土地嶺於是捷春以大昌上中下馬渡水淺地平難與持久乃扼水寨觀音巖爲第一隘以都將邵仲光守之而夜又巖三黃

簡磨子巖魚河洞下涌諸處各分兵三四百人以守萬元吉以兵分力弱爲憂捷春不聽九月獻忠突敗仲光軍破上馬渡元吉急檄諸將分邀之復令張奏凱屯淨壁捷春遣二將羅洪政沈應龍爲助十月獻忠突淨壁遂陷大昌屯開縣良玉令兩軍皆覆賊行則哨探止則息馬抄糧關隘偵候不明防軍或遠離戍所賊乘隙而過無人之境嗣昌遂收斬仲光上疏劾捷春失事捷春收兵扼梁山時登相已歸正而汝才復與獻忠合以梁山河深不能渡乃自開縣西走達州捷春退保綿州扼涪江賊疾走陷劍州遂趨廣元將由間道入漢中爲秦兵所扼乃復走巴西應元諸軍邀之梓潼戰小利旣而劔蜀將曹志耀等力戰卻之降將張一州張載福陷陣死涪江師遂潰賊屠綿州捷春歸成都賊逼成都十一月逮捷春使者至遂以軍事付代者廖大亨而去捷春爲人清謹治蜀有惠政士民哭送者載道舟不得行競逐散官旗蜀王爲疏救不聽敕巡按御史遣官送京師下獄論死捷春知不可脫明年八月仰藥死獄中福王時復官贈兵部右侍郎

余應桂字二磯都昌人萬曆四十七年進士歷知武康龍巖海澄三縣崇禎四年徵授御史劾戶部尙書畢自巖朋比殿試讀卷取陳于泰第一于泰者首輔周延儒姻也劾延儒納孫元化參紹受楊鶴重賂帝方嘗延儒責應桂未幾賊陷登州元化被執應桂再疏劾延儒帝怒貶三秩視事應桂引疾歸七年還朝

出按湖廣居守承天捐贖錢十餘萬募壯士繕城治器械不敢逼獻陵帝聞而嘉之期滿令再巡一年貽贖錢萬五千助盧象昇軍需而奏報屬城失事具以實聞帝以是知巡撫王夢尹詐而益信應桂期滿命再巡一年十年卽擢應桂右僉都御史代夢尹當是時諸監司袁繼成包鳳起高斗樞輩已削平湖南羣賊而江北賊勢日熾諸將雖奏捷不能大創也帝命熊文燦爲總理文燦主撫明年降其渠劉國能張獻忠馬進忠西走潼關馬光玉賀一龍李萬慶順義王九條龍衆十餘萬萃麻城黃安應桂諭降光玉一龍未至而遣將擊順天王等於黃福店賊遂走黃安會文燦至麻城應桂請協擊不從賊復東走江北爲左良玉所遏折而走廣濟蘄水文燦檄諸道兵合擊賊於茶山賊逸於應桂所分地文燦遂劾其後期誤軍兵部尙書楊嗣昌以應桂曾劾其父鶴也奏逮之應桂乃陳撫勦始末自己無罪而詆文燦言正月初議撫劉國能其黨李萬慶等諸大賊盡走泌陽棗陽時文燦良玉並在德安臣以爲兵勢方盛宜乘此追勦而文燦調良玉諸軍盡赴信陽勦馬進忠臣謂進忠小寇勝之不武文燦不聽自此機一失賊走西而文燦東致張獻忠攻陷穀城以要撫李萬慶五部收餘燼勢復振而豫楚之患遂自文燦之悞諫貽之矣迨賊西潰之後遮飾上聞妄報斬級其自恃所長惟火礮火攻經過州縣用夫至八百死亡載道未見其一試也且文燦辦賊之策曰先撫後勦乃茶山不效麻城又不效第見招撫之旗絡繹於道一遣使招贖一

龍而使者被殺一遣使招李萬慶而餽鹽椒運魚肉與通市賊反因之焚掠未見一賊歸順也天下有如
是撫法乎其一切軍需悉取於所歷之有司名曰借辦致城市空虛子遺盡絕三月至麻城民不堪淫掠
欲焚其署始踴躍而走麻城文燦壻家也戚里如是餘可知矣三月在蘄水其兵殺鄉民報捷民家環哭
竟不敢治一兵蘄水文燦家園也鄉里如是餘可知矣是以捷報日張寇勢愈熾十三家之賊蹂躪南陽
汝寧如履無人之境文燦駐宛汝已久調度不聞天下有如是勦法乎獻忠在穀城招納亡命買馬置器
人人知其叵測文燦顧欲借之爲前茅遣官調之非惟不應復留解餉之官求總兵湖廣今已造浮橋跨
漢水矣文燦前旣誇張而敘功後復掩匿而不報可不謂之欺君乎以總理之大柄畀之顛蹶之耄夫臣
不知其可也帝不納逮至下獄初應桂貽書文燦言獻忠必反可先未發圖之其書爲獻忠邏者所得獻
忠騰牒鄭陽巡撫戴東旻言撫軍欲殺我東旻聞之文燦文燦再糾應桂應桂再疏辨帝亦不納應桂竟
遣戍無何獻忠果反廷臣交章薦應桂十六年起應桂兵部右侍郎十月潼關陷帝召問大臣陳演言賊
入關中必戀子女玉帛猶虎入陷穿應桂叱之曰壯士健馬咸出關西賊得之必長驅橫行大臣安得面
謾演股栗失色十一月督師孫傳庭戰歿命應桂兼右僉都御史往代之應桂以無兵無餉入見帝而泣
帝但遣京軍千人護行給御用銀萬兩銀花四百銀牌二百蟒幣二百雜幣倍之爲軍前賞功之用而已

應桂旣受命日夜悲疑將至山西則僞官充斥逡巡不得前帝責以逗遛奪職命新擢陝西巡撫李化熙代之化熙亦不能進也未幾京師陷應桂家居不出久之死於難

高斗樞字象先鄞人崇禎元年進士授刑部主事坐議巡撫耿如杞獄與同列四人下詔獄尋復官進員外郎五年遷荊州知府久之擢長沙兵備副使楚郡之在湖北者盡罹賊禍勢且及湖南臨藍湖湘間土寇蠱起長沙止老弱衛卒五百又遣二百戍攸縣城庫雉堞盡圯斗樞至建飛樓四十大修守具臨藍賊艘二百餘由衡湘抵城下相拒十餘日乃却去轉攻袁州遣都司陳上才躡其後賊亦解去尋擊殺亂賊劉高峯等撫定餘衆詔錄其功巡撫陳睿謨大征臨藍寇斗樞當南面大小十餘戰賊盡平詔賚銀幣十四年六月進按察使移守鄖陽鄖被寇且十載屬邑有六居民不四千數百里荆榛撫治王永祚以襄陽急移師鎮之斗樞至甫六日張獻忠自陝引而東斗樞與知府徐啟元遣遊擊王光恩及弟光興分扼之戰頻捷賊不敢犯光恩者均州降渠小秦王也初與張獻忠羅汝才輩爲賊獻忠汝才降而復叛均州五營懼見討自疑又以獻忠強慮爲所併光恩斂衆據要害以拒獻忠居久之乃有稍稍颺去者光恩亦去已而復降光恩善用其下下亦樂爲之用斗樞察其誠招入郡守當是時斗樞啟元善謀光恩善戰鄖城危而復全十五年冬李自成陷襄陽均州攻鄖陽四日而去明年春復來攻十餘日不克乃退屯楊溪五

月斗樞召遊擊劉調元入城旬日間殺賊三千餘自成將來攻卒不克而去乃令光恩復均州調元下光化躬率將士復穀城將龔襄陽聞孫傳庭敗旋師均州復爲賊有十七年正月自成遣將路應標等以三萬人攻鄖斗樞遣人入均州燒其蓄積賊乏食而退當是時湖南北十四郡皆陷獨鄖在自十五年冬撫治王永祚被逮連命李乾德郭景昌代之路絕不能至中朝謂鄖已陷不復設撫治十六年夏斗樞上請兵疏始知鄖存衆議卽任斗樞而陳演與之有隙乃擢啟元右僉都御史任之加斗樞太僕少卿路阻亦不能達是年二月朝議設漢中巡撫兼督川北軍務擢斗樞右副都御史以往朝命亦不達至三月始聞太僕之命卽以軍事付啟元七月而北都變聞并聞漢中之命地已失不可往福王立移斗樞巡撫湖廣代何騰蛟復以道路不通改用王驥斗樞皆不聞也國變後數年卒啟元光恩亦皆以功名終

張任學安岳人天啟五年進士授太原知縣以才調榆次崇禎四年舉治行卓異入爲御史陳蜀中私稅催科訟獄三大苦帝爲飭行出視兩浙鹽法數條奏利弊八年流賊陷鳳陽詔逮巡按吳振纓命任學往代還朝復按河南監軍討賊時羣盜縱橫而諸將縮朒不敢擊任學慨然曰事不辭難臣職也賊勢如此我輩可雍容坐鎮耶十一年二月遂上疏極誅諸將請易武階親執干戈爲國平賊帝壯之下吏兵二部及都察院議諸臣以文吏無改武職者請仍以監軍御史兼總兵事帝不從命授署都督僉事爲河南總

兵官河南薊無總兵左良玉陳永福並以客兵備援勒至是大將特設而麾下無一官兵部乃以署鎮許定國兵授之使參將羅岱爲中軍岱健將屢著戰功任學倚以自強時熊文燦專主撫劉國能張獻忠俱降羅汝才馬進忠李萬慶等躡中原如故河南人據塙壁自保者數十賊悉摧破之踞息縣光州磔人投汝水水爲赤任學不能大創也進忠勢衰佯求撫文燦及巡撫常道立許之乘間逸去事聞任學與文燦道立並鐫秩七月任學督岱等赴羅山合左良玉軍擊汝才萬慶及紫微星順義王大敗之追奔五十里斬首一千四百有奇獲黑虎狼滿天星賊奔遂平九月進忠寇開封至瓦子坡岱督擊賊盡竊輜重遁入大隗山獲其妻子其冬京師戒嚴任學入衛道謁文燦言獻忠狼子野心終爲國患我以勤王爲名出其不意可立縛也文燦不能用抵畿南有詔却還巡撫道立調良玉兵於陝州賊乘盧氏虛遁入內鄉浙川爲文燦所劾明年除道立名任學亦鐫一秩遊擊宋懷智都司孔道興再破賊陳州部將王應龍尤之龍等破賊襄城五戰皆勝副將岱與應龍懷智等復破賊葉縣十日奏八捷帝詔所司核實已有挫賊裕州而是時總兵孫應元黃得功統京軍討賊屢奏大捷凱旋錄功任學亦敘復二秩尋與左良玉陳洪範感李萬慶於內鄉萬慶方降獻忠已叛文燦盡調河南軍援勒獨任學留汝南川貴總督李若星論文燦主撫之謬請復任學原官攝行大將督察軍事不從七月獻忠合汝才自房縣西走岱偕良玉追之良玉令

岱爲前鋒已隨其後至羅模山軍乏食賊伏兵要害岱與副將劉元捷鼓勇直上伏四起岱馬足絀於藤抽刀斷之蹶而復進乃棄馬步鬪久之矢盡陷於賊夏玉軍亦大敗事聞任學坐視職十五年言官請起廢任學與焉未及用而卒

贊曰流賊之肆毒也禍始於楊鶴成於陳奇瑜而熾於熊文燦丁啟睿然練國事鄭崇儉先罹其罰而邵捷春俞應桂亦或死或戍疆場則勦撫乖方廟堂則賞罰不當僨師玩寇賊勢日張謂非人謀不臧實使之然乎